

**NATIONAL ASSEMBLY OF
SEYCHELLES**

*Wednesday 18th September
2024*

The Assembly met at 9 am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou *staff* ki pe akonpany ou. Bonzour nou piblik a lekout ki pe zwenn nou pou travay ozordi. E en bonzour spesyal pou nou bann viziter ki dan galeri. Ki mon aprann i en group zenn garson *choir* sorti dan distrik Roche Caiman.

Mon vreman tann li koman en bon nouvel. Letan mon tande ki zot form par *choir*. Akoz i toultan annan sa lenpresyon ki bann zenn garson pa angaz zot dan bann aktivite ki form zot karakter en pe. E mon kontan tande poudir zot en group *choir*.

So mon annan en *special welcome*, en *special welcome* pou zot. I en plezir pou war zot. Annefe ler mon'n leve bomaten mon get par lafnet, mon war lesyel ble pou premye

fwa dan detrwa semenn e mon dir, i bezwen annan en bon keksoz ki pou arive ozordi e petet se sa.

Mersi, nou ava avans lo nou *Order Paper* e nou annan en *Bill*. E mon demann Madanm Raporter pou apel Minis e son delegasyon.

Bonzour Vis-Prezidan Ahmed Afif e bonzour Ms Vania Marimba *Legal Draftsperson* dan *Attorney General's Office*, byenveni dan Lasanble pou partisipasyon lo *Bill*. Pou lans travay, nou komans avek Mosyon pou *Second Reading*, Onorab Georges.

HON BERNARD GEORGES

Mersi Mr Speaker. Mr Speaker, bonzour Vis-Prezidan, bonzour *Mademoiselle*, bonzour tou bann Manm Lasanble, tou bann dimoun ki pe ekout nou.

E en bonzour spesyal pou bann zenn garson ki la avek zot ansennyen ek zot ankadrer dan galeri. Nou *wish* ki zot a pas en bon moman avek nou.

Mr Speaker, anba *Order 69(2)* nou *Standing Orders* mon *move* ki *The Penal Code (Amendment) Bill 2024*, i ganny lir en Dezyenm Fwa. Mersi.

MR SPEAKER

Mersi Onorab. Nou a ganny segonnman pou sa *Bill*? Onorab Sandy Arissol.

HON SANDY ARISSOL

Bonzour Mr Speaker. Mersi, bonzour VP avek *mademoiselle*. Tou bann etidyan dan Galeri. Tou bann Manm Lasanble Nasyonal e tou dimoun ki pe swiv nou ozordi bomaten, bonzour ankor enn fwa. E Mosyon Onorab Georges i ganny segonde. Mersi.

MR SPEAKER

Mersi Onorab. Vis-Prezidan mon ava envit ou pou prezant *Bill* ek Lasanble.

VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour Dirizan Zafer Gouvernman, *Leader* Lopozisyon e tou bann Manm Lasanble, tou dimoun enkli bann dan Galeri.

Mr Speaker, nou pe propoze pou amann Kod Penal pou enkli “laenn” koman en *aggravating factor* oubyen sa ki nou apel an Kreol en faktè agravan, pou tou lofans ki deza dan Kod Penal. E nou osi pe propoze pou azout, “*Hate speech*” koman en lofans.

Lobzektif sa bann lamannman dan Kod Penal. I pou garanti proteksyon bann group vilnerab dan lasosyete

kont bann aksyon diskriminasyon, vyolan e entimidasyon.

Bann karakteristik ki nou'n idantifye, ki kapab fer en dimoun vin pli vilnerab kont bann aksyon vyolan oubyen entimidasyon, i krwayans relizyez, ras, dezabilite, oryantasyon seksyel, idantite seksyel oubyen *gender identity*. Bann karakteristik seksyel *intersex* parey nou dir, afilyasyon politik ek ou stati *HIV*.

Mr Speaker avan ki nou al dan bann detay sa 2 lamannman, nou bezwen konpran kwa sa, sa ki nou apel laenn. Laenn i en santiman ostil e tre for ki nou annan anver en dimoun, en group dimoun oubyen menm en konsep. Normalman laenn i donn lanvi en dimoun fer ditor en lot.

I annan diferan rezon aköz laenn i kapab ganny manifeste. Par egzanp aköz en leksperyans negativ avek en dimoun, lenfliyans kiltirel ki kre bann prezidis, bann faktè istorik e menm psikolojik kot en dimoun i santi li enferyer.

An plis ki sa, laenn i osi kapab manifeste dan diferan fason. Parey endividuelman an group e menm enstitisyonnel par bann Polisi oubyen Lalwa ki diskrimin, oubyen kapab diskrimin en group dimoun.

Mr Speaker, apre sa leksplikasyon, nou ava pas lo sa premye propozisyon, ki pou enkli laenn koman en *aggravating factor*, oubyen faktor agravan pou tou bann lofans ki ganny komet anba Kod Penal.

Sa i normalman ganny apele "*hate crime*". Dan serten ziridiksyon *hate crime* i en lofans lo li menm, oubyen i en sirkonstans ki fer en lofans vin pli serye.

Rezon akòz nou'n entrodwir laenn koman en *aggravating factor*, prensipalman pou adres bann aksyon prezidis ki kapab kree plis dimal lo en dimoun, oubyen en group dimoun. Espesyalman si i koz domaz fizik, ki'n ganny manifeste akòz sa akize i annan laenn kont sa viktim akòz son karakteristik.

Dezyenmman Mr Speaker, nou bezwen pas en mesaz kler pou lasosyete. Ki nou pa kapab target en dimoun oubyen en group dimoun akòz en keksoz ki zot in ne avek.

En keksoz ki'n arive dan sirkonstans lavi ki pa'n ganny prevwar, oubyen akòz zot in swazir pou fer en keksoz. Oubyen viv zot lavi dan en fason ki diferan ek sa ki nou, nou apel sa enorm.

Si sa dimoun in swazir pou viv son lavi dan en fason,

kot in ganny ankadre oubyen permi par Lalwa, akòz ki nou, nou bezwen fer ditor sa dimoun?

Alors sa Prozedlwa devan nou i fer ki en lofans i kapab ganny prosekite koman en *hate crime*, si i relye avek en lofans ki deza dan Kod Penal.

Laenn koman en eleman i ganny azoute avek sa lofans si i agrav sa lofans. Koman en konsekans sa lofans i vin pli sever. Si sa *aggravating factor* i ganny prouve, Lakour pou santans sa kondannen dan en fason pli sever.

En lofans pou ganny grave par laenn dan 2 sirkonstans. Dan premye lenstans, si en akize avan i komet en lofans kont en viktim, kan i ti pe komet en lofans kont en viktim oubyen apre ki in komet en lofans, in montre ostilite kont sa viktim baze lo son karakteristik proteze, par relevan si sa akize in demontre sa ostilite baze lo lezot faktor. Si in annan sa karakteristik proteze ki montre laenn.

Par egzanzp si en akize dan pe lager ek en dimoun, i dir en keksoz ofansif baze lo karakteristik proteze, sa viktim oubyen i demontre en zes ofansif kantmenm sa lager ki ti baze lo en lot faktor, tan ki sa agrese in demontre sa ostilite, sa *assault* in kapab vin en *hate crime*.

Dan dezyenm lenstans, si en lofans in ganny komet kont en viktim aköz son karakteristik proteze.

E dan sa lenstans sa karakteristik proteze sa viktim, pa bezwen sel rezon aköz ki sa akize in komet sa lofans. Me fodre i en fakter signifikan.

En legzanp i kapab ki en dimoun i bril en batiman relizyez. *Arson*, i en lofans dan Kod Penal. Me si i annan laprev ki sa dimoun in fer sa aksyon kriminel, aköz i annan en laenn kont sa larelizyon sa lofans prezan i vin pli grav.

Nou bezwen fer resorti ki laenn dan tou lede lenstans, parey okenn lofans i bezwen ganny prouve par prosekisyon baze lo levidans. Si i kapab ganny prouve, ansanm ek sa lofans, sa Ziz ki pe ekout sa ka i kapab pas en santans pli sever lo sa akize.

Mr Speaker, nou osi pe propoze pou amann Kod Penal pou enkli en lofans sa ki nou apel *hate speech*. Parey mon'n dir avan rezon aköz nou pe propoz sa lofans. Se aköz i annan logmantasyon konsiderab kot dimoun pe kontinyelman ganny ensilte, abize e menase atraver plizyer fason aköz zot annan en karakteristik.

Nou pe propoze ki sa lofans *hate speech* pou enkli lentansyon pou ensit laenn

kont en dimoun oubyen en group dimoun, aköz zisteman zot karakteristik i proteze.

Ensit laenn i bann aksyon ki ankouraz, fer oubyen promot lezot dimoun pou annan laenn kont en dimoun, oubyen en group dimoun aköz zot karakteristik.

Sa akize, fodre ki son lobzektif i pou senm sa lenn oubyen lostilite pou promot diskriminasyon e prezidis.

Nou bezwen fer resorti ki sa lofans i pa en keksoz nouvo dan Kod Penal. Aköz i deza annan lofans dan Kod Penal ki en pe parey, sa lofans ki nou pe propoze sa i apel "*Seditious Offences*", anba seksyon 54 ek 55. E osi "*incitement to cause violence*", anba seksyon 89(a).

Alors nou pe propoze ki sa ensitasyon fodre i ganny baze lo sa bann aksyon swivan:-

Premyerman okenn kominikasyon oubyen fer okenn propagann kapab an ekrire, par okenn diskour oubyen ganny eksprimen dan okenn lezot form, sa bann tel aksyon fodre i ganny fer piblikman oubyen lo en medya elektronik.

Dezyenmman, i pibliy oubyen distribye okenn, materyo.

E trwazyenmman, sa ensistasyon i kapab baze lo konportman.

I enportan pou note ki bann tel aksyon oubyen *speech*, fodre i ganny enterprete koman abizif, menasan oubyen ensiltan.

Sa mo rezonnab li menm fodre i ganny itilize pou evalye sa *speech*. Materyo oubyen aksyon dan son prop merit, depandan lo konteks konteni, lentansyon sa akize, lenpak sa bann aksyon e bann norm dan nou lasosyete.

Mr Speaker, fodre osi note ki i annan bann eksepsyon pou sa lofans. Savedir en dimoun pa pou ganny sarze si sa diskour, konportman oubyen materyo i enn:-

En performans oubyen lekspresyon artistik ki'n ganny fer an bonnfwa.

Si sa performans oubyen ekspresyon, pa pe ensit okenn ditor.

Dezyenmman, si en lanket akademik oubyen syantifik.

E trwazyenmman, reportaz, komanter oubyen notis, avertisman dan lentere piblik.

Katriyenmman, okenn aktivite kot sa lekspresyon materyo oubyen konportman i neser pou en rezon legal. E sa i enkli pou bann lanket oubyen prosekisyon en lofans.

Oubyen senkyenmman, enterpretasyon oubyen lesey pou konverti bann krwayans

relizyez, oubyen bann lezet krwayans, doktrin e lektir ki ganny fer an bonnfwa. Ositan ki sa enterpretasyon oubyen lesey pou konverti oubyen konvansyon pa ensit okenn ditor.

Koman santans Mr Speaker, en dimoun i kapab ganny kondannen pou sa lofans. Si i zot premye kondannasyon zot pou gannyan lamannman lo nivo 3 *Criminal Offences Standard Scale of Fines Act 2021*. Savedir pa plis ki R50 mil oubyen term prizon pa plis ki 2 an, oubyen tou lede.

Si zot fer sa lofans ankor zot pou ganny en lanmann lo nivo 4. Savedir pa plis ki 125 mil oubyen term prizon pa plis ki 3 an, oubyen tou lede.

Nou konpran ki kekfwa piblik i annan rezervasyon lo sa nouvo lofans, akoz zot panse ki i kapab vyol zot drwa laliberte lekspresyon, selman Mr Speaker nou asir zot ki sa drwa li menm in ganny proteze anba lartik 22 nou Konstitisyon i limite dan serten sityasyon.

Sa i espesyalman si i pou protez drwa lezet dimoun, kont bann aksyon ki pou kapab fer zot ditor. E osi si i neser pou mentenir lord dan lentere piblik e moralite.

En demokrasi i defann nou drwa laliberte lekspresyon. Me osi nou tou

nou bezwen egzers sa drwa dan en fason egzantab e respektab.

Nou bezwen fer sir ki nou pa servi sa drwa pou propaz okenn vyolans prezidis ek diskriminasyon. Alors garanti sekirite i laspe esansyel pou respe dinyite imen e bann drwa fondamantal. Mersi bokou Mr Speaker.

MR SPEAKER

Mersi Vis-Prezidan. Avek sa lentrodisyon nou ouver lasal pou entervansyon bann Manm. E mon annan serten Manm lo lalis Onorab Bistoquet ou annan laparol.

HON ANNE BISTOQUET

Mersi Mr Speaker. Bonzour Mr Speaker, bonzour tou bann Manm koleg Onorab, tou dimoun a lekout. Bonzour bann zanfan Roche Caiman dan Galeri.

Mr Speaker, Lasanble Nasyonal pe ganny envite ozordi pou fer en lamannman dan sapit 158 Kod Penal nou pei, pou fer antre en gran konsern ki pe anvair nou pei ozordi.

Sa en nouvo provizyon ki kouver langaz ranpli avek laenn, ki pous en dimoun pou fer en krim. Akoz dan lespri laenn dimoun pou diferan rezon, napa drwa e alor napa legzistans.

Sa laenn i kouver en gran levantay size tel ki kouler, larelizyon, lorizin rasyal, tandans seksyel, kondisyon lasante en dimoun, ek lezot.

I enportan pou note ki sa ki pe ganny entrodwir, i bann faktor ki kapab agrav sa krim ki ganny komet. Sa ki dan langaz legal i apel "*aggravated factors*." Se sa ki anmenn sa eleman laenn.

Sa i enportan pou nou konpran, akoz si non, i pou vin en sours konfizyon parey serten dimoun in deza komans fer.

Mr Speaker, dan laliberte lekspresyon dan Sesel pa pe ganny trangle atraver sa lamannman. E mon espere ki bann dimoun ki'n fer komanter lo sa lamannman sanmenm konpran e lir sa lamannman li menm, i ava pran en pe plis letan pou konpran e sezi ki Drwa Laliberte Lekspresyon pe kontinyen ganny proteze anba lartik 22 nou Konstitisyon.

E ki dimoun pou senpleman kontinyen ganny demande pou pran zot responsabilite, parey nou Konstitisyon i demann nou dan Lartik 40 dan sapit 2 nou Konstitisyon.

Lartik 22 *clause* (1) nou Konstitisyon i lir *comme swivan*; -

"Tou dimoun i annan en drwa laliberte lekspresyon e

an sa ki konsern sa lartik, sa drwa i enkli laliberte pou annan en lopinyon e rode, resevwar e donn lide ek lenformasyon san lenterferans”.

Mr Speaker, i osi enportan pou eksplik piblik kategori nou bann drwa konstitisyonnèl. Nou 25 Drwa Konstitisyonnèl, i klasifye dan 3 kategori ki bann Drwa Absoli, Drwa Limite e Drwa Kalifye.

Drwa Absoli i bann drwa ki Gouvernman pa kapab touse dan okenn sirkonstans. E i aplikab pou tou endividi san okenn leksepsyon tel ki Drwa pour Viv.

Drwa Limite i bann drwa ki Gouvernman i kapab entervenir e restrikte anba serten sirkonstans spesyal ki ganny zistifye pou bezwen proteksyon lord piblik, sekirite, lasante oubyen drwa lezot. Tel ki drwa lekspresyon ki kapab ganny limite pou prevansyon bann langaz ranpli avek laenn.

Drwa Kalifye, i bann drwa ki ganny proteze me i rezerve dapre serten kondisyon e restriksyon. Tel ki Drwa Rasanbleman ki kapab ganny restrikte, oubyen menm met anba serten kondisyon pou mentenir lord piblik.

Alor Mr Speaker, parey mon'n masyonnen drwa lekspresyon i en drwa ki

limite. E sa limitasyon i ganny masyonnen anba Lartik 22 *clause* (2) ki dir *comme* swivan;

-
“Sa drwa anba *clause* (1) i kapab vin en size bann restriksyon parey i kapab ganny preskri par en Lalwa ki neser dan en sosyete demokratik”.

Mr Speaker, en sosyete demokratik i ganny enterprete anba Lartik 49 *comme* swivan:-

“Sosyete demokratik i vedir en sosyete pliralis kot i annan tolerans, respe pou drwa ek laliberte imen fondamantal ensi ki legzekisyon Lalwa. E kot i annan en balans pouwar ant Egzekitiv, Lezislatif e Zidisyer.

An dot mo Mr Speaker, sa *Bill* ki devan nou ozordi, i ekstrememan enportan pou proteksyon bann endividi e lakominote kont perseksyon, vyolans e lensilt verbal. Sa i vedir kot ou drwa i fini pou mwan i komanse.

I annan 2 eleman dan sa lamannman.

Premyerman, en dimoun ki komet en lofans akoz i annan laenn kot en lot dimoun oubyen en group dimoun, akoz kouler, larelizyon, tandans seksyel ek lezot rezon e prononse ki i pe fer sa krim, akoz li i pa kontan sa bann eleman lye avek en dimoun

pou trouv son parol ganny servi pou agrav son krim.

Sa i senpleman pou dekouraz tel tandans, akòz anba nou Konstitisyon e Lalwa Laliberte, en dimoun oubyen en group dimoun pe ganny afekte e pa pe ganny proteze.

Konstitisyon ek Lalwa i la pou protez tou sitwayen e okenn aksyon menas ek parol ki al dan lot direksyon, pa kapab ganny tolere dan nou sosyete.

Sa premye eleman i ganny mete klerman dan seksyon 38A sou seksyon (ii) ki dir klerman ki si en dimoun avan oubyen apre ki i komet en lofans i fer kler ki i pe fer sa krim akòz enn ou plis karakteristik sa viktim, sa pou ganny servi kont li.

E alor dan seksyon 38(a) sou seksyon (6) paragraf (1) i dir klerman, ki letan Lakour pe pas santans, i pou dir ki sa lofans i ganny agrave par laenn.

Paragraf (b) i dir, rikord sa konviksyon dan en fason ki montre ki sa lofans in ganny agrave par laenn, e paragraf (c) i pran sa agravasyon pou determin santans apropiye.

Dezyenman, sa lamannman i entrodwir klerman sa eleman diskour laenn, an relasyon avek en dimoun ki'n annan lentansyon ensit vyolans kont en dimoun, oubyen en group dimoun baze

lo zot kouler, larelizyon, tandans seksyel ek lezot.

I vin en lofans si sa dimoun ki anvi ensit sa vyolans, i kominik li an ekrir dan son diskour piblikman atraver medya elektronik e ki sa i kapab dan en fason rezonnab ganny enterprete koman langaz menasan ranpli ek labi, oubyen bann lensilt serye. Sa pou ganny konsidere koman en lofans e sa dimoun i kapab ganny sarze.

Mr Speaker, i enportan pou note ki sa eleman kominikasyon vyolans atraver elektronik, i osi fer provizyon anba *Cybercrime and Other Related Crimes Act 2021*, seksyon 14 *cyber harassment* e seksyon 16, "*Offensive Electronic Communications*", ki vedir tou lede Lalwa i kapab ganny konsidere dan en tel ka.

Sepandan provizyon sa seksyon 89(b) sou seksyon (1) pa aplike si sa bann parol i ganny fer an bonn fwa dan konteks artistik, performans, oubyen lezot form lekspresyon ki pa neserman pe montre laenn. Ki kapab anmenn provokasyon pou ensit dimal baze lo bann karakteristik ki en dimoun, oubyen en group i annan anba sa Lalwa.

Mr Speaker, la ki mon'n pas lo konteni sa lamannman, savedir kwa ki dan sa Lalwa mon anvi al lo son kote pratik

ki nou kapab pli byen konpran son laplikasyon.

Dimans le 15 Septanm nou tou nou'n soke avek en *video* fer par Mr Reginald Hoareau, en Seselwa ki ti premye pou ouvertman deklar son kondisyon *HIV*. In fer en kantite travay dan sa domenn e in ouvertman koz lo en lensidan ki'n ariv li sa zour.

Dan lespas 2erdtan plis ki 16 mil dimoun ti'n regard sa *video* e eksprim senpati ek lakoler lo sa lensidan ki ti'n pas ladan. Sa i montre ki Seselwa i konsernen anver bann tel aksyon.

Dezyenm pwen relevan avek sa Lalwa eleve, Mr Reginald Hoareau i en dimoun byen koni e kondisyon lasante i piblik atraver son prop deklarasyon ek travay. In reprezant Sesel dan plizyer *forum* enternasyonal, rezyonal e lokal.

Dimans in leve byen granmaten pou li al travay. En Seselwa ki debrouye pou nourison fanmir. En dimoun ki i pa konnen me ki definitivman konn li, in arete maltret li an servan bann mo ki zisteman sa lamannman i dekrir koman diskour laenn, e lans lo li pou atak li avek en kouto. Granmersi loto Mr Reginald pa ti lwen e i ti rantre dan son loto e sove.

Ki konklizyon nou kapab tire? Anba lamannman aksyon

sa dimoun pou konstitye en lofans aköz i ti son lentansyon, anba seksyon 89(b) sou seksyon (1) pou ensit vyolans kont en lot dimoun aköz son kondisyon. Sa dimoun i kapab ganny arete, ganny sarze e si i ganny trouve koupab ganny kondannen.

Si par move sans sa dimoun ti'n komet en krim par bles Mr Reginald, e anmenn tan servi sa langaz vyolans, son lofans ti pou ganny agrave e anba Lalwa ki nou pe demande anba seksyon 38(a) i ti pou ganny en santans pli for.

I osi annan bann lezot sarz anba nou Lalwa Sesel ki sa dimoun ti pou'n komet. Me parey nou konnen Lalwa pa retrospektiv, amwen ki i annan en dat komans ki'n ganny spesifye.

Alors sa ki mon'n fer referans avek, i zis en legzanp en lensidan resan. Mr Speaker, i kler ki nou bezwen protez tou Seselwa an prenon kont zot sityasyon lavi.

Drwa sak endividi i bezwen ganny proteze anba nou Konstitisyon. Napa plas pou laenn. Mwan koman en sitwayen mon debout pou defann tou Seselwa, san prenon kont son kouler, son larelizyon, son tandans seksyel ou nenport ki lezot kondisyon, malgre ki sa i fer

en dimoun diferan avek mwan.

Nou tou nou imen e nou bezwen a tou moman viv an obeisans avek demann nou Konstitisyon ek Lalwa pei, pou nou asir byennet tou sitwayen.

Mon termin an sitan Lartik 40 nou Konstitisyon, akoz mon krwar ki se sa dan sa konteks ki mon ankadre sa lamannman ki nou pe fer ozordi.

Lartik 40 i lir *comme swivan*; -

“I devwar tou sitwayen Sesel pou soutenir e defann sa Konstitisyon ek Lalwa, pou fer avanse lentere Nasyonal e kiltiv linite Nasyonal pou travay konsyansyezman dan en profesyon, lokipasyon ouswa metye zot swa, pou kontribye anver byennet kominote, pou protez prezerv e amelyor lanvironnman e pour zeneralman fer tou posib pour travay ver lakonplisman bann enspirasyon ki annan dan Preamble sa konstitisyon.”

Nou konstitisyon i kler. Se sa ki fer nou vin patriyotik e konsyan ki Sesel i pour nou tou. E nou bezwen non selman protez nou pep, me fer nou paviyon flot pli o posib.

Parey slogan dernyen gran konvansyon LDS ti dir, “Sesel i avan tou!”. Mon pour donn tou mon sipor sa lamannman. Mersi Mr Speaker.

MR SPEAKER

Mersi Onorab. Laparol pour Onorab Arissol Philip.

HON PHILIP ARISSOL

Mersi Mr Speaker. Bonzour Mr Speaker, VP avek ou delegasyon. Tou koleg Onorab e bann zanfan ki anler dan galeri avek zot *teacher*.

Mr Speaker, mersi pour laparol. Ozordi nou vwar nou dan en moman kritik dan pourswiv lazistis, egalite e dinyite pour tou dimoun dan nou sosyete.

Prozedlwa ki devan nou, pe demann nou pou amann Kod Penal pou abort problem irzan dan lofans motive par laenn.

Mr Speaker, i enperatif ki nou aport nou sipor pour sa Lalwa enportan. Laenn napa okenn plas dan nou kominote e dan nou pei. I diviz nou, ankouraz lanimosite e afeblir fondasyon nou pti sosyete.

Mr Speaker, letan nou entrodwir bann eleman laenn koman en fakter agravan dan Kod Penal, nou pe anvoy en mesaz for e kler ki nou pa pe toler krim ki ganny fer pour rezon prezidis ouswa prezize.

Sa lamannman i rekonnet realite serten lofans, pa selman akt vyolans ouswa diskriminasyon, me ki zot anrasinen profondeman dan laenn anver dimoun baze lo

zot ras, larelizyon, dezabilite, oriyantasyon seksyèl, afilyasyon politik ouswa zot leta lasante.

Mr Speaker, letan nou mazin lenpak sa bann krim lo nou viktim e lo nou kominote, ler en dimoun i ganny targete pa selman pour zot aksyon, me pour zot kalite dimoun ki zot ete. Reperkisyon i al pli lwen ki sa endividi.

I ganny resanti dan son fanmir, dan kominote e dan sosyete an zeneral. Enstil lafreyer e kree ensit laenn. Ler nou ranforsi penalti pour sa bann lofans, nou afirm nou langazman pou protez dimoun ki vilnerab e tenir akize responsab pour zot aksyon.

An plis ki sa, enklizyon *hate speech* konman en lofans diferan dan Kod Penal i en letap enportan dan proteksyon nou sosyete. Diskour ki ensit laenn, i pa selman en konsepsyon abstrè, i annan en konsekans tanzib. Mr Speaker, i kapab kondwir dan vyolans, diskriminasyon e plis, diviz nou sosyete.

Ler nou adres diskour laenn direktman, nou *empower* nou lekor pou konfront e defye en diskour danzere, ki pe pourswiv pou degrad e britaliz en lot dimoun. Se nou responsabilite pou kiltiv en lanvironnman kot diskour i ankouraz

konpreansyon, olye ki i kree divizyon.

Sa *Bill* pa konsern restrikte lapres lib. I plito lo asire ki nou laliberte lekspresyon i pa a ganny fer o detriman drwa e sekirite, e dinyite en lot dimoun. Nou dwatet trouv en balans ki protez dimoun kont aksyon e parol laenn pandan ki nou pe osi prezerv nou prensip demokratik.

Letan nou pe siport sa Prozedlwa, nou pe etabli en letap enportan dan nou direksyon pou ankouraz en sosyete ki pli enkliziv e annan plis konpasyon.

Nou pe afirm nou valer respe e egalite. E nou pe solider ek dimoun ki ganny marzinalize ouswa targete. Deplis, nou merit rekonnèt ki aksyon sa Lezislatif, i fer parti en mouvman pli larz dan direksyon lazistis sosyal. Lemonn pe get nou e nou aksyon ozordi pou *echo* dan le fitir.

Ler nou pas sa *Bill*, nou pozisyonn nou koman en lalimyer lespwar e progre dan demontre ki nou prepare pou konfront laverite enkonfortab e azir en fason desiziv kont lenzistis. I en loportinite pour nou edik nou kominote, sansibilize e ankouraz dyalog lo lenpak laenn e diskriminasyon.

Annou osi rapel pwisans dimoun, pwisans lavwa dimoun ki'n soufer konsekans laenn. Zot zistwar pa selman en statistik. Se lavi reel ki'n sanze par prezidis e lafreyer.

Ler nou adopte sa Lalwa, nou oner zot leksperyans e nou rekonnèt douler ki zot in sibir. An menm tan, nou anvoy en mesaz ki nou konpran zot soufrans e ki nou pe pran sa langazman, pou konstrir en sosyete kot sa douler pa pou ganny tolere ankor.

Pou konklir, annou zwenn ansanm konman en Lasanble inifye pour nou pas sa *Bill*, pou demontre nou langazman anver lazistis e pour afirman ki laenn napa plas dan nou kominote. Ansanm nou kapab batir en lavenir kot tou dimoun, ki swa son idantite, i kapab viv san lafreyer e san diskriminasyon. Mersi Mr Speaker.

MR SPEAKER

Mersi Onorab. Laparol pour Onorab Labonte.

HON ANDY LABONTE

Bonzour Mr Speaker. Bonzour tou koleg Onorab. Bann zanfan ki anler dan Galeri. Tou Seselwa e zabitan La Rivière Anglaise spesyalman.

“Viv touzour dan linite, ladouser ek pasyans. Siport kanmarad dan lanmour. Fer tou pou protez linite ki lespri i

donnen par lape ki ini zot.” Sa i ganny tire dan Efezyen Sapit 4 Vers 2 a 3.

Mr Speaker, sa lamannman Kod Penal ki devan nou, i enn ki pe demann nou – pour mwan, i pe demann nou pep plizoumwen pou annan respe e latolerans pour nou prosen, ler nou pe egzers nou drwa ek laliberte lekspresyon.

Sa Lalwa pa pe dir ou ki ou napa drwa eksprim ou lopinyon. Me i pe dir ou pa bezwen menas ou abiz ou prosen lo baz faktor karakteristik proteze. E ler ou pe egzers ou drwa ek laliberte, ou merit annan respe ek tolerans.

Ki savedir faktor karakteristik proteze? Seksyon 5 Kod Penal (*Cap. 158*) i dekrir kler ki savedir. Premyerman; ras; ki vedir kouler lapo, desandans, zanset, nasyonalite, sitwayennte, etik, lorizin nasyonal.

Par egzanp; ler okenn endividi i tret son prosen swa mazanbik, malbar sal, vye blan milat, sa i bann fason ki nou maltret nou prosen.

Krwayans relizye; sa i enkli; swa ou en relizye, swa ou non relizye. Swa ou napa okenn krwayans. So tousala i enportan ki nou respekte.

Dezabilite; Ki savedir dezabilite fizik ou mantal? E

tousala i ganny proteze.

Oriyantasyon seksyel; Mr Speaker, swa ou en zonm ki kontan oubyen atrakte avek en madanm, swa ou en madanm ki kontan oubyen atrakte avek en zonm. Swa ou en zonm ki kontan oubyen atrakte ek en zonm; swa ou en madanm ki kontan oubyen atrakte avek en lot madanm.

Swa ou en dimoun ki'n ne avek tou lede organ seksyel. Me ou kontan oubyen ou atrakte avek en lot dimoun kot ou santi nenport ki ou organ seksyel i pli dominan. Swa ou en zonm oubyen ou en madanm ki kontan ou atrakte avek tou lede, zonm oubyen madanm. Sa latraksyon i kapab fizik, anmoure, emosyonnel oubyen relasyon entim.

Mr Speaker, respe i drwa en endividi. I primordyal. Latolerans anver okenn endividi, i pa vedir ki mon siport ou konpletman. Me i montre grander lespri. Apre tou, sak endividi i responsab pour son lavi e swa ki i fer. E son aksyon.

Lot faktor karakteristik proteze; idante seksyel. Si ler ou'n ne, lo ou kart idantite i dir ou en femel, ou en mal, me ou santi ou deside ki i tou lekotrè.

Swa ler ou'n ne ek en parti seksyel. Me ou'n sanze atraver en loperasyon, swa pe

nenport parti seksyel ki ou'n ne avek, e ou ki deside ki mannyer ou anvi abiye an piblik. Ankor enn fwa, i ou swa. E ou merit kapab ganny proteze si ou pa pe abiz drwa ou prosen, akoz i ou swa e ou drwa anba Konstitisyon.

En lot faktor karakteristik proteze; karakteristik seksyel. I vedir par ou laparans fizik. Swa ou en zonm ki maskilen. Swa ou en zonm ki feminen. Swa ou en madanm ki feminen. Swa ou en madanm ki maskilen.

Swa ou annan varyasyon dan lafason ki ou manifeste ou laparans fizik. *Hormone* oubyen menm *chromosome* zenetik. Me i diferan avek sa ki zeneralman ekspekte swa i mal, swa i femel.

Afilyasyon politik; ankor Mr Speaker, anba Konstitisyon sak endividi i annan drwa afilye li ou pa afilye li avek okenn groupman, ki parti politik ou manm okenn lasosyasyon. Ou annan drwa siporte e ou annan...

E ou osi eksprim ou lopinyon libreman. Ou osi kapab kritike dan nenport ki fason. Me sa lamannman i pe dir ou ki ou pa kapab mank respe par maltret, viktimize fizik ou verbal, avek lentansyon fer aksyon ki abiz drwa sa lot endividi.

E dernyen faktor karakteristik proteze, ki sa

Lalwa pe proteze i koz lo la i stati en endividi, swa ki *HIV/AIDS*. E parey Onorab oparavan ki'n koz avan mon, Onorab Bistoquet in fer resorti. Nou'n fek rankontre, nou'n war lo *social media* kot enn nou zabitan - enn nou Seselwa in ganny viktimize dan sa fason.

Mr Speaker, i kler ki sa Lalwa pe dir. Ou annan drwa eksprim ou lopinyon dan nenport ki fason. Me si ler ou pe eksprim ou lopinyon, ou merit fer sir ki i pa enkli ayzon avek fakter agrave. Si non, ou pe komet en lofans.

E i osi al pli lwen pou dir ki an plis ki sa, enklizyon distrik ay-zon koman en lofans anba Kod Penal (*Cap. 158*), i fer provizyon ki si okenn endividi i demontre lentansyon pou enstil ayzon anver okenn son bann group fakter karakteristik proteze dan okenn form kominikasyon ou konportman. Si non, lekspresyon i annan menas, labi ouswa zoure e maltrete. Ou pe komet en lofans.

Mr Speaker, “mon krwar dan defann drwa bann pov ek bann orfelen. Rann lazistis bann malere e bann ki napa naryen. Sov bann pov e bann ki dan bezwen. Delivre zot dan lanmen bann malfeter.” Sa i trouve dan *Psalms 82 - 3 a 4*.

Pour mwan, si ou pe abiz ou drwa, ou en malfeter. E

mon responsabilite se defann drwa bann ki pov e rann zot lazistis. Dan sa lespri ki mwan Mr Speaker mon pou siport sa Mosyon e - mon pou siport sa *Bill* e mon krwar ki i en *Bill* ki vremen ekstreman enportan pour nou koman en nasyon, koman en pep.

Me par kont Mr Speaker, mon ti a kontan 2 pti leklersisman avek *VP* ler ki i pe rann repons - avek Vis-Prezidan. Si petet Vis-Prezidan i kapab dir Lasanble lekel bann lezot Lalwa enternasyonal ki nou'n pran legzanp ler nou ti pe drafte sa lamannman?

Eski sa bann lamannman i anliny avek bann lezot bout nou Konstitisyon ek bann Trete ki nou'n sinyen?

Ki relasyon sa bann lamannman i annan avek *ICCPR - International Covenant on Civil and Political Right*?

Dan ki fason sa Lalwa in demontre proteksyon en *...men* ou en dimoun ordiner avek en dimoun ki dan Lotorite?

E finalman, eski i annan okenn rapor sorti kot *Ombudsman ek Human Rights* ki'n ganny resevwar an relasyon avek sa Prozedlwa?

Mr Speaker, mon ti ava osi kontan konnen si sa Lalwa pe pran kont lofans ki ganny komet par medya

tradisyonnèl, ensi byen ki medya modern e medya sosyal, vi ki nou konnen lofans i kapab ganny komet a tou nivo?

Me Mr Speaker, avan mon terminen e pou terminen mon ti a zis kontan dir, ki parfwà nou Seselwa ou okenn endividi, si nou pa ganny touse par serten sironstans ou sityasyon, nou pa pran kont. Nou krwar – nou oubliye ki nou viv dan en lemonn global.

Mr Speaker, i fer mwan mazin en *advert* ki ganny fer lo televizyon, ki pase lo televizyon nasyonal. Kot ler i demann sa garson konbyen dimoun ou krwar i akseptab pou mor dan en aksidan fatal lo semen? E i donn en nonm. Me ler i war poudir i kapab son bann fanmir, i dir ou zero.

Savedir i montre ou? Nenport ki nou, nou kapab sibir enn sa bann agresyon. Alor i enportan ki nou annan Lalwa ki la pou siport tou endividi, akòz nou tou nou annan menm drwa anba sa Konstitisyon. Mr Speaker, avek sa de mo mon pou donn sipor sa *Bill*. Mersi.

MR SPEAKER

Mersi. Mersi Onorab. Laparol pour Onorab Naddy Zialor.

HON NADDY ZIALOR

Mersi Mr Speaker. Bonzour Mr Vis-Prezidan. Bonzour tou zanfan. Byenveni kot Lasanble Nasyonal e bonzour Lepep Seselwa ki pe ekout nou bomaten.

Mon pran laparol bomaten, parske mon santi i en loportinite enportan pour nou konman en nasyon regarde kote nou'n arive e kote nou anvi ale. Me pli enportan, ki bor ki nou sorti Mr Speaker.

E en tel lamannman dan Kod Penal in permet mwan pou premyerman pran en letan lir sa lamannman, konpran li. E met li an konteks dan lavi toulezour ki mwan premyerman konman en endividi e konman en Seselwa. Me pli enportan, nou bann frer e nou bann ser ki pe viv e ki pe pas dan sa leksperyans apele laenn. Apele *hate crime speech*, Mr Speaker.

Alors, premye keksoz ki mon'n demann mon lekor se, eski en tel lamannman i annan son lenportans? E eski en tel lamannman i annan en merit? Eski sa pou afekte en endividi vizavi laliberte lekspresyon?

Me an premye lye, kisisa *hate crime speech*? Eski zis Sesel ki'n deside leve bomaten e entrodwir en tel Lalwa konman en lofans dan nou pei? Annefe Mr Speaker, laliberte lekspresyon i enn bann drwa fondamantal.

Lafason ki nou eksprim nou lekòr ozordi, i pa nesèyman lafason ki nou ti eksprim nou lekòr dan lepass. Wi, tou dimoun i lib. Tou dimoun i lib pou eksprim son lopinyon. I lib pou annan son afilyasyon.

Napa person ki ganny anpès ozordi pou annan son prop groupman. Pou annan son prop idantifikasyon akòz ou avèk mwan nou lib, Mr Speaker. Me tou drwa – tou drwa i annan en paramet.

Ou drwa i fini kot pour mwan i konmansè. Dan tousala i annan en *trend* ki pe ganny devlope e en kiltir ki pe ganny enkilke dan nou nasyon pour nou agrav lasasinasyon karakter en endividi.

E letan mon regard premye parti dan sa lamannman, i fer mwan realize ki nou bezwen annan en serten rekour pour sa group dimoun ki santi ki zot karakter souvandfwa i ganny asasinèn. Zis akòz, enn;- i krwar ki i annan laliberte lekspresyon e i permet li fer sa.

Dan sa lamannman ki Vis-Prezidan in koze bomaten seksyon 5, i koz lo serten proteksyon kategori en group dimoun ki nou konman en pei nou santi i bezwen ganny proteze. Sa i baze lo son ras, krwayans relizye, dezabilite, loriyantasyon seksyel,

afilyasyon politik, son stati *HIV* oubyen *AIDS* Mr Speaker.

E la mon anvè nou fer en pti refleksyon; eski en endividi i merit ganny penalize akòz son kouler lapo?

Eski en endividi i merit ganny ensilte akòz son desandans ouwa son nasyonalitye?

Eski en endividi i merit ganny asasin son karakter zis akòz son krwayans relizye ouwa akòz son dezabilite fizik oubyen mantal?

Ouwa son idantifikasyon seksyel, ouwa loriyantasyon?

Ouwa, eski nou merit ensilte, maltret en dimoun zis akòz son afilyasyon politik, ozordi i ti kot ou, Demen in deside al kot lot. Alors ou, ou deside ensilte li e travers laenn anver li Mr Speaker.

Dan mon konprezon, sa lamannman dan sa seksyon, se ki i anmèn en serten proteksyon e kree kour pli detaye e pli spesifik pour en group dimoun ki mwan avèk ou oubyen en lamazorite nou, nou vwar ki zot pe ganny marzinalize. Pou ki swa akòz zot an minorite. Ouwa akòz zot diferan Mr Speaker.

E la i anmèn mwan lo sa nouvo sapit ki'n ganny enkli dan Kod Penal. Sapit 5A ki li i koz spesifikman lo laenn e son konsekans. Tre souvan se sa group dimoun ki nou'n koz lo

la dan seksyon 5 ki vwar li vin en viktim laenn.

E dan plizyer pei enkli Nasyon-z-ini, in vwar li nesese pou fer ki *hate crime speech* i vin en priyorite e ki i ganny definir, i ganny ankadre anba en Lalwa Domestik dan sa bann pei ki afilye avek bann groupman.

E sa tre souvan, sa i aköz lobligasyon ki nou annan anliny avek komikman enternasyonal, tel konman konvansyon. E la mon mazin Konvansyon pour bann Dimoun avek *Dezabilite-Human Right Charter* Mr Speaker.

Annefe, parey mon'n dir o konmansman. Sesel i pa le sey pei ki annan en tel *Hate Crime Bill* ouswa en Lalwa ki ankadre sa group ouswa sa ki nou pe koz lo la.

Lostrali. Azeri, Brazil, *La France*, annefe *La France* li an Me 2020, i ti fer li obligatwar dan Lalwa ki okenn lartik ki relye avek laenn ki ganny mete *online* i ganny retire. Lalmanny, Lenn, Zapon, Kenya e plizyer pei ankor Mr Speaker.

Dan nou pti pei, fodre nou admet ki i annan en kiltir laenn verbal ki pe ganny devlope. Ki pe ganny manifeste avek lentansyon pou annan – pou kree vyolans, laenn kont serten endividi. En tel Lalwa i

ava vin sa gardyen, ki i a fer sir ki tou dimoun i konn son *limit*.

Letan en dimoun i decide denigre ou ouswa denigre en frer Seselwa aköz son lorizin, e dir e *threaten* li e dir ki i pou elimin li zis aköz son definasyon – nasyonalite, eski sa i pa laenn Mr Speaker?

Ouswa letan en dimoun aköz son krwayans relizye i ganny *threatened* verbalman, ouswa i ganny denigre lo medya sosyal. Eski sa i pa ganny definir konman laenn Mr Speaker?

Letan – e la mon anvi servi en leksperyans - mon leksperyans. Letan ki – dayer mon'n pardonnen. Me mon pa pou zanmen bliye - letan en sitwayen, aköz son lapartenans politik atraver bann medya elektronik, ou enstige, swete ki ou zwenn li pou bat li e aras li son bekir e grenn son ledan Mr Speaker, eski sa i pa laenn Mr Speaker?

Letan ki nou pe rod tou fason pou estig vyolans atraver en lot nou frer aköz son lopinyon diferans. Mon pardonn zot, me mon pa pou zanmen bliye Mr Speaker.

En tel lamannman e en tel sapit dan nou Kod Penal i ava fer ki dan le fitir okenn dimoun ki pas atraver en tel leksperyans, i ava annan en rekour; en tel dimoun ki pas atraver en tel keksoz atraver medya sosyal ouswa menm

fizikman, i ava annan en rekour Mr Speaker.

Sa i anmenn mon dan sa nouvo sapit dan sa lamannman 89(b) numero 4 ki koz lo “*Electronic Media*”. E la mon ava demann avek Vis-Prezidan. Eski i kapab dir avek nou dan lenstans kot en tel lofans laenn pe ganny fer e in ganny prouve atraver bann *platform* anonim, sirtou lo medya sosyal - eski par egzansp i annan en tel mekaniz an plas pou idantifye lekel sa endividi?

E ki vre idantite sa dimoun ki pe denigre ouswa koz sa diskour laenn, i kapab ganny en prosekisyon ki solid. Parske mazorite letan bann tel deklarasyon, bann tel keksoz laenn i ganny fer dan bann group anba en *fake profile*. Ouswa menm bann ki kasyet anba bann non anonim Mr Speaker.

An terminan, pour sa Seselwa ki vwar li i ganny *bully*, i ganny menase. Parfwa ganny *blackmail*. I ganny ensilte aköz i tonm dan en group minoriter. Mon santi ki nou pa pe siprim laliberte lezot. Me nou pe senpleman ranforsi drwa legal pour sa enn ki li i vwar li dan sa sityasyon.

Nou pe ranforsi drwa legal pour sa viktim, pour sa group minoriter. Konman en nasyon nou pres linite. Konman bann Dirizan nou

pres tolerans. Me an menmtan, nou pa kapab ganny vwar pe kiltiv laenn, vanzans, vyolans e anti en endividi.

Nou ava annan nou diferans lopinyon. Me nou pa kapab enstige pou elimin enn nou frer e zet li anba en pon, denigre li aköz son loriyantasyon ouswa son krwayans.

Nou pa kapab swete pou kraz ledan enn ouswa denigre sa enn ki li son larelizyon i diferan. Ouswa demann larme pou servi en revolver zis pou elimin diferans en lot nou bann frer, Mr Speaker.

Sa i laenn e nou pa kapab kontinyen annan bann tel keksoz dan nou pei. Sa i pa Sesel ki nou, nou anvi ozordi e sertennman pa Sesel ki nou anvi reve vwar demen. La ki nou pe rantre dan en klima eleksyon, i enportan ki nou osi konman bann Dirizan isi dan sa Lasanble e bann ki aryer, montre vre lespri linite dan diversite.

Mr Speaker, avek sa mon pe aport mon sipor e mon swete ki atraver Biro Atorni Zeneral, sa Lalwa i non selman ganny koze ozordi dan Lasanble, me ki piblik i konpran egzaktaman dan pli senplisite posib kwa ki i pou annan ki pou benefisy e ki bi vremen sa Lalwa pou anmennen dan nou pei. Avek sa mon a dir mersi.

MR SPEAKER

Mersi Onorab. Laparol pour Onorab Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour tou bann zanfan anler. Bonzour osi VP avek Ms Vania e tou lezot Manm dan Lasanble. E tou dimoun ki pe ekoute.

Mr Speaker, pour mwan sa Lalwa in vin en pti pe tro tar. I ti'n devret vin depi yer. Me selman mon fyer se ki LDS ki'n anmenn sa Lalwa.

Akoz mon dir sa? Set akoz an rezilta bokou sa bann keksoz ki pe ganny mete konman lofans, bokou dimoun in bezwen kit sa pei. Bokou dimoun in vwar li en viktim ki'n al dan prizon. Oubyen in vwar li en viktim ki'n ganny senpleman perdi son lavi.

Mr Speaker, pour mwan sa Lalwa i fer 2 keksoz an prensip. I pe met laenn konman en fakter ki agrav okenn lofans ki ganny trouve dan Kod Penal.

E pour bann dimoun ki pa konpran kisisa Kod Penal, Kod Penal se sa liv Lalwa ki ankadre tou bann konportman sosyal ki – konportman anti sosyal plito ki pa merit annan dan sosyete.

E Kod Penal i konmans avek *murder*, avek *manslaughter* avek *incitement*

to violence and disobedience of the law. Lezot ankor plizyer kalite ka *act* anti-sosyal.

Mr Speaker, pour mwan dezyenm keksoz ki sa Lalwa pe fer se ki i pe fer, ki ler ou ensit laenn - akoz dan Lalwa, ler ou ensit vyolans i deza kouver anba Kod Penal. Me ler ou ensit laenn, sa morso pa ti'n ganny kouver.

E ler ou ensit laenn lo en serten group dimoun oubyen en dimoun baze lo bann karakter proteze ki VP in eksplik tre byen, tre kler, i vedir ras, ou lafwa relizye, dezabilite, *sexual orientation*, *gender*, ensidswit, ler ou fer sa, ou kapab komit en lofans ki *punishable by law*.

Mr Speaker, mwan mon pou get sa Lalwa atraver en konteks kot nou konman bann Manm ki la dan sa Lasanble, nou bezwen ede edifye nou pep. E osi mon pe gete sa Lalwa dan en konteks istorikal ki mannyer konportman dan nou sosyete in fer ki ozordi nou annan en tel Lalwa ki'n vin devan nou.

Mr Speaker, premyerman koman nou bann Manm ki dan Lasanble, nou bezwen fer kler poudir dan sa Lalwa li menm, i pa pe anpes okenn *freedom of speech*. Parske anba Lartik 22 parey in ganny dir, 22(1) i dir ou ki tou dimoun i annan son drwa ver son lopinyon, ver en lopinyon,

oubyen pour li resevwar oubyen donn lide e lenformasyon.

I osi kapab fer sa ki egzers son drwa atraver son lopinyon. Me son drwa i ganny restrikte. I annan (a), (b), (c), (d), (e). Bann pwen kot son drwa i ganny restrikte. E enn parmi (b) i koz lo proteksyon e repitasyon lezot. Proteksyon drwa e repitasyon lezot. Drwa liberte e pour en lavi prive, parmi bann responsabilite ki nou devret annan.

Mr Speaker, mon krwar medya osi i devret annan en gran rol pou zwe. Medya i devret kapab osi edik nou pep, montre zot lo zot bann drwa. E *pick up* osi zot responsabilite. Alor, parey bokou in dir; “kot ou drwa i fini, se la kot ki mon drwa i konmans”.

Dezyenm pwen ki mon le aborde se respe. Respe, lanmour e linite. I bann keksoz ki ganny trete dan nou Konstitisyon osi. Annefe preanbil nou Konstitisyon i koz dan en langaz poetik kot ki manner nou bezwen konsernen, ki nou pe viv dan en pei ki pli zoli *au monde* e ki annan tou sa bann kalite karakteristik, melanz diversite ras. Ki fer ki nou en Kreol ozordi. Nou en nasyon melanze.

Avek sa, i promouvwar linite. I promouvwar *l'amour*. E tou sa bann keksoz i bezwen

konmans avek nou bann pti zanfan, pour zot grandi dan en kiltir kot zot annan respe e tolerans pour kanmarad. Kot zot annan osi lanmour pour kanmarad. E dan sa fason, linite i prevnir.

Mr Speaker, nou'n ankouraze pou retir *bullying* atraver bann keksoz ki Minister Ledikasyon pe fer. Nou'n ankouraze avek bokou zefor osi ki Minister Ledikasyon pe fer pou annan en Kod Kondwit, ki aplik bann serten Lalwa, pou anpes ki marmay i servi sa relasyon ki zot annan ek kanmarad pour zot maltret kanmarad lo *Facebook*, ensidswit. Tousala i ganny definir dan zot bann Kod Kondwit.

Mr Speaker, nou'n vwar malerezman kot lager, lensilt i ganny en pti pe glorifye lo *Facebook*. En keksoz ki sagrinan. Ki nou pep i bezwen konpran poudir sa bann keksoz koumsa napa plas dan nou sosyete. Napa plas. I pa anmennen linite.

E mon pe koz koumsa ozordi set aköz mon santi poudir i annan en bezwen pour nou kapab propaz sa mesaz – sa bann bon mesaz linite, lanmour ek respe avek nou pep.

Mr Speaker, malerezman ler nou pe get dan konteks listarik nou pei, nou vwar poudir sa Lalwa in bezwen vin

an egzistans, akòz pou tro bokou letan in annan en kiltir kot bann serten levennman ki anti sosyal ki'n promot la vyolans in ganny normalize atraver menm pli o lofis - se Lofis Prezidansyel, dan lepase Mr Speaker.

MR SPEAKER

Onorab?

HON JOHN HOAREAU

Nou'n tande plizyer fwa...

MR SPEAKER

Onorab, mon pou envit ou pour ou pa al dan en laliny politik dan sa deba. Sa size i vremen tre enportan.

(Interruption)

HON JOHN HOAREAU

Mr Speaker, mon le zis senpleman montre ki konteks sosyal...

MR SPEAKER

Silvouple, atann mwan en pti moman.

MR SPEAKER

Atann mwan en pti moman Onorab. Onorab Pillay, i pa akseptab ki ler mon pe koze ou, ou kriye e ou fer en komanter. Silvouple - silvouple, obzerv lord dan Lasanble.

HON SEBASTIEN PILLAY

(Off-Mic)

Mon annan en *point of order* Mr Speaker.

MR SPEAKER

Point of order? Mon a les Onorab Hoareau fini apre mon a pran ou *point of order*. Onorab Hoareau silvouple e tou lezot Manm. Annou gard sa deba lo ton ki in konmanse san ki nou al dan en laliny kot nou pe met en politik kont lot. Mersi.

HON JOHN HOAREAU

Wi Mr Speaker. Mon ti pe senpleman montre dan en konteks istorik, dan en konteks sosyal ki fason in ganny orkestre. Aprezan in vin en fason si ou le kot dimoun in santi li normalize pou kapab servi serten fason *hate speech* pour ensilte zot prosen.

Mr Speaker nou'n tande dan serten diskour kot nou'n tann dir ki sa ki mor vitman pa nou lafot. Sa ki mor dousman se pa nou lafot. Nou'n tande dan serten diskour, kot serten nonm dimoun in ganny liste ki'n ganny apele lennmi la revolisyon. E alor, sa in ede pou ensit vyolans.

E pli tar ki nou'n vwar? Serten dimoun in disparet. Serten dimoun in ganny torture. E serten in ganny menm met dan prizon. Serten in perdi zot lavi.

Menm i annan serten politisyen ki pe aspire pou antre dan lofis, ki nou'n tann li dir ki; “si ou pa kontan mon prensip, ou fanmir pou war ou anba en pon”.

(Interruption)

HON JOHN HOAREAU

Mr Speaker, tousala i montre nou ki nivo dan nou sosyete sa *hate speech* in arive; ki nivo laenn ek vanzans in arive.

Mr Speaker, ler en Dirizan ki dan en lofis tre o i fer oubyen ki dan en serten pozisyon politik i fer en serten alegasyon, pour mwan i fer ki dimoun ki pe swivre li i osi annan sa tandans pou koz dan menm langaz.

Nou'n vwar par egzanp Onorab Zialor e menm koz lo la ler in fer son *speech*. Kot ler in koze pandan Leta Lanasyon, in ganny dir poudir, “i bon pran son bekir, bat li avek e kas son ledan!” Tousala, kote nou pe ale avek bann kalite parol koumsa? Alor, pou retir sa bann kalite konportman dan sosyete, i nesaser pou annan serten Lalwa pou kapab redres sa bann keksoz.

Mr Speaker, mon santi ki sa Lalwa, menm si in vin en pe tar, me selman mon kontan ki in arive ozordi ki en dimoun i a bezwen pans 2 fwa avan i asasin karakter son prosen. E

i ava mazin osi de fwa avan ki i fer serten alegasyon ki a en move fwa lo medya sosyal.

Mr Speaker, avek sa mon pou remersi ou e mon pou siport sa Lalwa aköz i enn ki pe al dan bon direksyon. I enn ki mon santi i pou anmenn serten redresman dan serten konportman. Mersi.

MR SPEAKER

Mersi Onorab. Mon a pran ou *point of order* Onorab Pillay?

HON SEBASTIEN PILLAY

Mersi Mr Speaker. Mr Speaker, Order 8 i prekoniz ou ki gard *decorum* e ki gide ki mannyer Lasanble i ganny *run*. Petet ou'n angase avek mon langwas ler i annan 2 diskour ki'n ganny fer.

Premye diskour ti konsern lefe ki nou annan en group zanfandan dan galeri e serten komanter ki ti pe ganny fer pour mwan pa ti apropiye, anvi ki sak paran i annan en letan ki li i edik son zanfandan lo sa bann size. Mon met sa lo rikord Lasanble.

Dezyenmman, an relasyon avek *ruling* ki ou fek donner. Ou'n donn en *ruling*. Onorab in kontinyen in fer son bann komanter politik. Mon problem mwan se ki apre ler mon kote prezan pou resiprok sa bann komanter politik, la nou, nou pou ganny penalize.

So, mon ti a kontan klarifye avek ou, i annan serten *statement* ki'n ganny fer par plizyer Dirizan politik ki ozordi nou lo sa kote latab nou, nou pe ganny blanmen. E sa bann menm *statement* pe menm ganny fer dan Lasanble par bann dimoun lo lot kote latab.

Eski nou prezan nou pa pou kapab servi sa bann *statement* akoz i politik? Mon ti a kontan ki ou egzers menm *leniency* ki ou'n donn li, avek mon kote latab pou les nou osi fer nou pwen an relasyon avek sa Prozedlwa.

MR SPEAKER

Mersi Onorab. Bon, lo ou 2 komanter. Premye, mon enterpret sa ki ou ti pe fer referans avek serten komanter Onorab Labonte.

Mon pa vreman pran kont dimoun ki dan galeri. I vre zot la dan Galeri ek zot *leader*. Me selman sa ki nou bezwen konsidere se piblik an zeneral.

Sa bann marmay ti kapab dan nenport landrwa. Zot ti kapab dan lakour. Zot ti kapab pe ekoute. Sa ki nou bezwen...

(Interruption)

MR SPEAKER

... sa ki nou bezwen gete si sa komanter i apropiye pou

ganny fer dan Lasanble anver piblik. E mon santi ki sa ki Onorab Labonte in dir i vreman enplike dan sa ki sa Lalwa i dir. Alor, mon pa pe obzekte kont sa.

Lo size politik, mon fer en lapel ankor ki annou pa fer sa vin en lakizasyon politik, en kote kont lot. Mon santi ki Onorab Hoareau in amenaz en pe son parol e mon krwar in ekout mwan.

E la i - ki mannyer i soz, mon pa krwar poudir sa i devret vin en lensidan kot nou remont lo bann lakizasyon kont kanmarad; kont en parti oubyen lot. Mersi, Onorab Esparon ou annan laparol.

HON REGINA ESPARON

Mersi Mr Speaker. Bonzour Vis-Prezidan avek ou asistan. E bonzour osi bann zanfan ki dan Galeri. Tou dimoun a lekout.

Mr Speaker, permet mwan dir 2 mo pou siport sa lamannman ki pe ganny fer dan Kod Penal. Akoz i enn ki tre enportan. Sirtou dan sa *monde* nimerik e modern ki nou pe viv ladan. En lamannman Mr Speaker, ki pou fer ki apre ki nou'n aprouv *hate speech* – apre ki nou'n aprouve, *hate speech* pou ganny konsidere en akt kriminel.

An term lo Kreol, sa lamannman pou fer ki i pou

vin en lofans kriminel ler en dimoun i maltret en lot. Denigre li pli ba ki later parey Kreol pou dir, zis aköz i pa kontan sa dimoun personnelman.

MR SPEAKER

Eskiz mwan. Onorab, mon pa anvü enterpret Lalwa oubyen soz...Selman mon pe fer sa komanter pour tou dimoun, en.

Hate speech, i pa savedir aköz ou pa kontan en dimoun personnelman, i aköz sa mekontantman oubyen sa laenn parey in ganny dir, i vize ver sa dimoun konman manm en group. *Ok?* Annou ganny byen sa.

Se savedir sa Lalwa - e *VP* i a kapab siport mwan, i pa savedir – i pa savedir ou pa kontan en dimoun, e swa ou zour li oubyen ou soz. I aköz ou ensilte li oubyen maltret li, konman manm enn sa bann group ki'n ganny nonmen. Onorab, mersi, mon a envit ou kontinyen avek ou -

HON REGINA ESPARON

Mersi Mr Speaker. Swa i pa kontan fason fer, oubyen i pa kontan son frekantasyon e afilyasyon, ki swa son afilyasyon relizyez, politik, ou menm son loriyantasyon seksyel sa lot dimoun. Oubyen bann lezot fakter karakteristik personnel, ki dapre son

krwayans napa plas dan sosyete, oubyen ki i pa dan son faver.

An plis ki sa Mr Speaker, sa lamannman pe reflekte sa sosyete modern e realite modern ozordi. Sirtou avek en lemonn ki pe evolye, kot teknolozi in vin a laporte tou dimoun ki anvü servi, i pli evidan de zour an zour ki bokou dimoun pe servi sa bann diferan platform nimerik ki sipoze en mwayen kominikasyon pli vit e efektif antre zot, pou osi ganny akse ek lenformasyon vitman ; *en d'autres mots* "fasilit lavi."

Ki nou war prezan Mr Speaker? Sa ki ti sipoze en bon keksoz ozordi, in pran en lot tournir. E pe osi ganny servi par serten endividi ou groupman konman en *platform* pou maltret e denigre kanmarad, atraver bann komanter laenn.

I annan ki maske son idantite anba *Anonymous*. Wi, sa fame *Anonymous* pou kasyet zot pese aköz zot en endividi oubyen en group kapon ki konnen i mal sa ki zot pe fer, e ou dir lo en lot dimoun. Selman zot sel bi se pou denigre e sali repitasyon en lot dimoun malisyezman, ki'n vin zot target.

E i annan lezot ki fer li ouvertman. I tanpi. I santi ki i fyer e konfidan ki li i kapab maltret son prosen, ou lezot

groupman. E pa bliye i annan son groupman ki pou kontan sa kalite keksoz. Bann group i ganny nouri lo mansonz e kalonmni. E zot pou kontinyelman propaz sa partou.

E Mr Speaker, tousala i ganny fer san ki sa dimoun ki pe fer sa *act*, mazine ki kot li son drwa i fini, pour en lot, i konmanse. E sa amannman pe fer zot mazin 2 fwa avan ki zot komet sa *act* malisye ler zot konnen ki zot kapab ganny prosekite.

E souvandfwa sa bann dimoun ki pli feb e vilnerab ki vin viktim, ki sibir son konsekans akoz i pa kapab reponn pour plizyer rezon ou lot. Donk Mr Speaker, sa lamannman ki pe ganny fer dan Kod Penal ozordi, pe anvoy en mesaz kler pou dir ki sa pa normal e *enough is enough*.

Drwa sa enn ki pli feb osi i devret ganny proteze - proteze kont laenn e bann akt malisye. Okenn dimoun ou groupman pa devret ganny dezavantaze e ganny maltrete, zis akoz en lot pa kontan li oubyen i ay li. Parski Bondye in kree sakenn dan son prop fason e nou tou nou egal devan li.

Mr Speaker, sa Lalwa i pa pou zis anpes dimoun komet sa aksyon. Me i pou osi parey en *deterrent* e en *safety net*

pour ki sa viktim omwen i a konnen i kapab al rod en rekour devan lazistis, ler in ganny ase. E i pa zis soufer an silans e les on drwa ganny abize.

Par entrodwir *hate* konman en fakter e definir serten karakteristik ki merit ganny proteze, i pou fer ki nou sistenm penal ganny abilite pou konbat sa lofans ki'n arasinen anba prezidis e *bias*.

Lentrodiksyon e enklizyon *hate speech* konman en lofans spesyal e spesifik, akote bann egzanspyon kler pour laliberte lekspresyon an bonn fwa, tel konman bann travay akademik oubyen enterpretasyon relizye.

Alor i kree en balans e tir en laliny. E an menm tan i respekte laliberte lekspresyon e laliberte artistik. Sa lamannman pa pou vin siprim drwa koze personn. I pou senpleman anpes labi, lensilt e kalonmni kont en lot dimoun ou en group dezavantaze.

Mr Speaker, malgre ki ozordi tou dimoun i annan laliberte lekspresyon depi apre eleksyon 2020. En sanzman ki'n arive anba Gouvernman *LDS* dirize par Ladministrasyon Ramkalawan.

Mr Speaker, kontan pa kontan, se anba sa Ladministrasyon ki dimoun in kapab ganny sa vre laliberte

lekspresyon, kot dimoun i kapab dir sa ki i oule san ganny menase ki i pou trouv li anba en pon oubyen dan en rigol pa pe respire. Zis akoz i pa partaz menm lopinyon oubyen annan menm medyoloji ek en lot.

Se anba sa menm ladministrasyon ki dimoun pa'n war li ganny viktimize akoz son lopinyon politik ou krwayans relizye.

Mr Speaker, bokou bann viktim *hate speech or hate crime*, i bann ki'n ganny kategorize dan group vilnerab ou enferyer dan sosyete. E sa lamannman pe ganny fer pou protez zot.

Ki swa i enn ki ganny kritike akoz i pa dan menm larelizyon ek en lot, swa i pa annan menm panse politik ek sa lot dimoun. Swa son oriyantasyon seksyel pa parey.

Oubyen si i annan serten form dezabilite oubyen in ganny afekte ek serten maladi, ki ganny klasifye konman degoutan e kontazyez parey *HIV/AIDS*. E menm parfwa bann madanm ansent ki kapab vin enn zot viktim laenn.

Mr Speaker, i annan bokou keksoz ki ganny fer atraver rezo sosyal, ki parfwa i met bokou presyon lo bann viktim ki ou vwar zot souvan napa landrwa pou al rod en rekour. Oubyen napa sa

lankadreman legal an plas pou protez zot. E sa lamannman pe fer egzakteman sa.

Sa lamannman i pou moderniz sa kad legal pou adres bann nouvo dimal e ditor ki pe evolue e ki kapab ganny fer e propaze - e realize par medya sosyal. E pou asire ki sa ki koupab e sa ki pe fer li, a rann kont pour son aksyon.

Petet i annan ki ava dir ki i kontansyel. E petet i annan ki ava dir ki sa i deza ganny kouver dan Lalwa kont difamasyon. Mwan mon ava fer zot konpran ki sa ki la i totalman diferan akoz sa eleman anonim.

En d'autres mots, en dimoun ek en diferan karakteristik ki pe ganny menase ou abize verbalman, i kapab ganny kouver anba sa lamannman. Parey pe ganny fer anba Lartik 5 (2) sa Kod Penal. I kapab rod rekour.

E Mr Speaker, Seksyon 89(b)(1) i site ki i pou menm vin en lofans pour en lot dimoun apard sa enn ki'n komet sa lofans dan premye lenstans, pour li osi sa lot dimoun pran par dan sirkil e propaz sa bann mesaz laenn. Ki swa lo en medya sosyal oubyen lo en lartik ekrir ou an parol ki kapab afekte karakter en lot dimoun e groupman, oubyen denigre zot.

Tandis ki 89(b)(2) I koz lo bann lanmann ki kapab ganny aplike si en dimoun i ganny war koupab pe komet sa bann lofans. Alor Mr Speaker, i byen ki Gouvernman in realize ki *hate crime* i egziste e i reel Sesel.

E nou konman bann lezislater, i nou responsabilite pou war e rekonnèt ki nou bezwen fer en sistenm legal pou dil avek sa bann problemm avan i fini ronz nou sosyete.

Akoz pa bliye, *hate crime* i osi annan en lefe negativ lo lasante mantal bann dimoun ou viktim. E parfwa i kapab osi fatal. En size ki nou fek koz lo la letan Onorab Naidu ti anmenn a Mosyon semenn pase.

Alor Mr Speaker, sa lamannman i fer en proteksyon tanzib e ofer en rekour pour sa bann viktim. Fodre pa per. I kler ki bi e ki lobzektif sa *Bill* pou protez Seselwa ki vilnerab. I pa zis pou protez endividi. Me osi groupman, mouvman parmi lezot.

Nou bezwen fer Sesel vin en landrwa pli toleran, kot i annan respe ki pour tou son zanfan. Kot tou son zanfan i a kapab viv dan lape. Avek sa de mo Mr Speaker, mon remerci ou e mon pou lev mon lanmen byen o pou vot pour sa lamannman. Mersi.

MR SPEAKER

Mersi Onorab. Zis pour relevans deba, mon a envit bann *Caucus* la ki nou pe al pran *break*, pou konsider en pti pe egzakteman ki annan dan sa Lalwa.

Bann keksoz parey labi fizik, verbal. I ganny kouver anba lezot Lalwa. Me sa ki la devan nou la se an term sa dimoun i fer par en group - menm lo *hate speech* mon lir i dir "*any person who intends to incite hatred against a person or group of person based on their protected characteristics.*" Savedir sa bann group ki pe...

Mersi bokou pou konsider sa. Ler nou retournen, mon ti a kontan ki bann Manm i deklar zot lentansyon pou adrese aköz i pou neser pour mwan konnen konbyen dimoun ki pou koze. Pa ki mon pe ferm deba. Me pou konnen konbyen pour mwan kapab kalkil letan. Mersi. Nou a pran poz e nou a rebran 11 er.

(BREAK)

MR SPEAKER

Mon ti a kontan ganny non bann Manm ki annan lentansyon entervenir lo deba pour lemoman la. Ou le adrese? Wi?

HON BERNARD GEORGES

Mersi Mr Speaker. Mon ti anviz dir mon annan lentansyon koze. Me mon ti a kontan rezerv akòz *Bill* se mwan ki'n propoz *Bill* bomaten. Mon ti a kontan rezerv mon drwa pou koz en pe pli tar. Mersi.

MR SPEAKER

Napa problem. Mon kapab met ou a lafen san ki soz – e mon kapab fer menm privez pou Leader Lopozisyon si i le. Si ou annan lentansyon koze, ou a koze, apre li i a terminen. So, pour lemoman. *Ok*, mon annan sa bann – mon a konmans avek Onorab Henrie ki ti'n deza lev son lanmen depi avan.

HON GERVAIS HENRIE

Mersi Mr Speaker. Bonzour tou dimoun, espesyalman *panel*. *Welcome VP* e manmzel Marimba.

Mr Speaker, an prenan kont ou gidans avan *break*. E ler mon'n al zwenn bann zanfan ki dan lakoral sorti Roche Caiman, sa group garson ki ti avek nou bomaten, e mon demann zot. Mon dir “zot konpran ki nou pe koz lo la bomaten dan Lasanble?” Laplipar i dir mwan “non, nou pa tro konpran akòz i en pe konplike.”

Alor, mon pa blanm zot. Zot bann marmay ki depi dan lakres ziska P6. Bann lakres pa la ozordi. Me dan P2, P3

koumsa. Alor mon kapab konpran.

Donk i enportan pour bann dimoun ki pe ekoute ozordi, sirtou bann adilt ki pre avek en radyo ouswa avek en televizyon ki nou ganny byen ki nou pe diskite lo size *hate speech*, *hate crime*.

Hate speech ouswa diskour laenn Mr Speaker, i annan en long listwar. Me avek propagasyon kominikasyon nimerik, i vedir ki aprezan i propaz pli lwen e pli vit.

Ki swa an personn ouswa *online* kot bokou nou bann zenn konmela i pas zot letan, laplipar zanfan e osi mon bann zabitan distrik Mont Buxton ki mon reprezant zot isi anndan, pou'n rankontre en konversasyon ki annan laenn ladan a en moman donnen dan zot lavi.

Koman adilt, e dan nou ka Manm Lasanble Nasyonal, ozordi ki pe diskite sa size, i enportan ki nou rekonnet sa e konnen ki nou pou fer ouswa fason nou pou reazir si zanmen nou pou fer fas avek en tel sityasyon.

Donk diskour laenn, mon vwar li konmkwa i kapab ganny dekrir koman en form en dimoun i kominik avek ou. I kapab an ekrir ouswa dan son fason ki i konport son lekor ver ou.

E ler i fer sa, i fer li dan en fason ki i pe atak ouswa diskrimin kont en dimoun ouswa lidantite en group. Akoz sa fason ki i reazir i pe reazir akoz i annan en laenn vizavi zot larelizyon, zot etnisite; dan serten kad nasyonalite, ras sa dimoun, son kouler lapo, son desandans.

Si sa dimoun i annan en dezabilite ou non. I kapab menm laz sa dimoun ouswa son *gender*. Ou loriyantasyon seksyel. Sa bann karakteristik proteze nou apele, i fer en dimoun reazir ver ou avek en laenn akoz sa bann karakteristik.

E diskour laenn Mr Speaker, i pa zis an parol. I kapab ariv, parey mon'n dir, an personn. *Online*. E i kapab ganny eksprimen dan plizyer lezot fason. E se sa alor ki bann zenn par egzanp i konpran sa.

I kapab dan en zimaz. Dan en – marmay i kontan get kartoun. Dan kartoun ou kapab eksprim laenn. Bann zwe, bann *video* konmela ki ganny fer en kantite. Lobze, bann zes, ouswa senbol.

E son lentansyon letan en dimoun i dir ou en parol laenn, se pou provok en repons dan ou. Son lentansyon se provok en reaksyon emosyonnel kot ou a per, ou annan lafreyer.

Be letan ou per, prezan ou war ou dan la detres. Ou izol ou avek lezot. Ou santi ou ganny entimide. Me pli enportan e ki sa Lalwa pe sey adrese, se ki son lentansyon se pou propaz laenn. Menm lensilt, labi avek vyolans kont lezot. E se sa ki i dir non selman endividi. Me en group.

Alor bann dimoun ki fer sa, zot konnen zot akfer zot pe fer sa. Zot annan presi dir en *end game*. Alor sa Prozedlwa ki devan nou ozordi, mon war li pe adres serten size ki a mon avi pa konsern zis nou isi. Me lemonn antye.

Sa bann size se prezidis lofans motive par laenn. E osi laliberte lekspresyon e drwa koze. Akoz i lot kote sa largiman, non? E size osi enportan dan milye sa deba se dinyite imen. Akoz ler ou provok laenn, ou senm laenn kont enn. Ou pe denigre dinyite sa lot ki pe resevwar sa kalite diskour laenn ki ou fer vizavi li.

Donk, avek plis dimoun ki pe sanz zot loriyantasyon seksyel e lidantite zot *gender*, Sesel koman en pei in trouv li neser pou ogmant proteksyon pour sa bann endividi. Nou pa tousel dan sa desizyon.

Wi, in annan e i annan lankourazman sorti kot plizyer lorganizasyon, partikilyerman lo nivo enternasyonal. Bann

aktivis drwa imen. E bann pei zanmi ki'n ankouraz nou dan sa demars.

Avek plis pei partikilyerman lo Kontinan Lafrik ki deplizanpli pe entrodwir bann Lalwa omofobik, nou bezwen debout a lekar e montre poudir nou diferan.

Anfet mon fek pe lir en lartik la bomaten, ti annan en Some ki ti fer *Uganda* kot zot ti pe koz lo promouvwar ouswa proteksyon lafanmir Afriken dan son definisyon tradisyonnèl.

E zot konnen akòz zot pe fer sa. Akòz zot annan en lot semen ki zot pe rantre pou zot atak bann dimoun ki annan en karakteristik proteze ki nou'n koz lo la bomaten. E mon ti kontan poudir Sesel pa ti partisipe dan sa Some, menm si nou ti ganny envite.

Avek prominans litalizasyon rezo sosyal, sirtou avek sa fasilite anonimite. Zot vwar konmela bokou dimoun i poste anba *anonymous post*. I ok mon pou dir. I byen. E fodre ki Sesel koman en Leta i *push back*. Nou *fight back* kont propagasyon, entimidasyon, aksyon vyolan, lensilt, labi avek laenn.

Si nou pou aprouv sa Lalwa ozordi, nou konman en lenstitisyon ki krwar dan laliberte lekspresyon e drwa koze, nou pou pe anvoy en

mesaz kler ki nou kapab annan en lopinyon. Me nou pa bezwen entoleran, abiz lezot, maltret zot pli ba ki later e fer vyolans kont zot.

Nou pou osi pe dir avek tou dimoun ki pe ganny targete par laenn e bann ki temwanyan zot soufrans, ki zot merit annan kouraz e konfidans pou vin devan e raporte.

Mr Speaker, nou'n ariv an 2025. 255 an dan nou listwar, nou pep in sibir diferan form bann lofans motive par prezidis. Ozordi nou bezwen anvoy en mesaz for e kler avek tou viktim, dimoun ki komet sa bann lofans, bann kominote ki pe sibir e soufer an silans, e sosyete an zeneral ki okenn akt prezidis motive par laenn pou ganny trete seryezman e pa pou ganny tolere.

Sa Lalwa atraver Sapit 6(a) e 89B i kriminaliz okenn konportman menasan e abiziv ki annan lentansyon provok laenn kont endividi ki posed ouswa i paret posed serten karakteristik. Ki enkli; kouler lapo, ras, larelizyon, krwayans, lapartenans politik. Ouswa i annan kek dezabilite mantal ou fizik.

Pou fer menas kont okenn endividi an servan labi ek lensilt, i deza ilegal anba Kod Penal. E sa i reste leka anba sa lamannman ozordi, a

leksepsyon ki sa eleman laenn i antre ladan.

Sa nouvo lamannman, i pe enpoz en santans pli sever lo dimoun ki ganny trouve koupab pour en lofans ki ganny konsidere e regarde konman agrave par laenn. *En d'autres mots*; si ou demontre menas kont en dimoun e an menm tan eksprim laenn kont son ras kouler lapo, ouswa etnisite, ou ava pe komet en lofans ki grav.

Mon repete Mr Speaker. Sa Lalwa - e eski in annan serten *malentendu* par piblik Seselwa koman sa in sorti, e zot in annan en persepsyon lo son lentansyon? Me mon ava dir avek bann zabitan Mont Buxton ozordi, ki sa Lalwa pa pe pran ouswa pyetin lo ou drwa lekspresyon. Ouswa pour ou annan en lopinyon ou drwa koze.

Dimoun i touzour annan drwa dir ou en keksoz ki pou ofans ou. Mon kapab dir ou en keksoz ki pou ofans ou. Ofet Sesel, e mon pa konn okenn par dan lemonn kot dimoun i annan drwa pour li pa ganny ofanse.

Pou dimoun ki krwar ki sa Lalwa i en mesanste kont zot, mon rapel ou ki okenn keksoz ki ganny raporte devan Lalwa, i pou bezwen pas en tes admisibilite. Annou apel li koumsa.

Donk en dimoun i fer en rapor. Sa rapor a bezwen al kot Lapolis. Lapolis i ava etidye son validite. Si i al pli devan kot Atorni Zeneral, zot osi zot pou regarde. E devan en Ziz ki ava pran en konsiderasyon.

I pa en Lalwa ki okenn politisyen par egzanp pou kapab e oze servi an bonnavini kont ou. Sa lepok, sa letan in fini *mes chers amis*. Mon sel konsern vizavi sa Prozedlwa, se abilite lapolis pou met li an aplikasyon.

Sertennman, Komisyoner Barbe avek son bann zonm avek fanm dan liniform, pa pou kapab fer lanket dan sak konplent zot pou resevwar.

Ki mannyer lapolis pou annan sifizaman letan pou dil avek nenport konplent, ler zot pe deza annan difikilte reazir ver bann senaryo, osi serye ki lensilt avek menas?

Mon pe dir sa, akoz Mr Speaker? Sesel parey nenport ki landrwa, ou pou kapab ganny enn ouswa 2 endividi ki pou fer bann rapor malisye, bann rapor ensinifyan mon ava apel li, kont en lot dimoun.

E sirtou si i dir in ariv dan en landrwa kot napa laprev pou dir in arive. In ariv an deor laboutik. Be *camera* ti filmen, ti war? I kapab annan sa bann zafer. So tou sa bann *cases* ki vin devan i pou

bezwen bann *alleged cases* ki apre lapolis, Atorni Zeneral e finalman Lakour ava desid lo la.

La ki Bidze pe vini – me selman avan mon al pli lwen. Mon note poudir *VP* in fer nou kler poudir dan bann konteks piblik par egzantp. En diskour ki ganny fer dan piblik. Donk i ava annan bann rikord ki ganny zisteman garde.

La ki Bidze pe vini, ti a byen ki nou konnen mannyer e kwa bann resours adisyonnèl, ki lapolis i ava kapab gannyan pou antreprann sa latas ekstra ki sa Lalwa pou donn li la ozordi, pour li vin efektiv dan lenplimantasyon sa lamannman.

Eski par egzantp nou anvizaze vwar lapolis annan en *Unit* ouswa en *desk* spesifik – en *helpline*, kot bann size *hate speech*, *hate crime* i ava kapab ganny raporte spesifikman? En pe parey i annan bann zafer si krim kont zanfan i annan *Family Unit*. Bann keksoz koumsa. I bann size pour nou reflesir lo la.

An konklizyon Mr Speaker; dan lavi laplipar bann *characteristics* – bann *protected characteristics* en endividi pa li ki'n swazir ouswa demande. Alor ler sa dimoun pe viv parmi nou, i ekspekte ganny trete avek dinyite e respe.

Ou pa kapab *single* li *out* akoz i annan tel etnisite, tel desandans, tel kouler lapo, tel dezabilite. Ou pa kapab *single* li *out*. I annan son dinyite apre tou.

Menm ler i swazir pou viv son lavi en serten fason, nou pa merit menas li avek vyolans e abiz li verbalman ou fizikman akoz son swa. Sa i enn nou bann prensip fondamantal sa kote latab konman en parti liberal.

Kot nou vwar poudir imen - nou krwar imen i lib pou fer son swa. E personn pa merit ganny forse fer en keksoz ki i pa anvi. E pou rapel parol Prezidan Larepiblik, mon pe dir sa pour mwan zisteman rapel nou *Caucus*, nou bann siporter ki pe ekout sa deba bomaten.

Prezidan Ramkalawan, letan nou ti pe zwenn dan en *training* Sanmdi apre midi, i ti dir nou ki “koman bann sporter, aktivis, azan e pli enportan dirizan dan *LDS*, fodre zanmen – mon repete, fodre zanmen nou maltret dimoun akoz – e pli move - non selman maltret zot. Me pli move, akiz zot e agres zot akoz zot bann swa ki zot fer dan lavi. Tel ki zot loriyantasyon seksyel, lapartenans politik e lafwa ki zot swiv.

Savedir, par nou bann lentervansyon lo sa Lalwa Mr Speaker, nou pe donn en

langazman, pou dir nou koman en mouvman politik, nou aksepte en dimoun i pa siport nou. Nou kapab asize koze. Mon pa pou zanmen vin agresiv avek li aköz i pa siport nou parti.

E anfet, ler mon pas dan distrik, koumsa i ete.

Sanmdi in dernyen legzanp. Mon'n asize pour 30 minit avek Mrs Dodin. Nou'n koze, in dir mwan "mon pa siport ou parti. Me sa ki enteresan Gervais, nou pe kapab asize la koze parey 2 Seselwa, 2 zanfan Bondye, 2 imen." Sa ki enportan.

En d'autres mots, LDS i anvi vwar e an faver en Sesel pli toleran. E nou kontinyen travay dir pou fer sa arive. I pa zenn mwan alor ouswa trakas mwan ditou pou siport sa Lalwa.

Akoz parey Lartik 40 nou Konstitisyon i dir nou "I nou devwar konman sitwayen Sesel pou soutenir e defann Konstitisyon ek Lalwa pei." Atraver sa Lalwa, Lartik 22 nou Konstitisyon i reste entak.

Me parey VP Afif in fer nou rapel dan konklizyon son lentrodiksyon lo sa Prozedlwa, e mon site i ti dir "la demokrasi i defann nou drwa laliberte lekspresyon. Me osi nou tou nou bezwen egzers sa drwa dan en fason responsab e respektab. Nou pa merit pe servi sa drwa pou propaz

okenn vyolans, prezidis avek diskriminasyon. Nou annan en devwar respekte dinyite imen avek bann drwa fondamantal." Fen sitasyon.

Mr Speaker, avek sa 100poursan dakor avek ou VP. E alor mon pe dir avek bann dimoun Mont Buxton konman zot MNA, mon pou siport sa Lalwa. Aköz menm ler mon respekte ou drwa koman en endividi pou eksprim ou lekor libreman. Mon osi krwar dan proteksyon bann dimoun avek en karakteristik proteze ki pa merit ganny abize e annan menas avek laenn propaze kont zot. Mersi Mr Speaker.

MR SPEAKER

Mersi Onorab. Mon a donn laparol Onorab Cosgrow.

HON WALLACE COSGROW

Mersi Mr Speaker. Bonzour tou dimoun. Bonzour tou dimoun ki pe ekoute dan lakour. Mr Speaker, mon pou konmans mon lentervansyon avek 2 keksoz ki'n ganny dir lo lot kote latab.

Premyerman atraver ou Mr Speaker, zis dan lentervansyon Onorab Henrie, in refer lo zot konman en parti liberal e zot pa anvi anpes okenn dimoun dir sa ki zot anvi dir. Me mon santi ki poudir sa Lalwa dan en serten lenstans, i fer egzaktman sa

ki lekotrer avek sa ki Onorab Henrie in dir avek nou.

Mon osi anvi fer referans Mr Speaker, avek sa ki Onorab John Hoareau in dir boner an sa ki konsern i kontan ki se parti *LDS* ki'n anmenn sa Lalwa ozordi.

E mwan osi Mr Speaker, mon partaz menm santiman avek li. E mon kontan ki ser parti *LDS* ki'n anmenn sa Lalwa. En parti ki parey son koleg Onorab Henrie in dir, en parti ki liberal, ki ozordi mon santi zot pe siprim drwa lekspresyon sitwayen Seselwa pour en serten degre.

En parti ki ti toultan pres liberal, ki ti toultan pres laliberte lekspresyon, kontrerman avek sa ki zot ti dir avek nou, mon parti, nou parti sa kote latab ki'n swadizan en parti diktater, en parti ki anpes laliberte lekspresyon.

Me ozordi se parti *LDS* ki anmenn en Lalwa dan Lasanble Nasyonal pou siprim a en serten degre laliberte lekspresyon.

Mon met sa koumsa Mr Speaker, bomaten e mon anvi – aköz ler nou ti fer *meeting* avek *Bills Committee*, e ti annan en keksoz ki ti leve. Nou ti fer referans lo sa Lalwa, lo direksyon ki nou, nou pe ale lo sa Lalwa, avek par egzanp, direksyon enn bann pli gran

demokrasi dan lemond ki Lanmerik Mr Speaker.

E si mon fer referans avek premye – sa ki nou apel *First Amendment of The Bill of Rights*. Lanmerik in pran en laliny konpletman diferan avek sa ki pour nou. Sa ki nou, nou pe fer. E mwan mon ti demann sa kestyon aköz ki nou pa al plis ver pozisyon Lanmerik? Plis ver *freedom* pou eksprim ou lekor?

Lanmerik i fer sa preski 100poursan Mr Speaker, aköz i dir ou ni menm Kongre pa kapab pas en Lalwa, ki pou anpes en dimoun eksprim son lekor dan drwa lekspresyon. Savedir napa okenn Lalwa. Sa i ganny garanti dan zot Konstitisyon.

E napa ni menm Kongre. Personn, okenn Manm Lasanble. Okenn Manm Kongre pa kapab anmenn en Lalwa ki pou anpes en dimoun eksprim son lekor Mr Speaker.

Be par kont Mr Speaker, nou ozordi avek sa Lalwa, nou pe met serten kondisyon lo ki mannyer en Seselwa i eksprim son lekor. E se pour sa rezon ki ozordi e letan ki sa Lalwa ti'n ganny gazete, letan ki piblik ti'n ganny fer konpran ki poudir ti annan tel Lalwa ki pe vini, ti annan en kantite mekontantman ouswa mirmire deor. Menm lo *social media* – medya sosyal, kot dimoun ti pe konmans fer

bann lopinyon an relasyon avek ki pou arive avek zot drwa.

Be sa bann lopinyon Mr Speaker, mon bezwen fer resorti ki poudir i pa ti bann lopinyon vize ver sa Lalwa an zeneral. Akoz mon asire ki mazorite Seselwa ozordi la deor, i konpran ki savedir laenn. Mazorite Seselwa la deor i konpran ki savedir en parol ki ganny dir anver zot ki annan serten laenn ladan.

E mon krwar ki poudir mazorite Seselwa, i pou aksepte, i pou konpran ki poudir ler ou met serten restriksyon lo lafason ki en dimoun i eksprim son lekor anver ou. I normal dan e fason.

Me sa ki mazorite Seselwa, se pa tou Seselwa Mr Speaker, pa pou kontan e pa pou aksepte ler ki pour 30 ekek lannen ou'n pres laliberte lekspresyon, ou menm ou, *or* zot konman en group politisyen zot in pres laliberte lekspresyon Sesel. Zot in pres laliberte lekspresyon. E atraver –

E la Mr Speaker mon pou bezwen antre dan bann keksoz lepase. Atraver par egzanzp zot *mouthpiece* dan Regar ki Mr Speaker ou ti *Editor*, kot in annan bokou bann lapres laenn. Letan ki nou asiz dan keson en *pick-up* e nou pres

laenn ver en Sef Ziz. Enn bann Sef, bann lebra Leta Seselwa.

Ler ki nou debout *or* nou sorti dan en Lasanble Nasyonal Mr Speaker, nou tap en koleg. Sa se bann lenstans kot i annan laenn Mr Speaker. E se laenn ki'n ganny anmennen pandan tou sa letan ki ozordi parti liberal lot kote latab pe sey rod en fason ki mannyer prezan pour zot pa rekolte sa ki zot in senmen. I osi senp ki sa Mr Speaker.

Ler mon pou koz lo sa Lalwa, mon pou koz lo 3 keksoz an prensipal. Enn i lo en "*protected characteristics*" e sa se (*g*). Dezyenm i pou lo "*hate crime*" li menm. E trwazyenm i pou lo sa bout *hate speech*.

Si mon kapab konmans lo sa definisyon sa *protected characteristics (g)* ki dan Lalwa i ganny mete konman "*political affiliation*".

Parey mon'n dir taler Mr Speaker, mazorite Seselwa pou napa problem, malgre parfwa dan nou langaz, dan nou fason koze konman Kreol, i annan serten parol ki nou dir ki'n antre dan nou fason koze. Mon pa pe dir i byen. Me selman i annan fason ki nou koze ki pour mazorite Seselwa menm si i pa byen, petet i pou war li en pti pe difisil pou ti dan son fason koze.

Me selman, mon pa pe zistifye sa. Mon pe zis dir ki

pou dir lamazorite sa bann *protected characteristics*, i bann *protected characteristics* ki nou kapab dir; “ok, nou bezwen konman en nasyon pran en desizyon ki i pa antre dan lafason ki nou adres nou prosen. Dan lafason ki nou fer konversasyon ouswa koz avek nou prosen.

Par egzanp ras, ozordi nou konnen kantite bann parol ki ganny dir an relasyon avek ras, ki refer avek ras en dimoun. In ganny nonmen taler. Mon pa pou al antre ladan. Me selman nou menm nou dan nou langaz Kreol nou konnen.

Ou *religious belief*. Larelizyon ki ou, ou *believe* ladan; Ki ou apartenir avek. Dezabilite. Ou loriyantasyon seksyel. Ki mannyer ou idantifye ou lekor. Ozordi i vin en size tre sansib ki mannyer dimoun i idantifye son lekor.

Pour bokou dimoun ki mon kapab dir sa konservativ dan en sans. Pour zot i annan 2 *gender*. Me pour bokou lezot dimoun ozordi, i annan en mouvman *or* i annan serten group dimoun ki pa *believe* ki poudir i annan zis 2 *gender*. I annan lezot ankor ki dimoun i idantifye zot lekor avek. Hence bann diferan mouvman. Par egzanp *LGBTQI*.

So, i annan sa bann *protected characteristic* ki mon krwar petet ti kapab annan

lezot ki ti kapab ganny azoute. Me selman Mr Speaker i annan enn ki mon le santre lo la, e sa se *political affiliation*. E i vedir letan ou en Manm ouswa ou asosye pres avek en parti politik. Ouswa ou montre sipor ouvertman avek en parti politik.

Now Mr Speaker, se sa bout dan sa Lalwa ozordi ki pe fer bokou Seselwa asize, mazin, reflesir e dir; “be, eski ozordi nou nepli kapab koz *or* nou pou nepli kapab montre nou santiman lo en politisyen?

Eski politisyen ozordi zot lapo in vin sitan fen, ki zot bezwen taye protez zot lekor dan en Lalwa, apre ki 30 an zot in asize zot in fer sa ki zot anvi e dir sa ki zot anvi lo dimoun?

Mr Speaker, mwan mon'n en dimoun ki'n pas atraver bokou sa bann lensilt lo *Facebook*, lo medya sosyal partou. Mon fanmir. Tou resaman i annan en zafer ki zot in anvoye anba *Anonymous*. Zot in kraz mwan. Zot in kraz mon fanmir.

Mr Speaker, mwan pour mwan sa bann zafer, ler mon ti antre dan politik an 2015 Mr Speaker, mon ti ekspekte poudir pou annan bann latak pou vini lo mwan e mon ti eksplik mon fanmir. So, pour

mwan sa bann zafer i glise parey delo lo fey sonz.

Me selman Mr Speaker, ozordi mon pa pe dir ki dimoun i bezwen al maltret politisyen parey mwan mon'n ganny maltrete. Me selman nou bezwen kapab, dimoun i bezwen kapab eksprim zot lopinyon lo ki mannyer politisyen ozordi pe diriz son pei.

Si politisyen pe diriz pei mal. Si politisyen pe fer keksoz mal, dimoun i bezwen kapab eksprim son lopinyon libreman san okenn krentif ki demen bomaten masin Gouvernman i kapab vini, aret li, sarz li e met li dan prizon, akoz in eksprim son lekor libreman akoz en politisyen pa kontan.

Alors en bann pledwari ki mon pe fer bomaten Mr Speaker, se ki nou retir sa zafer *political affiliation* konman en *protected characteristic*. I pa ni en keksoz, parey taler Onorab Henrie ti dir.

Mazorite sa bann *protected characteristic* la, i pa bann keksoz ki bann dimoun in ode pou met lo zot. Napa person ki rod dezabilite dan en sans. I arive aksidan parfwa. Napa person ki son ras i ganny definir. In ne ki mannyer li i ete.

So, me politisyen nou swazir pou vin politisyen Mr

Speaker. Nou swazir. Nou swazir pour nou antre dan sa laliny politik e nou bezwen kapab viv avek bann kritik ki vin ver nou.

So pour mwan, mwan mon krwar sa *protected characteristic (g)* pour mwan mon pa krwar i devret en keksoz ki devret antre dan Lalwa. E mon krwar sa i enn bann rezon akoz ki ozordi i annan bokou *rule of law* e bokou Seselwa pe mefye sa Lalwa.

E zot santi ki poudir i en Lalwa ki pe ganny mete senpleman pou protez politisyen. E senpleman pour politisyen kapab pran aksyon avek Seselwa ler zot pe eksprim zot lekor libreman.

Dezyenm keksoz Mr Speaker ki mon anvi koz lo la bomaten i sa eleman *hate crime* dan Lalwa. Annefe pour mwan, parey in ganny dir boner, sa i senpleman en adisyon dan Lalwa ki fer ki tou bann lofans anba Kod Penal pe ganny regarde konman en lofans en *hate crime*.

En lofans – mon pe sey met sa dan en mo Kreol, ki i pa pe vini. Me selman en *hate crime*. I vin en *hate crime* ler ou servi enn sa bann *protected character* – ou ensilte oubyen ou fer en keksoz en dimoun baze lo enn sa bann karakteristik proteze.

E ladan i dir klerman Mr Speaker ki i bezwen annan serten eleman laprev. Me selman mon ti a kontan zis – akoz i annan en laliny vremen, vremen fen dan sa zafer la. Annou pran par egzantp en *protected characteristics*. E mon krwar sa in deza ganny fer resorti. Sa zafer *gender identity*.

Ozordi Mr Speaker, Sesel napa okenn Lalwa – okenn Lalwa ki protez en dimoun ki idantifye son lekor konman en lot sex par egzantp dan bann lezot lenstans, apard sa ki zot pe mete ozordi dan sa Lalwa. Protez li kont en *hate crime*. Protez li kont en *hate speech*.

Me napa okenn Lalwa ki donn – ki pou mars avek sa ki pou donn proteksyon legal, si mon kapab met li koumsa, sa dimoun ki idantifye son lekor konman en lot *gender*.

Now, si demen bomaten – lot fwa mon ti pe get en pti zafer lo *TikTok* la. O kontrer mon'n *share* ek mon bann koleg. Si demen bomaten mon bat avek en dimoun dan en landrwa kot i sipoze dizon en landrwa ki zis zonm ki sipoze frekante.

Annou pran par egzantp en *toilet* kot zis zonm ki sipoze frekant sa *toilet* zonm. E mon war en madanm. En dimoun ki aparet parey en madanm. E mon demann li ki i pe fer la. E li i dir mwan li i en – ki parey

en zonm, *sorry*. E li i dir mwan poudir li i en madanm.

E Mr Speaker, mwan vizibleman ki poudir i en madanm me selman i pe servi kabinen zonm. Si zot konpran ki mon pe dir. E i ariv en sityasyon, en alterkasyon. E demen bomaten i ariv en sityasyon.

Li i anmenn mwan Ankour. Or i anmenn okenn lezot dimoun Ankour pour sa alterkasyon ki'n arive. E i dir mon'n fer en *hate crime* kont li akoz i santi ki poudir i en – sa in ganny proteze konman en karakteristik anba Lalwa.

(Interruption)

HON WALLACE COSGROW

So, mon le zis fer remarke Mr Speaker – non, annou en pti pe pli entelizan la anndan. Annou – annou...

(Interruption)

MR SPEAKER

Ale, kontinyen. Silvouple!

HON WALLACE COSGROW

Ok Mr Speaker, so...

MR SPEAKER

Nou'n ganny – nou'n ganny en bomaten ziska konmela kot tou bann Manm ki'n koze in ganny ekoute.

HON WALLACE COSGROW

Egzakteman.

MR SPEAKER

Annou kontinyen avek sa silvouple. Onorab, kontinyen.

HON WALLACE COSGROW

So, le pwen ki mon pe sey fer Mr Speaker sa bomaten i se ki, *it's a very fine line*. E tan ki ou nou napa bann lezot Lalwa pou protez karakteristik sa dimoun. Par egzanp pou *legally assign* li sa sez ki li i anvi. *Then* sa bout la dan Lalwa i vin en problemn.

E i kapab annan en sitasyon demen bomaten kot en alterkasyon i arive, en krim i arive. E sa dimoun i kapab *claim*. Mon konnen i annan sa bout ki bezwen ganny prouve par levidans.

Me i posib ki demen dimoun i antre dan en batay legal zis aköz i mank serten provizyon an deor dan bann lezot Lalwa pou protez sa dimoun ki krwar i devret ganny proteze pour son karakteristik spesyal. Si zot konpran ki mon pe dir.

Me solman li menm li an term – li menm li an *term hate crime*, mon krwar en dimoun pa devret pe fer okenn krim kont son prosen. Okenn problemn kont son prosen an sa ki konsern sa bann *protected characteristics*. I pa normal.

In annan. In arive. Nou'n war Mr Speaker. In ariv lo pli o

nivo. Parey mon'n fer sorti taler. Si nou pe konsider politik konman – politisyen konman en *hate crime*.

Nou'n war en dimoun i fer en *statement* politik. Son koleg i sorti an deor Lasanble Nasyonal. I tap li. I fer li al lopital. *Can we consider this as a hate crime?* So, mon pe met sa bann zafer la devan pour zot kapab konpran ki mon pe sey dir.

Eleman Mr Speaker, parey mon'n dir ki bokou kontroversyel e ki ozordi pe fer bokou Seselwa krwar ki poudir sa Lalwa pe ganny anmennen espesyalman pou protez politisyen e pou anpes Seselwa eksprim zot lekor, se sa bout *hate speech* ki dan Lalwa, en. Seksyon 3 ki'n ganny entrodwir lo *hate speech*.

Now, Mr Speaker, ozordi parey mon'n dir bomaten, parti ki apel zot lekor liberal e ki pres lekspresyon lapres, lekspresyon sa ki nou apel *freedom of expression*, i anmenn en Lalwa pou kontrol lekspresyon.

Parti Mr Speaker, ki'n pour bokou lannen asize dan bann *rally*, dan bann *pick-up*. Pres bokou parol *hate* par bann *Leaders* Mr Speaker. Bann parol ki ensit vyolans. Bann parol ki dir “sa ki mon pou fer avek ou”. Zot in asize zot in debout lo bann podyonm

Mr Speaker. Zot in ensit vyolans. “Pile, pile, pil lo li!”.

Ozordi Mr Speaker, zot santi mon krwar zot per kwa ki zot pou rekolte. Zot vin avek en Lalwa pou anpes dimoun kapab dir sa ki zot santi lo politisyen.

Dan li menm Mr Speaker parey mon'n dir, i annan serten *behaviour* ozordi dan nou sosyete ki pa akseptab. Ki mon krwar nou devret pe anpese, nou devret pe – nou pa devret pe kontinyen sa bann kalite fason koze. Lafason ki nou adres nou prosen. Me selman, annou pa vin tro *protective* anver serten –

E la mon pe *single out* politisyen, en. Petet zot ava war. Petet zot a konpran dan sa ki mon pe dir. Mon pe *single out* politisyen. Annou pa vin tro *protective of* politisyen *on the eve of an election*, kot demen bomaten dimoun pa kapab eksprim zot, dimoun pa kapab koze. E si dimoun i koze, lafors Lalwa pou pran en bon ka avek zot.

So, ler mon get sa Mr Speaker, pour mwan i en Lalwa ki merit bokou plis refleksyon. En Lalwa ki devret – dayer nou'n fer en analiz taler nou pe get en Lalwa *Hate Speech* en pei ki preski dir zis 2 paz. Ki mon krwar ti devret annan bokou plis refleksyon. Bokou plis reserse.

E petet gete bann *protected characteristics* ki ti devret kapab antre ladan pou fer li en pe pli konpreansiv. Pou fer li enn ki ler Seselwa i gete i pa war li pe ganny son drwa lekspresyon pe ganny siprimen.

E i ti ava annan plis parey sa ki nou dir, *by in* Lepep ladan. Dan plas ki ozordi nou war bokou Seselwa pe al kont, pe koz kont sa lamannman Lalwa.

Mr Speaker, mwan mon ti ava demann avek Gouvernman e lot kote latap pou reflesir tre byen avan. Akoz sa ki zot pe al fer la i riske kree – mon pa pe ensit naryen.

Me selman i riske kree en sityasyon kot bokou nou bann dimoun, bokou Seselwa pou war li per e pou war li difisil pour li eksprim son lekor. Sirtou anver Mr Speaker, lafason kondwit bann politisyen.

Sirtou bann politisyen ki ozordi i dan Gouvernman. Letan par egzanp politisyen i dir en keksoz. E si li i santi poudir sa keksoz ki politisyen pe dir pa laverite. Souvandfwa i pa pou kapab eksprim li akoz politisyen pou annan en zouti ozordi la ki zot – si zot pase pou fer ki sa bann dimoun i kapab ganny anprizonnen ouswa i kapab ganny en lanmann.

So mwan mon pou dir avek Gouvernman, avek VP, reflesir byen lo sa Lalwa. E mon pa pe – avek sa bann keksoz ki mon'n dir.

Mwan sertennman mon pa pou vot pour sa Lalwa. Pa akoz an zeneral li menm i napa bann bon merit. Be selman akoz mon krwar i annan serten keksoz ki zot pe sey glis anba pou protez serten kategori dimoun. So avek sa Mr Speaker, mon pou aret lanmenm. E parey mon'n dir mon pa pou vot pour sa Lalwa. Mersi.

MR SPEAKER

Mersi Onorab. Mon a donn laparol Onorab Loze.

HON JOHAN LOZE

Mersi Mr Speaker. Mr Speaker, annou konmans premyerman par dir ki Lalwa devan Lasanble la an se moman i en Lalwa Kriminel. I pa en Akt Sivil kot 2 parti ki'n ganny en alterkasyon. In ganny en sanmayman. Zot al devan Lakour zot al rezourd sa amikableman antre zot. Lalwa i en Lalwa Kriminel kot Leta i antre ladan avek tou lafors e mwayen Leta.

Mr Speaker, lot keksoz ki bezwen ganny dir se; sa Lalwa i annan 2 porsyon ladan - *Hate crime* avek *hate speech*. E en keksoz ki bezwen ganny korize sa ki'n ganny dir bomaten par

en Onorab. *Hate crime speech*. Mon pa krwar i annan en tel keksoz dan Lalwa devan nou.

So prezan ki nou pran? Annou pran sa bout *hate crime* dabor. In liste ou en seri karakteristik proteze. Apre i dir ou poudir i annan bann parol ki ou kapab dir swivan en akt kriminel ki dan Kod Penal, ki ganny konsidere konman agravan.

I pa fer ou aksyon pli grav. Be i fer ou lofans ki ou komet pli grav. Sa bout agravan la i agrav ou lofans. So, *so far* mon pa war naryen mal avek sa mwan. Be si mon pou pran legzanp ki'n komans avek par Onorab Bistoquet *ce matin* - sa *video* ki pe sirkile. E la i annan en keksoz ki posibleman – mon ti a kontan si Onorab Georges ti a kapab eklersi pli tar pou servi sa zoli mo ki mon'n tann Onorab John Hoareau in servi taler, pou edifye dimoun ki pe ekoute.

Sa msye ki'n menas Mr Reginald, in komans par dir li - mon krwar in dekrir son karakteristik apre in dir li; “fodre ou mor” ouswa “touye” *or something*.

Prezan mon ti a kontan petet si Onorab Georges i kapab ouswa i anvi petet eklersi dimoun poudir, si la deza la, eski la zis sa premye bout kot ou'n dir li “ou tel en

tel en tel ou'n fer tel keksoz, foudre touy ou”.

Eski deza la i annan en krim anba *Penal Code* ki'n fini ganny agrave? Zis par sa premye bout la. Son dezyenm bout kot in tir en zouti ki ti *conceal* lo son person e menase. E ankòr son menas in vin avek bann parol posiblemman agravan.

So prezan sa ki mon ti a kontan konnen se ki; si la i annan en dezyenm lofans ankòr ki'n ganny agrave ankòr par lafason ki'n dekrir karakteristik sa msye swivan son aksyon?

Rezon ki mon pe al la. I annan dimoun deor pou krwar ki sa ki ganny agrave se ki mon dir ou en tel ou tel keksoz. Apre mon tap ou. Ouswa si sa msye ti'n dir sa, apre i ti'n pran sa koute. I ti'n *follow up* ek son aksyon lo Mr Reginald.

Be, petet i bezwen ganny etabli byen dan lespri dimoun poudir sa sityasyon la i bokou pli grav ki sa. Annou – nou tou nou'n ganny en bagar. Nou tou nou ganny alterkasyon. Nou tou nou ganny sanmayman dan lavi. Annou veye ki nou dir an relasyon avek en lot letan nou dan en sityasyon bagar.

Prezan i annan en lot bout la ki – petet nou bezwen kalkil en pe. Be selman sa ki mon kontan lo sa enn la, “*Hate crime*” i dir ou “*is proved that*

the offence is aggravated.” I annan sa mo “*proof*” la. E mon tous lo la akòz pli tar letan nou al lo *hate speech*, mon pou tous lo en lot keksoz ki mon santi i devret ganny eklersi.

Lot form; “*the victim’s protected characteristics or presumed protected characteristics.*” Prezan la, i eklersi ou zis apre. Dan (5) i dir ou koumsa; “*For the purpose of subsection (2)(a), “presumed” means presumed by the offender.*”

En lot keksoz ki dimoun pou bezwen *careful* ek sa Lalwa. Si ou, ou vini avek *full* konviksyon ki entel i koumsa, e ou maltret li ou dir li se si, se la, ou fer en aksyon menasan lo li an servan sa bann parol la ki agravan vizavi sa karakteristik ki ou, ou pe *presume* i annan, i paret ki devan Lalwa *it doesn’t really matter* si sa dimoun pa koumsa.

Si sa dimoun pa koumsa, i pa pou servi konman en defans pour ou. Akòz Lalwa i kler la li. Ou ou'n *presume* poudir sa dimoun i koumsa. Prezan, sa ki ou'n fer, aksyon ki'n swiv, i ganny *aggravated* par lefe ki ou, ou preanpsyon in fer ou dir li serten keksoz. So, mon krwar la nou pou bezwen en pe *careful* konman en sosyete *going forward* avek sa Lalwa ki la.

Akoz, konman en pep nou annan nou fason. Nou annan nou keksoz ki nou dir. Nou annan nou parol ki nou abitye servi. I annan parol ki dan parlans komen, i dan - toulezour nou dir. E i pa neserman vadir ki nou annan en move lentansyon ouswa – Be, Lalwa i la.

Be, de lot kote prezan, boner nou'n tann dimoun ki'n kit Sesel. Be dimoun lontan pe kit Sesel selman, en? Dimoun pe kit Sesel depi lontan. I annan aköz lofans ki'n ganny komet kont zot aköz serten sa bann karakteristik ki la.

E la mon pa pe koz (*g*) *political affiliation* la. I annan Seselwa ki'n imigre aköz nou ti dan en sosyete ki ti en fason. E li son bann karakteristik pour li pa ti ganny aksepté, in sorti in ale. In kit pei. In al dan en landrwa kot in santi li i pli akseptab e i pli ganny aksepté. I pli lib.

E se nou sosyete ki'n perdi. Nou nou'n perdi prezans e kontribisyon sa bann dimoun. Alors, mon konpran si i annan serten proteksyon pe vini. E sa i sa ki mon annan pou dir lo sa bout *hate crime*, ki mwan mon napa gran keksoz pour mwan dir lo la.

Si i annan dimoun ki bezwen ganny proteze dan sosyete. Dimoun i bezwen ganny proteze. Ou pa kapab

pa proteze dimoun. E sirtou sa i kler. Parey mon'n dir, i annan sa bout ladan kot i dir ou "*is proved*". I annan bann aksyon kler ki vini e ou konpran.

Selman, en pledwari ki petet mon a lanse mon a met devan, se sa la, dimoun pou bezwen ganny edike sa. Sa zafer *hate crime* la, nou pou bezwen fer parey lavyann torti sa. Nou pou bezwen eksplik marmay dan lekol dan leson *physics*. Aköz sansan i annan en kantite dimoun pou pri dan sa Lalwa ki la.

Parey mon'n dir. Par lafason nou sosyete i été; par nou bann mers e manni ki nou annan. Par nou fason ki'n eksplik nou ki'n kiltirelman akseptab dan nou sosyete depi lannen e lannen. E avek sa Mr Speaker, mon ferm sa bout ki mon ti annan pou dir lo *hate crime*.

Prezan, ler mon fini ek *hate crime*, mon vin lo sa 89(B) la, "*hate speech*", *mmm*. Si mon kapab dekrir sa *hate speech* dan en fraz – e mon pou fer li koumsa. Mon pa le personn ofanse, en.

Zot in senm divan. Aprezan zot oule kontrol tanpet atraver sa Lalwa ki la. Tou sa ki zot in fer pandan 30 an - sa *political discourse* ki zot in anmennen. Lafason ki zot in anmenn serten dimoun, abriti serten lezot. Sa fason ki zot in popilarize dan parlans dyalog

politik komen, ozordi in for pour zot menm zot anmennen. E se sa ki sa Lalwa i devan nou ozordi.

Ou konnen Mr Speaker, 89B.(1) nou konmans ganny problemm lo katriyenm mo. “Any person who intends.” Nou bezwen al prouv son lentansyon la. “Intends to incite hatred against a person or group of persons, based on their protected characteristics.”

Katriyenm mo - “Intends.” Be si sa *intends* ti li tousel la, li i pa ti pou en problemm li. Ou al dan (a) - (1)(a) “communicating, advocating or propagating statements, whether written, spoken, or expressed in any other form, publicly or on an electronic media, that could reasonably be construed.” La ou lot problemm la.

“Reasonably be construed as threatening abusive or insulting.” E nou ava mazin byen ki Onorab Henrie dan son prezantasyon in eksplik nou byen li, poudir sa Lalwa pa pou *serve* konman en nwizans pour personn aköz i pou bezwen pas en tes admisibilite.

Now, be ki mezir sa tes admisibilite? Mezir sa tes i la an nwar e blan dan Lalwa, “reasonably be construed”. Se sa ki taler letan nou ti lo *hate crime* mon'n tous lo sa morso, *proved*. La nou pa pe dan

proved la. La nou dan “reasonably be construed.”

I annan ankor 2 paragraf ki vin apre sa, son bi – “publishing, displaying or distributing any material that could - sounboula i montre son lake ankor la li en, “reasonably be construed as threatening, abusive or insulting.”

Pa fini la li. I annan ankor en paragraf. (c) “behaving in a manner that could – ya, mon krwar zot in guess “reasonably be construed as threatening, abusive or insulting.” E Lalwa pa dir ou lekel ki pou *construe* - *reasonably or otherwise*.

Selman Onorab Henrie li i dir nou ou rapor i bezwen pas en tes admisibilite. Ou tes admisibilite - *reasonably be construed*.

Ou konnen Mr Speaker, letan pli boner mon'n dir zot in senm divan. Aprezan zot oule kontrol la tanpet. Annou pran ki mannyer zot in *build-up* zot popilarite ziska la prezan.

Annou pran ki mannyer en Dirizan ti ganny apele planter pwason. Annou pran lafason ki enn zot sanson popiler ti en *chollary* lo sa lensilt planter pwason. Ti, nou pa plant pwason mon krwar ti enn son refren. Annou port en analiz lo pil lo li si i en veikil lanmour ouswa laenn.

Sa i lafason ki zot, zot in ariv o pouvwar. E se par menm

fason ozordi ki zot pe vwar Seselwa pe graponn zot kot zot ete, pe tir zot o pouvwar. E prezan, zot vin avek sa.

Ou konnen, nou annan nou en teknisyen pe asize o bor Vis-Prezidan. Mon asire si nou ti'n donn li son letan, nou ti'n les li travay lo sa, nou ti pou'n ganny en *tome*. Nou ti pou'n ganny nou en *tome* ki kouver sa size.

Dan plas ou konnen ki nou annan? Nou annan sa bout ki la, i apepre en kar paz. Nou annan sa bout ki la ki *basically* pa ni menm en paz. Apre nou annan sa. En morso lezislasyon ki potansyelman kapab *curtail* laliberte lekspresyon Lepep Seselwa, ozordi pou ganny pase dan 2 paz. E pa ni menm 2 paz.

So la, la kot nou'n arive. E Onorab bomaten in dir nou akoz li. In eksplik nou li. Letan in fini eksplik nou poudir li i ti ganny menase. Zot ti *threaten* pou tap li ek bekir. In dir nou akoz sa li. In dir nou poudir sirtou la ki nou pe al dan en eleksyon. Onorab in dir nou li. La, la rezon ki sa i devan Lasanble ozordi.

(Interruption)

HON JOHAN LOZE

Nou pe al dan en eleksyon. Onorab Naddy Zialor in dir nou. Parol i sape isi anndan.

Nou ekoute. Nou port atansyon nou.

Be mwan mon ganny menase tou lazournen mon akoz politik. Mon ganny akize tou lazournen mwan. Mon'n ganny dir mon pou ganny touye. Zot fer komanter lo mon manman. Zot fer komanter lo mon papa. Zot fer komanter lo mwan. Be mwan i annan en parol toultan mon dir zot mwan. Loze mazanbik epe.

Mr Speaker, zanmen i tann li ler i fer tapaz li. Loze mazanbik epe. Dir sa ki zot oule lo mwan. Mwan ki'n swazir pou antre dan politik. I do not give a *shhhh* lo sa ki zot annan pou dir lo mwan. E tou politisyen ki li i swazir pou met son lekor devan pou antre dan politik i devret devlop li *both* lasazes ek en lezo leren silvouple. Ki ou pa bezwen en Lalwa pou kasyet deryer.

Ou konnen ki nou pe fer nou? Nou pe kree en elit apar. Politisyen li ou pa pou kapab fouy lo kont son fanm, akoz son fanm pa bezwen deklar son *assets*. Petet i a deklar son zanset. Me i pa bezwen deklar son *assets*. So, i apar li.

La nou met en lot *layer* la. Prezan pou fer pli pir. Ki nou fer avek (*g*) pou fer pli pir? Nou lentansyon nou se pou protez politisyen nou. Nou sey konvenk lamas ki sa i pour zot.

Nou dir; “*political affiliation*” means membership, close association or any outward support for a political party.” Manti. Sa la, se pou protez *political masters*. But even though – even though - Sa ler mon'n konmanse mon'n dir sa i en Lalwa Kriminel.

Eski i annan plas dan *political discourse* dan sanmayman, dan lesanz ant 2 sitwayen? Eski i annan plas e lespas pour nou anmenn Leta?

Akoz ler en Lalwa i kriminel. Se Leta ki antre ladan. Ek tou son masin Leta ki annan. Son ACCS. Son AG. Son lapolis. Son *whatever*. Son FIU. Leta en gro masin li. So, dan sanmayman 2 sitwayen, nou bezwen anmenn Leta. Nou pa kapab les sitwayen rezourd zot problem.

Mwan petet mon en *speech maximalist*. Mon en *free speech maximalist*. Mon pa krwar *there's such a thing as hate speech*. Mwan. Mon krwar *there's speech*. Sa i mwan pers – Mr Speaker, (Onorab Larue silvouple?)

Sa i mwan personnelman. Mon pa krwar ki i annan *such a thing as hate speech*. Mon krwar i annan *speech*. Sa ki mwan mon konvenki se ki se lafason ki en dimoun i dir ou en keksoz, prezan ou santi ou ofanse. Ou

santi ou ofanse *and this is construed as hate*.

Prezan, a sak fwa ki en sitwayen i santi li ofanse fas a en keksoz ki en lot dimoun in dir li. Nou anmenn Leta ek son gro baton ek son masin ek tou son keksoz la pou vin regle sanmayman 2 sitwayen. Akoz se sa ki nou pe fer la. Nou pe kriminaliz serten fason koze. Bon, les li arive.

Be prezan, nou pe fer sa. Nou pe kriminaliz *speech* par penn li *hate speech*. Be, akoz politik i ladan li? Si zot le nou sipor, annou amann sa ACG. Tir politik, politisyen. Akoz sa i la pou protez politisyen li. Nou konnen nou. Tir politisyen.

Mwan mon en politisyen mwan. Mon pa santi mon bezwen proteksyon Lalwa. Nou pe amenn en Lalwa la ki pe fer krwar politisyen i en pti *ice cake* lo koltar dan soley midi. Si nou pa vey li i a fonn. Mon pa pou fonn mwan. Loze mazanbik epi li.

Si zot, zot pou fonn, anmenn zot proteksyon dan zot non. Prive e personnel. Pa anmenn sa konman en Lalwa pour Leta. Dir ki zot, zot bezwen ganny proteze. Akoz partou kot zot pase ozordi, dimoun pe zour zot. Dir ki zot, zot bezwen proteksyon legal. Pa vini pou dir afilyasyon politik sepa kisisa. Zot ki bezwen.

Be akoz ou war sa Lalwa manner in ekrir la. Ler ou ariv kot *hate speech*. *Protected characteristic* i ganny nonmen zis en fwa dan sa premye paragraf. Zis la. Ou konnen ki i koz lo la? *Electronic media*. I annan en paragraf la, la lepeser.

Zot konnen akoz zot. Akoz sa la manner in ekrir la, *mmm?* Zot deza annan pouvwar zot. Zot konnen zot annan pouvwar zot parske Antoine Hoareau lo warant ki ti ganny anmennen kot li pou fouy se li ti dir fouy dan lakaz, dan bato, dan bwat, dan sepa kisisa, sezi –

Zot kapab antre sezi zot. Zot kapab fouy lo telefonn dimoun zot. I deza annan pouvwar legal. Be akfer nou bezwen donn Gouvernman en pli gro baton ankor, spesifikman pou protez politisyen? Mon konpran tou sa bann lezot karakteristik mwan.

Onorab Ferrari ler ti dan Lasanble ti annan en parol i ti kontan dir. “Zot pe met lapay dan snak.” War sa (g) la - sa (g) la ki zot in mete “*political affiliation*,” i en lapay dan snak. Vis-Prezidan Afif zot de Prezidan Ramkalawan ler ti dan Lasanble ti annan en parol zot ti kontan dir. “ou'n anvoy en lapo bannann ek nou.”

Sa (g) la, i en lapo bannann. Kwa ki mon pa'n zanmen konpran Vis-Prezidan akoz ou ti sitan per lapo bannann. *I never got it*. Sa lafreyer lapo bannann in drol sa.

Be selman, *anyway*. Pou servi ou lafreyer lapo bannann VP, sa (g) ki zot in mete politisyen la. En lapo bannann. Be zot, zot in *sneak* sa in trankilman zot. Sa pou adres zot bann lafreyer pour zot. Akoz parey mon'n dir zot, menm zouti ki Seselwa ti servi pou met zot o pouvwar, ozordi Seselwa pe servi menm zouti pou derap zot anler laba kot zot ete.

Be ou konnen akoz sa pe mars koumsa? Akoz sa bann dimoun ki zot, zot santi pe *practice hate speech* kont zot, i zot bann siporter sa. I bann dimoun ki zot, zot in *train*. Sa ki maltret zot plis ozordi - mon pou dir zot fran mwan - i pa siporter *United Seychelles* sa. I zot siporter ki'n toultan dan zot parti ki'n ede met zot la.

Ozordi i eksplik zot byen kote zot pider in ale. Lekel ki'n manze. Ozordi i donn zot sa bann leksplikasyon kolore, ou a krwar in penn avek kreyon kouler pti marmay. Be, zot ki'n kree sa sityasyon. Zot bezwen viv avek.

Ou konnen, an terminen mon pou dir zot en keksoz, kot *Maison Du Peuple* nou annan

en larsiv. Nou annan koleksyon Regar avek Vizyon *dating back* depi zot in konman pibliye. Mon kapab al dan larsiv tir tou sa bann lartik laenn ki zot in ekrir, pibliye. E nou tou nou konnen lekel ki ti editer.

Me selman mon pou dir zot mon dernyen parol avan mon ale. Mon pou siport Onorab John Hoareau ler i dir ki sa Lalwa in vin tro tar. Mon agree avek li. Sa Lalwa *Hate Speech* la, in vin tro tar. Si sa Lalwa ti'n vin depi '90, tou Dirizan *SNP* ti pou'n dan prizon aköz *hate speech*. Mersi Mr Speaker.

MR SPEAKER

Mersi Onorab. Mon a donn laparol Onorab Arissol - Sandy.

HON SANDY ARISSOL

Mersi Mr Speaker. Bonn apre midi *VP*, tou dimoun ki a lekout. Mr Speaker, mon krwar Lalwa ki nou diskite ozordi, napa en bout dan sa Lalwa ki anpes personn eksprim zot lekor. I enportan pou dimoun konpran sa.

Letan nou pe diskite sa Lalwa, ou annan dimoun lo rezo sosyal ki pe fer komantr an relasyon avek sa Lalwa. E letan sa Lalwa pou pase, i annan dimoun ki pou kontinyelman eksprim zot

lekor libreman dan nou pei an relasyon avek sa Lalwa.

So napa okenn landrwa dan sa Lalwa ki dir letan sa Lalwa i pase, dimoun pou aret eksprim zot lekor. E sa i ekrir dan nou Konstitisyon kot tou dimoun i annan laliberte lekspresyon ozordi dan nou pei.

E sa ki enportan pou note, laliberte lekspresyon alors en zour pa ti egziste dan nou pei. Fodre dimoun i rapel sa. Pa ti egziste dan nou pei. Parske ozordi sa ki dimoun pe ekrir lo rezo sosyal, si zot ti fer li dan letan '90 - '75, '77, '80 an montan, *probably* zot fanmir pa ti pou konnen kot zot ete. Parske sa sete listwar nou pei.

Ozordi letan nou pe koze la, tou dimoun i lib pou eksprim zot lekor mannyer zot anvi fer li. E nou dan Lasanble Nasyonal sa Lalwa ki nou pe pase. Nou pa pe pas pour bann politisyen sa. Nou pe asir sekirite tou dimoun laba deor an relasyon avek sa ki nou apel *hate speech*.

Akoz mon dir sa? Get ki i dir dan Lalwa. Bann kalite karakteristik ki ganny proteze. Premye Mr Speaker, se; "*race includes colour, descent, ancestry, nationality, citizenship, ethnic or national origin.*"

Annou get ozordi dan bann lekol. Mon a donn

premye legzanp. Ozordi kot tou bann lekol Gouvernman, nou annan nou diferan ansenyan ki vin fer lekol dan nou bann lekol Gouvernman. Diferan lorizin. Diferan kalite zanset. Diferan kalite dimoun an term ras, kiltir, zot vin fer lekol nou zanfan.

Nou, nou kapab pa kontan sa bann ansenyan ki vini. Nou kapab pa ekout zot. Nou kapab pa dezenn avek zot. Nou kapab dan wikenn pa frekant zot. Me, sa ki nou devret pa fer konman en nasyon, konman en pti pei, annou pa menas zot. Annou veye ki nou dir zot. *Ok?*

Parske san, san i vin bann *hate speech* ki kapab fer zot ankoler. I kapab fer zot fer dezord parske zot pou santi zot pa pe ganny proteze. I pou kapab fer zot kit pei ale. E nou zanfan deryer, pa ganny sa lesan ki i pe rode, parske se sa ki nou, ki mwan mon krwar ladan ozordi sa Lalwa pe anmennen. Pour nou protez en kalite group dimoun an relasyon avek sa ki Lalwa pe demande.

E pa bliye dan lekol ozordi Mr Speaker, tou lekol pe fer Kanpanny kont *bullying*. Akoz? Parske nou anvi depi a laz *petite enfance* nou bann zanfan zot ganny elve pour zot kapab respekte lopinyon kalite, ras, kiltir nenport ki endividi san menas li, san kree

bann *hate speech* Mr Speaker, parey Lalwa pe demann nou.

Dezyenmman, i koz lo *religious belief*. Kisisa *religious belief*? Tou dimoun dan pei ozordi zot lib pou zot annan – swiv dan larelizyon. Kontan en larelizyon. Dan mon distrik Bel Ombre mon annan en group dimoun ki apel bann Temwen *Jehovah*. Bann *Jehovah's Witnesses*. Sa bann dimoun la, zot pa vote zot Mr Speaker, parske zot krwayans i fer ki zot pa krwar dan zonn oubyen dan fason ki Gouvernman, zot krwar dan zot Bondye.

Eski sa bann dimoun alor si zot pa vote, zot bezwen pa ganny proteze anba Lalwa? Mon bezwen mont lo rezo sosyal konman en politisyen oubyen konman en endividi maltret zot, ensilte zot, ensit vyolans kont zot - dir ek tou dimoun desann met dife dan zot lakaz? Pa donn zot plas travay? *Bully* zot kot lekol? Eski sa konman en pti pei ki nou anvi?

Non Mr Speaker. Se sa ki Lalwa pe dir ek nou. Se sa ki pe protez serten group dimoun depandan relizyon, depandan ou ras, depandan ou lopinyon politik, depandan ou etnik, depandan ou granmoun. Sa ki Lalwa pe dir ek nou.

Lalwa pa pe dir ek mwan protez mon bann *MNAs* li. I pa pe dir ek mwan protez Minis li.

Me i pe asire ki dan sa travay ki nou pe fer, pour nou asir proteksyon kont tou bann leres dimoun dan nou pei. Parske dan nou pei, pa tou dimoun ki krwar dan nou prensip.

Letan i koz lo *sexual orientation*. Onorab Labonte in donn en legzanp lo la ozordi. Lo *sexual orientation*. Ozordi lemond zot, zot pe adopte en lot kalite fason fer an relasyon avek *sexual orientation*, enkli *gender identity*.

Lemonn pe ale lo la sa ozordi. I annan gran deba lo la ozordi sa. Si ou kontan lekel. E ki ki ou kapab avek. Lekel ki ou anvi reste avek. Lekel ki ou anvi *call* li ou sheri. Lekel ki ou anvi *call* li ou lanmour. Sa i ou sa.

Me selman Mr Speaker, sa ki danzere, se ki nou pa kapab annan en group dimoun ki krwar dan en fason *sexual orientation*, prezan nou ki pa krwar ladan nou vini aswar kot zot lakaz nou menas zot, nou ekrir bann pos lo rezo sosyal kont zot e nou ensit vyolans. Nou demann dimoun pou desann pou fer zot ditor. Sa ki Lalwa pe dir nou.

Epi VP ava eksplik nou. Mwan letan mon'n lir Lalwa, se sa ki mon'n vwar Mr Speaker, parske nou pe protez en lot kalite group dimoun. Me se pour sa rezon mon bann Manm in dir ozordi granmersi

sa Lalwa in ariv la. Parske pour nou sa Lalwa i en nouvo konmansman.

En nouvo konmansman Mr Speaker. Parske sa i fer kot nou'n sorti e kot nou'n arive ozordi. Akoz? Letan mon'n fini "*gender identity*" mon'n ariv lo "*sex characteristics*", i annan anba "*political affiliation*."

Be Mr Speaker, i enportan. Letan Onorab Loze ti pe rod sa tanpet. Ou konnen ki tanpet Onorab Loze ti pe rode letan nou pe koz *political affiliation*? Se sa Rapor *Truth* ki ou biro ti donn nou konman bann Manm. Zot rapel Rapor *Truth*?

(APPLAUSE)

HON SANDY ARISSOL

Mr Speaker, ou konnen ki ti annan dan sa rapor? Dan sa Rapor *Truth* ou konnen ki ti annan? Ti annan bann dimoun ki ti annan diferan lopinyon politik. Zot ti frekant en kalite group dimoun. Zot ti annan diferan sinyatir konpare avek lezot sinyatir. Zot desandans ti sorti dan diferan lorizin konpare ek lezot lorizin.

E sa letan eski zot ti ganny proteze Mr Speaker? Non zot pa ti ganny proteze, parske sa ki ti o pouvwar sa letan ti anvi ki tou dimoun i sport menm parti politik. Fodre zot met menm triko.

Fodre zot frekant menm dimoun. Zot al menm *meeting*. Fodre zot vin dan tou Biro Brans. Fodre zot vin bann sekreter sekter. Fodre zot vin bann veyer zakasyon. Fodre zot vin bann aktivis *US*. Se sa, sa letan ki sa parti politik ti anvi nou fer.

Alor nou ler nou vini, nou dir non. Nou tou nou pa kapab menm kouler dan sa pei. Se pour sa rezon ou annan lanmen drwat, ou annan lanmen gos. Kot lanmen gos pa arive, lanmen drwat i a fer en zefor i ava arive.

Se pour sa rezon nou annan en lipye gos ek en lipye drwat, pour letan ou taye ou pa zig en sel kote oubyen lot kote. Me i donn ou en direksyon pou dir nou annan en balans. *Political affiliation* sa tanpet ki Onorab Loze ti pe rode.

Mr Speaker, si nou get dan rapor, ti annan vyol, disparisyon, entimidasyon, touy nou bann frer. Anter zot. I annan manman ozordi ki'n mor, zanmen in konnen kote son zanfan in antere. Akoz? Parske *political affiliation* Mr Speaker.

Nou pa anvi nou kontinyen viv dan en pei, kot dimoun pa lib pou eksprim zot lekor an relasyon avek zot lopinyon politik. Ou lib pour ou siport ou parti politik! Ou lib pou li met lo rezo sosyal, ou

post profile. Met ou *profile picture*. Met ou portre.

Me pa ensit vyolans. Pa servi rezo sosyal ozordi oubyen okenn lezot magazin pour nou ensit vyolans dan nou pei. Ou konnen akoz Mr Speaker? Nou pou viv dan en sityasyon *Rwanda* kot bann *Hutus* ek bann *Tutsi* zot ti servi radyo nasyonal pour zot tret zot kanmarad konman bann kankrela.

E zot ti demann tou zot bann siporter pour sakenn pran en lafrin, pran en pti lars, pran en gran koute desann e masakre zot lot frer ki pa siport zot, ki pa menm ras avek zot.

Eski bann Seselwa ki pe ekout nou laba deor, eski ozordi dan nou pei apre 2024, sa ki nou anvi dan nou pei? Eski sa ki nou anvi Mr Speaker pour nou pti pei?

Kot ozordi nenport ki endividi i mont lo rezo sosyal e i kapab ensit vyolans kont en lot son frer akoz son lopinyon politik? Oubyen akoz i annan en dezabilite? Oubyen akoz i en Temwen *Jehovah*? Oubyen akoz i siport en lot parti politik? Sa ki nou anvi dan nou pti pei Sesel Mr Speaker? Non. Sa i deryer nou sa.

E ozordi nou Gouvernman, nou bezwen al trouv larzan pour nou pey bann dimoun ki ankor pe esper zot konpansasyon, apre

ki zot ti ganny vyole; fanmir in disparet; bate; entimide, forse pou kit zot pei. Abandonn zot propriyete pour zot al viv aletranze.

E ozordi, sa menm parti politik ki ti fer tousala. Li Mr Speaker, i pe vann bann propriyete li. I pe vann later partou, partou li. Oli sa bann larzan ki zot pe vann later? Donn nou en pti gin.

Donn Gouvernman en pe. Nou a kapab met dan sa Fon an relasyon avek *political affiliation* Mr Speaker, pour nou kapab pey bann dimoun ki pe esper en konpansasyon. Akoz sa letan *political affiliation* pa ti ganny konte. Ou pa ti napa drwa vot en lot parti politik.

Se sa ki Lalwa pe demande mon war mwan. Napa naryen ekstraordiner. Me sa tanpet ki Onorab Loze ti pe rode, se la i la Mr Speaker. Nou dan politik nou konman politisyen, napa naryen ki aplik pour nou sa. Parske ozordi ler ou antre ou antre konman politisyen. Mon'n deza pas atraver sa.

Mon sorti konman en politisyen. Mon retourn en sitwayen ordiner. Be selman sa ki enportan pou note. Ki ou en politisyen. Ki ou en sitwayen ordiner. Lalwa i bezwen aplik pour ou. Swa pour ou ganny zize. Swa pour ou ganny proteze anba Lalwa

parey nenport ki endividi.

Napa Lalwa ki ganny fer pour serten kalite group dimoun Mr Speaker. E mwan mon krwar Lalwa ki devan nou ozordi i pe anmenn nou dan en lot letap. I pe asir proteksyon pour tou kours popilasyon nou pei. E nou, nou pou siporte parske nou krwar dan protez nou pei. Se pour sa rezon nou *motto* sete "Sesel pour tou son zanfan."

Me sa ki danzere Mr Speaker; sa ki danzere, parey Onorab John Hoareau in fer resorti. Se letan ou annan bann *Leaders* i vin devan - bann *Leaders* zot vin devan, ki zot fer Mr Speaker? Zot menas lasosyete. Akoz zot menas lasosyete? Nou'n tande nou. Nou'n tande.

Letan en *Leader* parti politik i vini i dir ek bann dimoun for, ouvertman lo medya. Poudir si zot pa krwar dan nou. Si zot sey bar nou zot pou ganny vwar dan en rigol anba en pon.

Me i vedir kwa Mr Speaker sa? Ki i vedir sa? Eski nou bann zenn ki pe ekoute zot pe reflexir? Nou bann *graduate* ki aletranze, eski zot pe swiv? Nou bann gran dimoun, nou bann vye dimoun ki pe ekoute, eski zot pe swiv sa bann kalite *statement* ki pe ganny fer?

E nou osi bezwen reflexir lekel bann dimoun ki pe fer sa kalite *statement*? Eski bann dimoun ki ti form parti sa parti politik ki'n la, ki pa ti pran kont *political affiliation, sex characteristics, gender equality, sexual orientation, disability, religious belief* avek *race* Mr Speaker. Eski i menm dimoun sa ki pe for parti sa parti politik?

I enportan pour nou reflexir lo la sa. Fodre pa nou per bann spekilasyon ki ganny fer. Zis parey letan nou ti dir dan Lasanble Nasyonal kot solda pou donn en koudmen lapolis, ki nou ti ganny dir? Toulezour pou annan solda lo semen. Toulezour nou pou war solda pe fer patrol.

Nou pa'n vwar Mr Speaker. Sa i bann travay ki nou Gouvernman i kontinyen fer. Konpran? Fodre pa les nou ganny anbete avek bann *statement* ki dimoun zis zot kree avek bi pou fer dimoun per.

Ozordi dan nou pei Mr Speaker, nou bezwen apresye poudir ozordi Sesel i pli lib ki zanmen. Tou dimoun ozordi dan sa pei zot lib pour zot dir sa ki zot anvi. Desann ek plakar. Fer lamars kantmenm avek 4 dimoun. Fer detrwa dimoun danse konman zannimo dan Grand Anse. Desann avek *Tinky Winky* sou kot Lorloz.

Zot lib ozordi pou fer sa Mr Speaker. Zot lib, parske Sesel in pli lib ki zanmen. E se nou lo sa kote latab ki'n anmennen sa laliberte pou dimoun.

Mr Speaker, prezan nou, nou pou retournen konman sa parti liberal pou nou rebran sa dimoun? Non. Nou pa pe rebran naryen nou. Mon repete.

Napa en landrwa dan sa Lalwa ki dir pou dir ler i pase, ou aret ekrir lo rezo sosyal. Ou aret fer ou piblikasyon. Ou aret dir en *request* lo radyo. Ou aret fer ou program lo televizyon. Napa landrwa ki dir sa. Ou lib pou ou fer! Kontinyen fer ou.

Nou sa ki nou pa oule se ensit vyolans, menas personn bann endividi oubyen bann groupman. Ou lib pou siport ou parti politik. E nou Mr Speaker. Pli gran legzanp i nou isi dan Lasanble Nasyonal. Ler nou fini fer sa deba la. Ler mon zwenn zot dan koridor. Bonzour mon frer. Konman sava? Ki rezon? Entel mannyer i sava? Nou kapab koze konman de frer ek ser.

Zis parey Onorab Henrie in servi legzanp sa dimoun dan son distrik. Se tou ki nou anvi pour nou pei nou. Nou pa oule ankor sa bann zafer 'si i pa siport nou, fer sir i pa manze.' Si i pa vot pour nou, fer sir i pa viv.' "si i pa siport

nou fanmir, fer sir pa viv Sesel.” Nou pa oule sa Mr Speaker, nou pa oule.

Dan mon distrik mon annan dimoun ki pa'n vot pour mwan. Dan tou eleksyon – annou pran en legzanp. Dan tou eleksyon i annan 3 rezilta. Premye rezilta se bann dimoun ki vot pour zot lekor. Zot vini zot met en *x* zot met en *y*. oubyen zot fer nenport ki keksoz e sa i ganny konte konman en vot gate.

Apre ou annan dezyenm, rezilta. Se sa opanan ki'n debout kont ou i ganny son *score*. Apre dernyen *score* i vin pour sa enn ki gannyen, parey Bel Ombre. 3. E nou letan nou fer sa. Nou al rode lekel sa bann dimoun ki'n gat son vot? Rode akoz li i pa'n vot pour mwan? Non. Sa i son swa e i lib pour li fer sa! Dan sa eleksyon ki pe vini, nou pou bat zot fermal ankor! Sa zot konnen sa! Sa zot konnen.

(APPLAUSE)

HON SANDY ARISSOL

Sa zot konn tre byen sa. Nou pou bat zot fermal. Pli fermal ki zanmen! Alor, zot vini zot dir ek nou “ou konnen, nou pe sey fer sa pour nou. nou pe soz - sa.”

Mr Speaker, zot konnen zot. E Sekreter Zeneral Parti US in dir nou li. Poudir zot bezwen fer 3 *round*, 4 *round*

dan menm distrik. Nou, nou pa pe fer 3 *round*, 4 *round* dan menm distrik nou. Nou, nou pe asire ki tou bann distrik i ganny kouver parey tou parti politik.

E ou konnen kwa ki pli fermal? Letan Onorab Gill i vini dan enn son *speech* dan nou Lasanble Nasyonal, i dir “letan bann US i pas kot zot fer zot foulkan!” Ekout sa kalite parol. Ekout sa kalite parol.

(Interruption)

HON SANDY ARISSOL

Me par kont ou konnen ki nou, nou dir ek nou dimoun. Non, met zot asize. Koz ek zot. Demann zot kekyon. Demann zot, zot program. Parske sa ki nou, nou krwar ladan, pour ki sa dimoun i kapab reflexir, fer son nide, analize e pran li en bon desizyon letan i annan vot.

Pa pous personn. Pa bon sa, parske ou pa zanmen konnen demen kote ou, ou tonbe. Parske dan nou pti Sesel nou tou nou bezwen kanmarad konman frer ek ser. Nou annan nou lopinyon politik. Nou annan nou lopinyon relizyez. Nou annan nou lopinyon etnik desandans kot nou sorti. Nou annan nou lopinyon si ou annan en zanfan ki annan en dezabilite oubyen en zanmi dezabilite.

Nou tou nou parey bann frer ek ser.

A lafen dizour dan wikenn, sakenn in eparpiye. Be Lendi nou tou nou bezwen retourn dan menm biro pour nou al travay. Dimans ek Sanmdi nou retourn dan menm legliz pour nou al priye. Sa ki *LDS* nou krwar ladan. Nou pa krwar dan divizyon.

Se pour sa rezon nou pe anmenn sa Lalwa Mr Speaker, parske nou anvi ki nou pti pei Sesel i inifye son lekor dan tou kote, dan tou kours nou sosyete. Pa les naryen diviz nou e pa les naryen kit nou an retar *anymore*.

E mwan mon krwar dimoun Bel Ombre ki pe ekoute zot konpran sa, parske rezilta ki mon'n gannyen apre vizit ki *US* in fer Bel Ombre e dan tou bann lezot distrik, dimoun pe swiv ki pe arive dan son pei. Dimoun pe ekoute e dimoun pe ekout byen lekel ki zot pe mete konman zot kandida prezidansyel. Parske sa i enportan. Parske nou bezwen vey bann parol ki zot dir.

Mon repete; si ou pa kontan, ou pe sey bar nou, ou pou ganny vwar dan en rigol anba en pon! Ki pa bon pour nou pti pei Mr Speaker. Pa bon, parske sa nou'n met laba deryer nou. E sa parol se ti ganny dir par Prezidan Parti *US* ki zot, zot krwar ladan.

Be nou, nou pa krwar ladan. Nou, nou krwar dan en Sesel pour tou son zanfan, kot nou inifye, nou viv dan lape e dan lanmour pour nou pti pei Mr Speaker. Mon ava aret la pour lemoman. Mersi bokou.

(APPLAUSE)

MR SPEAKER

Mersi Onorab. Bon, mon krwar nou ava aret la pour bomaten. I ariv ler kot nou abitye pran poz.

Akoz nou annan miting *Assembly Business Committee* ki nou'n fer – ki pe pran nou en pe letan konmela. Nou a retourn dan lasal 2 er 15. Mersi.

(BREAK)

MR SPEAKER

Nou a re pran lo deba. Mon annan 3 Manm ki lo mon lalis apard Onorab Georges. Mon ti a kontan konfirmen e ferm mon lalis la ; mon annan pour le moman Onorab Aglae, Onorab Gill e Onorab Georges e Onorab Larue. So Onorab Georges ou pe konfirmen ? *Ok* ou pou pran laparol? Onorab Pillay pa la i pa ankor konfirm son non.

So *ok* bann Manm ki pou koze prezan e mon ase rekonforte ki se bann Manm ki'n lev zot lanmenm lo

deryen so mon pou met en limit 15 minit pour fer sir ki nou annan letan pou fini sa *Bill* ozordi, *ok*.

HON AUDREY VIDOT

Mr Speaker, mon ti le zis averti ou ki Onorab Aglae apard ki *meeting* pour *HIV* in *attend ABC*, so i pe ganny en pti retar selman i pe vini.

MR SPEAKER

Wi Onorab Aglae ti dan *ABC* ki nou fek fini 10 minit pase apepre so mon ava eskiz li nou a konmans avek lezot mon a permet li. Onorab Pillay, mon pe ferm lalis entervenans zis pou evit konfizyon ou pan ankor lev ou lanmen mon pa ankor met ou non- *sorry*? Ou'n lev lanmen mon pa ankor war ou lev ou lanmen *ok, alright*.

Pou evit okenn konfizyon *ok* mon le osi anonse ki bann Manm ki pe al koze pou ganny 15 minit. Onorab Gill mon a donn ou laparol.

HON CHURCHILL GILL

Mersi Mr Speaker. Bonn apre midi *panel* e tou dimoun a lekout. Mr Speaker, i enportan annan serten kestyon tre fondamantal ki devret ganny demande ki vre lentansyon sa Prozedlwa pour vin la. Akoz pouse pour en tel Prozedlwa ganny debat ozordi. Eski ozordi sa bann diferan

lesplikasyon dan sa Prozedlwa i vre rezon en tel Prozedlwa?

Eski bann aksyon ki'n ganny fer dan lefase pe ozordi konfront nou lo en baz nasyonal? Eski bann dimoun ki'n fer bann gran lensilt piblik kont plizyer dimoun zot pou vin devan pou prezant zot leskiz? Oubyen prezant zot *apology* ek sa bann dimoun ki ti ganny denigre dan piblik? Si vreman sa Prozedlwa pe ganny anmennen dan bonn fwa en tel zes ti pou fer bokou zistis.

Mr Speaker, vi ki bokou Manm in koz fortman lo lezot *clause* zot in donn plizyer lesplikasyon dapre zot konprenezon lo ek sa Prozedlwa mon pou santre mon lentervansyon lo *clause 89(b)* ki kler ki annan lezot motiv non pa zis sa ki pe ganny dir ozordi.

En tel *clause* dan sa Prozedlwa konsernan *hate speech* i varye dan en fason tre signifikan dan diferan pei otour lemonn. Par egzanp Lanmerik i pa vreman annan en definisyon legal pour *hate speech*, me selman serten kalite *speech* parey parol vilger oubyen *speech* ki ensit vyolans, i pa neserman ganny proteze.

En kantite pei Eropen zot annan Prozedlwa ki kriminaliz *hate speech*. Par egzanp Prozedlwa Lalmanny i anpese ensit lensilt kont

serten kours popilasyon, Lafrans osi i annan Lalwa tre strik kont *hate speech* enkli penalti pou ensilte piblik baze lo ras, relizyon e eknisite. *Canada Lalwa Human Rights Act* i osi adres *hate speech* dan konteks pratik diskriminatwar. Lostrali i annan Prozedlwa kont *hate speech* lo nivo federal e nivo Leta.

Prozedlwa diskriminasyon rasyal i anpes konportman latitud ofansif baze lo ras. Serten Leta zot annan proteksyon adisyonnèl kont *hate speech* an relasyon avek larelizyon, loryantasyon seksyel e lezot karakteristik ankor. Langleter par kont i annan plizyer Lalwa ki adres sa size *hate speech* enkli zot *Public Act- Public Order Act* ki kriminaliz *speech* ki ensit diskriminasyon ras e larelizyon.

Dan *Communication Act* i osi kouver *hate speech online* sa ban diferan Prozedlwa se pou kre en balans ant proteksyon *free speech* e nesesite pou anpes difamasyon koze par *hate speech*. Sertenman sa bann diferan Prozedlwa se pou defann proteksyon *hate speech*. I tre enportan ki bokou plis lanfaz e lenportans i ganny mete lo *free speech* menm parey ki nou pe ozordi met lanfaz lo *hate speech*

sirtou dan bann demokrasi modern, menm ler i enkli kontroversyal oubyen bann statement ofansif.

Mr Speaker, prezan mon le adres sa pilye fondamantal lo demokrasi ki apel *free speech- freedom of speech*. En bon valer prezerve dan nou konstitisyon sa fondasyon solid ki nou sosyete in ganny konstri lo la. I sa vre valer nou demokrasi ki permet bann bon lesanz nide kestyonn lotorite e pli enportan ankor se proteksyon lopinyon minoriter.

Tou resaman in annan gran lentere en *trend* pou silans lavwa bann dimoun ki vokal e ki ganny enterprete konman ofansif oubyen kontroversyal. Mazorite fwa sa bann *trend*, i ganny zistifye anba preteks ki pe konbat *hate speech*. Sa i poz en gran menas lo nou bann prensip demokrasi. Menm si lentansyon pou protez kominote ki vilnerab i neseser nou bezwen pran serten prekosyon pou pa detri sa menm lendepandans ki gid nou e protez nou.

Freedom of speech pa zis protez a agree avek bann lopinyon popiler; me i osi pour protez dwa lekspresyon swa dezagree oubyen menm lopinyon difere. Le moman ki nou les nou bann *speech* ganny sansire baze lo konteni

parey in ganny fer resorti resaman par Manm ki'n koz avan mwan, kot in sit mon kot mon'n dir en parol konsernan ler kanpanny i ganny fer. Mon pa krwar sa i *hate speech* akoz a plizyer repriz nou'n tann dir "zet *US* anba bis, parti *US* pe al disparet, e *US* pe al ganny bate dan sa eleksyon."

So koman en Manm Lasanble i normal pour nou koze akoz parey nou tou nou konnen Manm Lasanble i koze. Donk ler nou ekoute nou pou bezwen viv avek sa ki nou tande, akoz sa i kre en presedans danzere ki permet deside kwa ki ofansif e lekel ki determinen kwa ki en *hate speech* i konstitye. Si sa bann potansyel zizman sibzektif ki pa kapab ganny fasilman ganny manipile pou silans oponan politik e potansyel pou dekouraz bann deba tre ris e lezitim pran plas.

Mr Speaker, en dikton tre koni dan serk Zidisyer se pli bon fason pou teste laverite se pouvwar refleksyon pou fer ganny aksepte dan marse konpetitiv. Dan en lot mo remedi ou swadizan *harmful speech*, i pa ki ou sansire me plito annan plis *speech*.

Akoz i atraver dyalog e deba fran ki kapab *challenge* e annan debat friktye ki evantyelman retir bann ideoloji entolerab. E deplis listwar in montre nou ki ler

speech i ganny siprimen, i mazorite fwa ganny refoule. Letan lavwa i ganny silansye, i pa disparet zot irite e agrandi dan *l'ombre* e vin pli radikal e danzere. Kontrerman ler dimoun i lib pou fer zot *speech* menm bann ki pa neseserman *hateful* nou anmenn devan kot i kapab ganny konfronte e opoze.

Konman politisyen nou devret tre vizilan pou defann *free speech* nou rol se pou reprezant pwennvi nou bann elektora me non pa pou protez nou kont kritik oubyen ler nou ganny denigre. Ler nou sey promot lenportans pou *cancel* bann *speech* nou oponan nou pe *undermind* sa vre proses demokrasi ki'n donn nou, nou lezitimite. Fodre nou toultan mazin en ki pou protez *free speech* se pa pou *validate hate speech* me plito en komitman lo prensip liberte e demokrasi an rekonesan meyer fason fer pour konbat lide detriman tal atraver fason rezonnen, fason persyade e pouvwar laverite. Mersi Mr Speaker.

MR SPEAKER

Onorab Aglae ou annan laparol.

HON EGBERT AGLAE

Mersi Mr Speaker. Mon a dir bonn apre midi *VP* e reprezantan *legal AG's Office*. E bonn apre midi tou Manm e

tou dimoun ki a le kout. Mr Speaker, sa lamannman *penal code* ki la devan nou ozordi i pe ensit en kantite refleksyon pou mwan konman en Manm Parlman e osi pou bann piblik Seselwa an zeneral ki pe ekout nou. E mwan, mon mazin parol enn nou bann Manm Onorab isi dan sa Lasanble sa se Onorab Georges sizyenm Lasanble ki ti dir ki atraver ou Mr Speaker, ki nou bezwen be *mindful* ler nou fer Lalwa, ki Lalwa i kapab protez ou letan ou dan Lopozisyon ouswa letan ou dan parti Gouvernman.

Mon konfronte par ki parfwa maler lepase pa pou kapab zistifye, nou pa kapab servi maler lepase pou zistifye pese ozordi. E mwan, mon'n fer en pti *tour d'horizon* pou gete kwa ki lemonn pe fer ozordi an se ki konsern bann proteksyon nou bann dwa fondamantal ouswa nou bann *human rights*.

E nou isi Sesel nou annan en konstitisyon, konstitisyon anba lartik 15 ki koz lo *charter of fundamental rights* kot i protez nou bann drwa. Parey nou bann dwa lavi, bann drwa dinyite, dwa laliberte, drwa pou *privacy*, drwa pou nou annan *freedom of expression*, drwa rasanble ouswa apartenans a okenn lasosyasyon. E osi mon'n regard bann model ki serten

nou bann pei pli demokrasi dan lemonn, pli demokratik, bann pli gran demokratik.

Onorab Cosgrow in koz lo lanmerik ki'n menm annan bann morso lezislasyon ki fer ki i pa pou zanmen arive ki okenn Lalwa i ganny mete pou anpes en dimoun eksprim son drwa dan en fason lib e zis. E osi mon'n regard pou lerop prezizeman mon regard Langleter ki osi li i annan en Lalwa ki apel *Equality Act* e li dan sa Lalwa i sit bann karakteristik ki nou pe war isi dan sa menm Lalwa kot i met bann proteksyon anba *Equality Act*. Parey lo laz lo dezabilite e proteksyon pou bann *gender equality* e *assignent* i koz lo proteksyon pou maryaz ek bann sivil *partnership*, i koz lo menm maternite ek bann madanm ansent i koz lo bann ras, bann diferan etnisite, i koz lo larelizyon i koz lo, *belief*, lo *sex* ou bann oryantasyon.

E a okenn moman napa okenn landrwa mon'n sey rode ki kote bann bout proteksyon politik karakteristik i antre dan politik mon pa'n war ziska prezan. E se sa ki parfetman korek ki Onorab Loze, in fer son lentervansyon in dir poudir i annan en lapo bannann ki'n ganny glise la. E mwan osi mon santi poudir sa in ganny mete parey en latrap.

Mon napa problemn avek serten sa bann karakteristik parey ki pe mete isi dan Lalwa, akoz mon osi mon en *firm believer* dan drwa imen e proteksyon bann lezot drwa ki atase avek proteksyon bann lezot drwa ki atase avek parey ras larelizyon, ou *disabled*, ou lo oryantasyon seksyel.

E ladan i annan *HIV and Aids* osi e la nou osi anglob bann lezot maladi ki en dimoun i kapab gannyen e ki kapab vin en fason diskriminatwar si demen i pe fer en progresyon ouswa en lavansman dan son lavi kelkonk ki sa pa ganny servi kot li. I pa vin enn sa bann kriter ki ganny tik dan en bwat poudir ou pa kapab akse tel servis, ouswa ganny tel led, akoz ou loriyantasyon sa malad ki ou ladan. Menm parey bann lezot karakteristik ki'n ganny mete devan lo la ki pa vin okenn form.

E mwan osi konstate pou dir si nou pe met *political affiliations by means of membership close to a associations outwards* dan sa Lalwa. Mon santi poudir la sa bann lezot karakteristik ki'n ganny site i pa alinyen. Mon pa war li alinyen dan sa Lalwa direkteman mon non.

E se sa ki mwan, mon war sa in ganny *slip in* pou sa *Bill* kapab ganny pase an servan, sa bann lot

karakteristik ki pli promenant ki pli rezonnab, ki pli fer sans pour sa Lalwa kapab ganny pase.

Mon dir sa akoz? Nou annan- anba *Penal Code* osi bann lezot Lalwa ki kapab ganny okenn endividi ki santi li *aggrieved* par okenn form latak si ou dan politik. Ou annan ou bann lezot Lalwa ki kapab donn ou *legal recourse* pour ale, par egzanp nou annan Lalwa kont difamasyon, nou annan Lalwa osi ki protez ou kot okenn bann *threat* parey si en dimoun i dir ou mon pe vin bat ou mon pe vin touy ou.

Ou kapab fer *case* anba Lalwa pou ou kapab rod ou *duress* anba Lalwa kont sa ki pe ganny dir kont ou.

I vedir ki i annan bann lezot form ki politisyen i kapab servi li, pour li kapab ganny *recourse*, me letan mon pe regard dan sa *penal code* lamannman ki zot pe mete, mon pa tro krwar sa i balanse.

Mr Speaker, *hate speech* li menm li i pa egziste dan en *vacuum* lo li menm pou en dimoun *voice out* en konsern ki kapab *leads to hate speech* i bezwen annan en keksoz ki'n bezwen arive *that leads to words* sa kalite aksyon. E la ti annan en *information notes*, en rapor li menm ki *United Nations* anba *human rights* Lofis *high commissioner of*

human rights anba Nasyon-z-Ini ki ti fer serten pwen kot difikilte akoz napa en universal agree- en demisyon legal iniversel ki'n ganny agree lo ki manner zot pour karakteristik *hate speech* ouswa bann *hateful dispute* ki arive.

E i fer ki zot in zis dir poudir en kominikasyon *ok, any communication in speech* an ekri *writing* ouswa konportman ki atak, ouswa servi okenn form langaz diskriminasyon, an referans avek en person ouswa en group dimoun baze lo son swa bann larelizyon, son etnisite, son nasyonalite, son ras, son kouler, son desandans e zot, zot in fini li lanmenm la.

Pa'n nonmen okenn sa bout politik ladan, napa politik zot in reste li koumsa sa Nasyon-z-Ini anba biro *Human Rights* sa kot in dir sa. E osi zot in fer resorti poudir avek letan zot in war poudir in annan bann labi ouswa bann misuse par serten lotorite ki bann ki par serten lotorite pou abiz bann morso regilasyon li menm ki'n ganny mete *towards hate speech* dan bann letan kot i annan bann kanpanye eleksyon, anver zot oponan politik in fer resorti dan sa rapor.

E pour mwan se sa ki letan nou'n ariv dan sa konzonktir e bomaten Onorab,

atraver ou Mr Speaker, Onorab Naddy Zialor in fer resorti poudir pandan eleksyon e sa nou ava kapab ganny servi. Me selman nou bezwen realize osi konman en endividi, konman en Manm parlman nou ganny proteze anba sa ki apel *Assembly privilege and immunities Act*. I annan en proteksyon ki permet nou ki fini kot Speaker e si Speaker li demen i anvi tir sa kont ou, si i annan okenn case si ou'n koz dan en fason ki ou'n petet ofans serten endividi ou'n denigre li dan en fason ou a kapab ganny pourswiv *with the leave of the Speaker* sa i anba nou *Immunities Act*.

Me mon konstate osi pou dir parfwa nou pa kapab servi en dezavantaz ki nou, nou annan koman sa baravan pou kasyet deryer ki parfwa in arive kot ou, ou kapab atake dir sa ki ou anvi dir. Me letan i annan en retalyasyon, en reaksyon anver sa ki ou, ou'n dir ou vin zwe viktim la ou. Ou vin zwe viktim ou'n ganny atake e la ou akoz ou annan serten pwen feb e ganny servi. Nou bezwen sa byen nou.

Akoz mwan, mon annan en prensip se ki ou pou rekolte sa ki ou senmen, si ou pres dibyen ou pou rekolte dibyen. Be si ou pe pas partou ou pe rekolte dimal i pou annan son konsekans nou bezwen

konman imen dan natir imen krwar poudir i pou annan reaksyon.

E letan nou pe koz *hate speech* e Onorab Loze in dir i annan- napa *hate speech* i annan *speech* akoz? En dimoun i deside eksprim son lopinyon lo en size ouswa lo en desizyon i pe dir poudir strongman fortman sa desizyon ki'n ganny pran i pour afekte son lavi ouswa sa pti group dimoun. E li i deside pou dir, "be mwan, mon pou debout kont sa".

En pe parey sityasyon CCCL Cascade kot i annan en group dimoun menm si zot dir 5 me zot annan en dwa pour zot met zot pwen devan. E i pa akseptab osi Mr Speaker, mon pou dir sa kot apre nou tann dan en *press conference* Prezidan i dir « tasyon ». Tasyon apre Prezidan in donn en warning la li eski sa pa en entimidasyon lo dwa sa bann dimoun ki pe rod zot lazistis pour sa ki'n arive ? Eski sa pa en menas ? Eski sa nou pa pou kapab konsider konman en *hate speech* ?

Nou bezwen konmsi *we need to be careful* lo menm si ou dan- ou, ou, ou annan ou tou ou pouwar be selman pouwar i vin ek responsabilite *and you are accountable to what you say or do* parey mon osi, mon bezwen *accountable* avek mon

elektora. So pou mwan Mr Speaker, me sa osi nou bezwen analize e diskite.

Mon konnen i annan bann lenstans osi kot si nou pou al dan lepase en kantite keksoz i kapab ganny dir; me si nou anvi donn legzanp kre sa sosyete modern ki nou ti a kontan vwar ki i annan en lepase wi me nou pe viv dan prezan e nou sipoze pe fer pli byen, nou sipoze fer pli byen. Be nou pa kapab viv avek en Lalwa ki dan en sans menm si i annan pe dir i pa pe anpes ou koze.

Wi, ou pou koze ou, nou pe koze la me selman nou pa pe maltret person, nou pa pe atak person personnelman baze lo son karakteristik. Sa bann karakteristik.

MR SPEAKER

15 minit Onorab.

HON EGBERT AGLAE

Be i pou ariv en pwen Mr Speaker, kot en dimoun petet a en moman letan baze lo sironstans emosyonnel ki pas ladan i riske war li pe dir serten keksoz e in arive dan bann ka Ankour. Kot a sa moman letan sa akize ti dir poudir swa i ti rekonnèt poudir mon pa ti anba- mon ti annan en- anba en *emotional distress* sa moman letan e mon ti dir sa be i pa sa ki mon

reprézante. Be eski ou pou pini en dimoun?

So pou mwan Mr Speaker, pour konklir, bann karakteristik ki pe protez dwa fondamantal imen ki ganny trouve anba nou konstitisyon, anba nou *charter* 15 sapit 15. Mon napa problem ek sa mon pour proteksyon sa bann group minorite. Me sa bout kot- nou pe antre ladan Mr Speaker, la i mon konsern e mon pa kapab siporte. Akoz dan lepase plizyer parti in kapab *voice out* politikman atak isi, atak laba, maltrete, denigre in koz lo...- nou'n koz lo ansyen Sef Ziz sa ki ti ganny dir. Mon pa pou repete.

MR SPEAKER

Terminen, terminen Onorab.

HON EGBERT AGLAE

Be Mr Speaker si sa ki pa ti bon lepase, i devret pa ti bon lepase e ou, ou pe anmenn li la ozordi pou sey *curtail* mon pa war li zistifyab e mon pa kapab siporte. Mersi Mr Speaker.

MR SPEAKER

Mersi Onorab. Laparol pou Onorab Larue.

HON FLORY LARUE

Mersi Mr Speaker. Bonn apre midi Mr Speaker. Minis ek ou *panel* e tou dimoun ki pe ekout nou.

Mr Speaker, parey in ganny dir oparavan sa bout Lalwa ki devan nou i en morso Lalwa ki ase pti, me par kont i entrodwir en nouvo morso dan nou *Penal Code*. An tou leka i pe an globaz, i pe anmenn sa mo *hate*, laenn. Sa mo laenn, nou pe dir ki i kapab vin en krim. E bomaten i annan serten Manm ki'n fer en diferans ant en krim sivil kot ou al rod en rekour anba Lalwa Sivil ouswa Lalwa Kriminel.

Kriminel *in the sense* kot ansanm avek mert, vol, nou pe met sa koman en aksyon ki'n ganny kriminalize prezan. Sa i ki nou pe anvi fer avek sa morso Lalwa.

Premye seksyon Lalwa i fer ki letan ou'n komet en krim, ou agrav sa krim ki ou'n komet letan nou azout- ou azout ou motiv deryer sa krim avek enn sa bann karakteristik ki nou, nou pe site dan sa Lalwa ki nou pe azoute koman bann *protected characteristics*.

Manm ki fek koze avan nou in menm site anba kot in sit *UN*, kot in donn lalis ki *UN* in dir ki globalman bann pei ki pe adres sa fason fer, ki ozordi nou fer fas avek, sa laenn atraver parol ek lezot aksyon parey *video* in ariv en pwen kot nou bezwen adres li globalman e *UN* in pran sa aker e zot in donn lalis zot in dir nou ki i

annan, ou ras, ou krwayans relizyez, dezabilite, ou oryantasyon seksyel, ou idantite *genre*, ou karakteristik seksyel, ou statik *HIV/AIDS*.

E dan nou Lalwa nou'n azout *political affiliation*. Sa 2 dernyen ki dan nou lalis ki *political affiliation* avek *HIV/AIDS* i kapab tonm anba sa bout kot *UN* in dir dan sa lalis, in osi dir ki i annan *other identity factor*.

Savedir sa Manm ki'n koz avan mwan pa'n nonmen sa bout, ki sa pei letan i pe fer son Lalwa i pe adres sa fenomenn laenn atraver bann aksyon ek parol, atraver avek- an fas avek en lot group dimoun souvan en group minoriter.

Pei in ganny laliberte pou li kapab met bann keksoz spesifik ki kapab adapte ek son pei, son *other identity factor* ki pe arive dan sa pei.

Letan nou regard sa Lalwa i an 2 morso, nou ganny sa *aggravating factor* ki ganny azoute letan ou servi *hate* i vin en *aggravating factor*. Me apre nou ganny sa seksyon (b) ki pe anmenn bokou kontrovers. Nou'n ganny dir par lezot Manm ki zot napa problemm avek sa premye seksyon, sa premye bout ki nou'n azoute. 38(a), sa lot bout ki lezot annan en problemm avek sa *hate speech*.

E sa lot bout li, letan nou'n tann bann fason ki'n ganny adrese, nou'n vwar ki bokou *statement* in ganny fer, ki nou pe pran laliberte lekspresyon nou sitwayen.

Mr Speaker, ozordi nou vwar nou fek diskite ki nou kapab rekonnet ki stabilite mantal en dimoun- lemosyon en dimoun i ankadre fason ki i viv. Nou'n dir ki dan lekol isi Sesel nou annan en program *anti-bullying*. Tousala i an relasyon ek bann santiman ki vin dan en dimoun letan i ganny abize aköz i annan en serten spesifisite.

Letan nou dir ki nou pe anmenn en keksoz diferan e nouvo dan nou pei, nou bezwen regarde kot nou sorti. E Onorab Arissol, Sandy Arissol bomaten in fer byen kler en pe bann sityasyon ki nou'n pas atraver, kot nou ti napa laliberte lekspresyon. Ziska ozordi nou'n ariv en pwen kot nou pep in reganny sa laliberte konpletman e nou vwar li toultan dan tou laspe.

Be Mr Speaker, kote ziska ki zistans sa laliberte i pou ale? Nou'n ganny dir ki dan nou Konstitisyon i annan en morso ki donn nou *freedom of expression* e i annan serten Manm ki'n fer en diferans en konparezon avek *the first amendment right* Lanmerik. E zot in dir ki Lanmerik ou annan drwa eksprim ou lekor

dan nenport ki fason e aköz Komite nou pa pran sa koman en legzanp.

Mr Speaker nou, nou annan nou prop Konstitisyon, e nou Konstitisyon ti ganny ekrir '92, '93 in prezante avek nou pep. E sa Konstitisyon pa'n adres sa dan sa fason parey *first amendment* i ete Lanmerik. Alors nou pa donn fo- *false hope* avek nou pep pou dir ki nou telman lib, ki nou bezwen donn menm laliberte lekspresyon parey i annan Lanmerik.

Mr Speaker sirtou letan sa Manm ki pe dir sa la, i sorti dan en parti politik ki'n anpes dimoun koze ; ki'n anpes dimoun annan laliberte lekspresyon. So annou get byen be lekel ki pe dir sa ki pe fer sa kalite *statement* i pe fer li popilis aköz atraver sa Lalwa sa pe vini me i pa en keksoz ki son parti i krwar ladan.

Mr Speaker, keksoz ki nou tande *about* sa bout *hate speech* ki zot pa dakor avek i aköz i bezwen fer referans avek sa *protected characteristics*- lalis *protected characteristics* e ladan nou annan *political affiliation*.

Ankor Onorab Arissol in fer kler ki i dir *political affiliation*, savedir si ou ganny adrese dan en fason *hateful through speech* aköz ou afilyasyon ek en parti ki ou

donn sipor sa i kapab vin en krim.

Prezan Mr Speaker, gran, gran *statement* in ganny fer me i pa'n ganny byen met devan mon santi. Letan nou dir ki en dimoun sa Lalwa pou fer serten dimoun ganny afekte e nou pou fer zot per pou zot kapab eksprim zot lekor, eski Mr Speaker, nou pe dir ki atraver sa Lalwa, ki pou en dimoun eksprim son lekor i bezwen servi en langaz kot i abiz ou, i ensilte ou e i menas ou?

Si en Lalwa i dir ou ki ou *free* pou fer tou kalite *statement* ou, Ou kapab dir ou pa kontan James Michel, mon pa kontan Danny Faure, mon kapab eksplike ki mon lopinyon lo ou parti *a new United Seychelles*.

Be eski pou mon dir bann lalis keksoz ki mon pa kontan lo sa parti politik, eski mon bezwen abiz zot, ensilte zot, ouswa menas zot? Be si sa, si dan sa kote nou vwar ki nou pe pran laliberte dimoun par dir ki ou lib pou ou annan ou afilyasyon, ouswa ou lib pou ana pou lopinyon me solman fodre ou arete at en serten pwen e ou pa servi en serten kalite langaz, eski Mr Speaker, nou pe pran laliberte lekspresyon dimoun?

Mr Speaker, tou lede kote in sit bann parol ki'n ganny dir

dan leparse. Prezan mon pou al lo sa pwen kot zot in dir *political affiliation*, e zot in met li lo ledo politisyen pe rod proteksyon akoz zot lapo i mens.

Mr Speaker, ozordi dan nou pei nou pe anmenn nouvo fason fer. Nou anvi war bann nouvo kalite *leaders* Mr Speaker. E zis sa semenn Lendi lo *Tête-à-Tête* sa imsyé, Mr Andre ki ti lo sa program i ti dir ki nou pei in ariv en staz kot dimoun pe rod lezot kalite politisyen.

Me par kont ou konnen ki sa imsyé ti dir Mr Speaker dan son lopinyon?

I dir ki i krwar ki telman politisyen i ganny zoure, i ganny abize, i ganny maltrete, ki dimoun ki dan en pozisyon profesyonnel ouswa i annan en abilite ouswa en lanvi pou li vin kontribye pou son pei i pa oule partisip ladan akoz sa bann kalite langaz ki ganny servi akoz i vin en politisyen i pa donn li en lanvi pou li antre dan sa louvraz.

Alor Mr Speaker, eski i mal si ozordi nou pe dir annou vir sa paz, annou komans lo en lot nivo, met nou pei dan en lot nivo, met nou fason ki nou regard politik dan en lot nivo i mal Mr Speaker?

Alor annou reget byen ki sa Lalwa pe sey anmennen e ki i vedir pou nou pep, ki kalite nouvo fason fer nou pe

anmennen pou nou kapab kontinyen eksprim nou lopinyon e kontinyen annan nou afilyasyon politik nenport ki parti ki nou oule afilye avek me ou pa maltret ou kanmarad Mr Speaker.

Par kont, nou vwar ki ozordi nou annan *Facebook*, kantite politik i ganny fer lo *Facebook* Mr Speaker. Be letan ou al lo *Facebook* ou servi sa tit *Anonymous*, e ou decide pou ekrir tou sa ki pas dan ou latet letan ou se ou lo ou sofa ouswa ou anba pye koko lo lans. *Wherever you are*, ou decide ekrir sa ki oule anba *Anonymous*.

Mr Speaker, tou dimoun ki war en *statement* ganny fer lo li anba en *comment Anonymous* i bezwen inyore akoz sa dimoun i feb an lespri, sa ki pe ekrir sa i feb an lespri, i divage, i napa en idantite akoz i napa en non, akoz i bezwen kasyet pou li ensilte son kanmarad?

Mr Speaker, letan ou kapon ou pa kapab montre ou figir, ou pa kapab dir en keksoz fran akoz en kantite sa bann keksoz sa dimoun pa pou kapab dir dan semen fas a fas a en dimoun. Alor mon dir tou dimoun *Anonymous profile* nou inyore. Tou sa ki ekrir ladan nou inyore pa fer sans! I letan en dimoun i ekrir anba son non i dir ou son lopinyon la wi, ou a kapab reazir avek.

Me solman mon pou ankouraz tou dimoun letan zot lo *Facebook*, ouswa okenn lezot platform zot deside servi, annou evite servi bann parol ki dapre Lalwa ou menas dimoun, ou abiz dimoun, ouswa ou ensilte dimoun.

Ou toutafe dan ou drwa pou ou pa dakor, pa kontan, annan en lopinyon diferan, eksplike akoz an detay, san servi langaz kot ou ensilte ou abize ouswa ou menase.

Sa ki sa Lalwa pe dir Mr Speaker, e mon santi ki lot kote letan in anmenn sa dan telman en lot direksyon, tou kalite *statement* in ganny fer Mr Speaker, ki nou koman politisyen nou pe rod proteksyon.

Mr Speaker, avan ki nou ti vin politisyen, en kantite nou la anndan komans ek *Leader* Lopozisyon i ti en *teacher*? I ti en dimoun prive li. I annan nou ki ti annan biznes, ki ti biznessmenn; i annan dimoun ki ti ners.

Mr Speaker, nou sorti, en dimoun ki en politisyen i pa sorti anler i ronm ater - i en sitwayen ki deside antre dan lavi politik son pei. Ozordi nou pe dir annou sanze nou fason ki nou fer nou politik. Sirtou atraver parol ek bann *video* ki nou difize.

Eski i sitan mal pou nou sey fer sa Mr Speaker? Ou *free* pou ou ekrir sa ki oule, me

selman veye sa ki ou ekrir. Mr Speaker, letan ou pe pran en nouvo direksyon ou vwar ki i annan rezistans. I annan rezistans akoz i annan serten e la anndan nou'n vwar ki maltrete, abize ek ensilte i en fason son karakter.

Letan ou vin defann-akoz sa ki'n dir dan Lalwa, Onorab Loze letan in koze bomaten in sit sa Lalwa in reste kot "*construed, reasonably be construed.*" I pa'n dir kwa ki pou *reasonably be construed. If it can reasonably construed as threatening., abusive or insulting.* Mr Speaker, Mr Speaker, Mr Speaker...

(Interruptions)

MR SPEAKER

Order!

HON FLORY LARUE

Letan ou pa kapab, ou pa kapab *go all the way.*

(Interruptions)

MR SPEAKER

Order!

HON FLORY LARUE

Ou pa kapab *go all the way* pou ou kontinyen fer lanfaz lo *reasonably be construed* - be ou pa- seta ou, ou pa ensilte en dimoun. Seta ou, ou pa abiz

en dimoun, seta ou, ou pa menas en dimoun !

Rod en lot fason pou fer pase ou langaz. Koman en pep Mr Speaker nou bezwen aprann fer sa.

MR SPEAKER

15 minit, 15 minit Onorab.

HON FLORY LARUE

Mersi Mr Speaker. Mon ava konklir lo sa pwen. I en Lalwa ki pe adres en sityasyon ki afekte bann group minoriter dan en fason mantal. Dimoun i ganny *bully*, i ganny abize e i afekte zot mantalman.

I annan en serten Manm ki pe riye byen for Mr Speaker, akoz li i pa krwar ki dimoun i kapab ganny afekte mantalman. I pa krwar dan sa Lalwa li. I pa krwar ki fodre protez dimoun kont laenn.

Alor Mr Speaker, mwan mon pou siport sa Lalwa e parey mon dir mon pou demann tou dimoun pou met kontrol lo zot parol e pa ensilte personn pou zot ganny dan difikilte apre. Mersi.

MR SPEAKER

Mersi. *Point of order*, oule adres keksoz ki'n leve? Ale Onorab Loze.

HON JOHAN LOZE

Mersi Mr Speaker. Mr Speaker, i fek ganny dir ki Onorab Loze letan in ariv lo sa

pwen *reasonably construed* in reste lo la, e i pa'n dir kwa ki kapab ganny *reasonably construed*.

Mr Speaker, mon oule met a mon latansyon ki Onorab Loze- Johan Loze mazanbik epe ti lir tou le 3 pasaz antye komansman ziska finisyon. Si mon kanmarad zorey pa bon mon pa kapab fer naryen pou li, al aste en pe *earbuds*.

MR SPEAKER

Mersi Onorab. *Ok*, ou'n fer ou koreksyon, Onorab Georges, *point of order*.

HON BERNARD GEORGES

Yes, point of order Mr Speaker. Mr Speaker, pandan ki Onorab Flory Larue ki en Manm mon *Caucus* ti pe koze, Onorab Loze in akiz li ki nou tou nou'n tande isi konmkwa i fol.

That is- e sa i en *hate speech*, e sa i en *hate speech* ki napa okenn plas ni dan sa Lasanble ni dan sa deba. Mersi.

MR SPEAKER

Mersi.

(Interruptions)

MR SPEAKER

Order! In bezwen- *ok*, si Onorab Loze in dir sa, mon krwar i mal, i *out of order*. Mon

pa pe al avek sa size endefini, nou a termin li la. Onorab Pillay, ou annan laparol pou ou diskour.

HON SEBASTIEN PILLAY

Bonn apre midi tou dimoun ki pe ekout nou, ki pe swiv Lasanble.

Mon demann tou Seselwa ki pe swiv nou, pou port latansyon byen sa ki pe arive dan nou Lasanble ozordi. E pou zot mazin en keksoz ki ozordi nou annan en Gouvernman ek en parti ki o pouvwar ki'n sitan fay, sitan fay, sitan enkapab, ki sel fason pou zot kapab gard pouvwar se sey kontrol lekspresyon e kontrol tou sa ki pe pase.

Yer menm nou'n vwar lesey pou esey anpes Lopozisyon anmenn *Private Notice Question* dan sa Lasanble. En lesey ki pou kontinyen semenn prosen e i pou kontinyen semenn answit.

Akoz Mr Speaker? Akoz nou annan en parti o pouvwar ki'n realize poudir in vin o pouvwar par lafors, ler mon dir lafors dan son sans ki in maltrete, in denigre e ozordi se li ki pe ganny plis maltrete, plis denigre aköz sa ki in fer.

Mr Speaker, annou met legzanp devan Lasanble Nasyonal. Kanpany Gappy *out!* Verifikasyon Mr Gappy, maltrete Mr Gappy fer par bann diferan dirizan *LDS* enkli

Vis-Prezidan ki dan sa Lasanble, a plizyer repriz sa ti apel *hate speech*.

MR SPEAKER

Onorab fer- atansyon. Fer atansyon ou pe akiz Vis-Prezidan ki pe asize la devan nou, koman ou pe kestyonn son *conduct* e ou pe fer en alegasyon.

Mon pe demann ou pou evite fer sa bann alegasyon. Si ou pou fer ou largiman fer li e evite refer avek Vis-Prezidan e lezot *leaders* endividuelman. Mersi.

HON SEBASTIEN PILLAY

Mr Speaker, mon oule met devan Lasanble en portre ki mon'n tire lo *YouTube* en *post in YouTube* ki montre Prezidan Ramkalawan dan en *pickup*, Vis-Prezidan Afif, ou menm ou Mr Speaker kot Prezidan Ramkalawan pe fer en *speech*.

Si Lalwa Lasanble ti permet mwan *play* sa *speech*, sa *post* li *YouTube* in ganny mete par en de nonmen Mr Ahmed Afif ki malerezman ozordi i Vis-Prezidan e mon pa kapab atak li. *Now*, apard sa *video*.

MR SPEAKER

Onorab, mon'n dir ou arete akiz Vis-Prezidan, arete silvouple! Kontinyen avek ou *speech* e arete akiz Vis-Prezidan.

HON SEBASTIEN PILLAY

Mersi Mr Speaker. Dan sa *speech* ki ti ganny fer, ti annan 2 dimoun ki ti koze prensipalman. Ti annan Mr Ferrari ki en Minis mon pa pe akiz li, me serten bann parol ki ti ganny dir lo lo Mrs Twomey ki ti ganny vire pou apel sa Madanm Mrs Touni, i lo rikord, i lo rikord.

A sa moman, a sa moman Mr Speaker, Prezidan li menm ti fer serten komantr e dir sa ki i ti pou fer ek sa bann dimoun e i ti menm annan en *threat toward* desizyon ki Mrs Twomey ti pe al fer Ankour, an relasyon avek en *case*. E ti ganny dir poudir si zot pran sa desizyon kont Prezidan i annan 31 mil Ramkalawan ki pe swiv li alor zot pou ensit dezord dan pei. Sa i lo rikord Mr Speaker.

Rezon mon komans koumsa Mr Speaker, rezon mon komans koumsa se aköz si ozordi.

MR SPEAKER

Onorab, *Standing Order*, *Standing Order* i dir *the conduct of the President* i kapab ganny met devan Lasanble zis lo en Mosyon, zis lo en Mosyon. I *conduct* sa dimoun ki Prezidan konmela. Onorab, ou pe al tro lwen, arete.

HON SEBASTIEN PILLAY

Mersi Mr Speaker. Mr Speaker, mon apresye ou *ruling*. Me selman Dr Patrick Herminie dan sa Lasanble pa ganny *afford* menm proteksyon.

E alors ti *ok* pou Onorab Arissol fer en ladyare verbal anver Dr Herminie, atak li, vilifye li, san ki li i kapab defann son lekor e annan menm proteksyon ki ganny *afforded to* politisyen.

Rezon aköz ki mon'n pran sa legzanp, se pou montre avek pep Seselwa se ki apre ki zot in fer lamannman dan sa Lalwa, sa ki politisyen e o pouvwar pou ganny serten proteksyon e sa ki pa o pouvwar pa pou ganny proteksyon.

Se sa ki pou arive Mr Speaker. Aköz se sa ki pou arive? Aköz sa Lalwa i en latak direk lo lartik 22 nou Konstitisyon e i kontreman dir Lartik 102 nou Konstitisyon.

Les mon ava eksplike pou benefis Mr Sullivan Mr Speaker, ki pe konplet zisteman sa lamannman ki pe fer ozordi. Dan Lasanble Nasyonal Manm Lasanble i annan liminite pou sa ki zot dir, savedir sa ki nou dir pa kapab ganny met Ankour pa kapab ganny atake, ok? Nou ganny drwa dir sa ki nou anvi nou koman politisyen.

Me sa manm piblik ki pou reponn nou apre sa ki

nou'n dir sa ki nou anvi li ki napa menm liminite akoz li i pou ganny tyonbo, i pou ganny *construed* ki i pe fer en lensilt lo baz en kategori, lo baz en karakteristik ki apel afilyasyon po..li..tik. Se sa problemm avek sa Lalwa.

Se sa problemm ki nou annan, akoz sa problemm? Akoz nou konstitisyon ki dir ki ou annan drwa lekspresyon e lartik 22 i fer kler ki poudir i ava annan en Lalwa ki kapab dan en sosyete demokratik ki rezonableman fer lenplimantasyon sa Lalwa.

I byen, be mon pa war sa rezonnab dan en sosyete demokratik mwan. Mon *ok* avek tou lezot keksoz karakteristik. Larelizyon-Konstitisyon i dir ou annan *freedom of association, ok? Gender*; mon napa problemm ek sa mwan. Mwan, mon problemm i avek lefe ki zot tou zot in koz lo ki mannyer ki zot oule protez politisyen. Savedir zot oule protez zot lekor.

Mr Speaker, si i annan en dimoun ki'n ganny maltrete plis ki sa bann dimoun ki dan Lopozisyon ek zot bann siporter ankouraze par zot bann *leaders*, se mwan, *ok?* I menm annan *MNA* la anndan ki'n pas don letan maltret mwan avan i vin dan Lasanble e en letan i ti maltret Mr Ramkalawan e dernyen-r-er i

ti maltret nou lo nou kote lataab.

Alors Mr Speaker, annou regard larealite devan nou e regarde ki sa Lalwa pe anmennen pou nou. Pou benefis Lepep Seselwa annou regard provizyon sa Lalwa ki nou dan kontansyon avek.

Nou annan Mr Speaker, sa term "*political affiliation means membership, close association or any outward support of a political party.*" Yes, akoz Konstitisyon i dir ou annan *freedom of association* i *ok* sa. Konstitisyon i dir ou osi annan *freedom of expression*.

Kot mwan annan en problemm mwan, se ler ou dir pou kominike *advocate* oubyen *propagate* okenn *statement*" *whether written, spoken or express in any other form publicly or by electronic media that could be reasonably construed*" - *reasonably construed by who?*

By, mon konnen ki pou arive mwan e sa danze ki nou bann ler nou fer Lalwa, sa pou ganny *reasonably construed by* sa ki o pouvwar. Akoz Mr Speaker?

Get ki zistans zot in ale kot mon war i enteresan, teknisyen in fer son louvraz byen li me letan ki pe demann li pou fer sa. In menm dir poudir an relasyon ek en programm televizyon ki sipoze *fair*, lekel ki pou zize si sa

program televizyon i *fair*, Prezidan? Akoz i fek atak zournalis.

So Mr Speaker, tou sa latak ki nou'n ganyen lo nou kote latab depi bomaten mon asize trankil mon sibir. Nou'n les zot dir sa ki zot anvi, fer sa ki zot anvi avek nou, be sa moman kot nou, nou pou asize nou pou reste trankil in fini. E nou pou debout akote Seselwa pou defann son lentere.

Mr Speaker, get lironi - *the irony of it* Mr Speaker. Sa parti ki dir in lager pou donn laliberte lekspresyon, pe ozordi pran laliberte lekspresyon Seselwa. E sa parti ki zot dir pa ti oule donn Seselwa laliberte lekspresyon, pe defann laliberte lekspresyon Seselwa.

So Gouvernman pe dir ek ou koumsa Mr Sullivan, Gouvernman pe dir ek ou koumsa Mrs Queecy Ho, Gouvernman pe dir ek ou koumsa Mr Antoine Hoareau, ou pou koze ou, selman ou pou koz manner Gouvernman i anvi ou koze.

Mr Speaker, ti napa demagozi pou fer otour sa Lalwa si Gouvernman ti'n vin fran. Ti pou napa problem si Gouvernman ti pe dir laenn *as a predicated element of* en lofans, ou pe fer en lofans, ou pe fer li atraver laenn an relasyon avek diferan karakteristik.

Be nou, nou le sel pei avek son defander demokrasi lo kote latab e ki *LDS* i reprezante, ki ozordi pe dir ek ou koumsa *whilst* politisyen i annan liminite e proteksyon ou piblik ou pou napa ou. Ou pou napa ou.

Ou pou napa akoz sel rekour ki ou pou annan se al devan Lakour Konstitisyonnèl, pou lager ou drwa konstitisyonnèl. E sel rekour ki ou ava annan ozordi dan sa Lasanble se si nou koman en Lasanble nou debout pou anpes sa Lalwa pase.

Mr Speaker, mon annan portre en *warrant* ki ti ganny egzekite lo Mr Hoareau. La, pou en lofans ki in fer pou *cybercrime*, sa bann dimoun pou al fouy partou kot li pou rod tou keksoz kot li, eski sa pa apel en labi pouvwar sa?

So Mr Speaker ler- mon apresye ki Vis-Prezidan in fer son louvraz in vin prezant sa Lalwa. Me ou deza baze lo sa Lalwa ou dir *posting or propagate*, mon pa pe *input improper motive* kont ou. Me lo ou *YouTube* ou annan sa *video* ki montre sa bann keksoz pe ganny dir.

So ki manner ou kapab dir mwan poudir- ou soz lo *YouTube* i ankor la, ou ti'n devret tire avan ou prezant sa Lalwa? Se sa problem Mr Speaker.

E la mon pe ganny dir Mr Speaker lot kote latab par Onorab Henrie Deputy Speaker ki si Albert Rene ti o pouwwar, mon ti'n pou'n disparet. Eski zot anvi fer mwan disparet Mr Speaker? Eski LDS i anvi fer mon disparet? Eski LDS in ariv sa staz ozordi ki zot oule fer disparet zot oponan politik?

(comments off-mic)

HON SEBASTIEN PILLAY

Mr Speaker, lo zot lapo bannann nou, nou pa pou glise lo sa kote latab nou. Nou pa pou glise aköz nou war klerman ki zot, zot oule fer. Sa ki zot, zot oule fer zot oule servi nou pou *achieve* en rezilta ki zot anvi *achieve*. *And make no mistake* bann teknisyen ki dan Gouvernman.

Zot pou ganny servi pou akonpli azanda en Gouvernman diktatoryal dan sa pei. Mr Speaker, in annan plizyer vatevyen – i annan plizyer vatevyen lo sa Lalwa e plizyer keksoz ki swadizan in sipoze ganny dir.

Mon oule met lo rikord ki swadizan annan en let ekrir par *Ombudsman* ki'n ganny anvoye kot ou lofis, e ki'n osi ganny anvoye kot *Chairman Bills Committee*, ki personn pa'n zanmen war an relasyon

ek konsern ki annan lo sa Lalwa.

Sel keksoz...

(comments off-mic)

MR SPEAKER

Onorab, Onorab Henrie ou a reste silans silvouple.

HON SEBASTIEN PILLAY

Mersi Mr Speaker. Pou nou konnen ti annan sa let, nou'n bezwen ekrir lofis *Ombudsman* pou nou sey ganny en kopi sa let. Nou'n ganny dir i annan, me zanmen nou'n kapab ganny en kopi.

So ki i annan ki Lasanble pe kasyet lo sa let ki ou pa oule donn nou en kopi ki menm Manm *Bills Committee* pa'n ganny en kopi? Se sa problem ki nou annan Mr Speaker.

Dezyenmman Mr Speaker, *ARID* in osi ekrir en let *regarding* en *press release regarding* en lamannman sa Lalwa. Gouvernman in anvoy tou dimoun merd. E parey son labitid i pou fer gro lebra ek son mazorite dan Lasanble, ki zis en *rubber stamp*, zot pou agree ek sa Lalwa, zot pou siport sa Lalwa, pou zot *curtail* drwa lekspresyon Seselwa Mr Speaker. Se sa ki pe arive ozordi.

I annan en provizyon dan sa Lalwa ki fer sa Mr

Speaker en provizyon. E sa, sa deskripsyon karakteristik afilyasyon politik. Si sa i sorti napa problem. Si sa i sorti napa problem. Me problem ek *LDS* se ki zot in ganny anvoye pou fer en travay sal par en lot dimoun ki anvi war Seselwa konform a en fason panse.

MR SPEAKER

Hold on, ou konnen poudir Prezidan ki anvoy Lalwa dan Lasanble, sa ki ou pe dir ou pe dir Prezidan in diriz son Manm pou fer travay sal. Onorab, sa pa akseptab mon'n donn ou plizyer *warning* mon pe dir ou *retract* sa.

HON SEBASTIEN PILLAY

Mr Speaker, mon pou *retract* sa ki mon'n dir.

MR SPEAKER

Mersi. Onorab, i reste ou 1 minit, terminen silvouple.

HON SEBASTIEN PILLAY

Mr Speaker, avek trou sa lenteripsyon ki mon'n gannyen, eski mon kapab ganny sans pou konplet mon kantite letan ki mon'n sipoze gannyen?

Mr Speaker, ler nou vin ek Lalwa e nou met en clause dan Lalwa ki koz lo kominikasyon, ki koz lo *propagating statements*, ki koz lo *whether written or spoken*

expressed in any other form, piblikman, oubyen lo *electronic media*, savedir nou pe target *Facebook*, *that can reasonably be construed as threatening, abusive or insulting*.

Sa i napa naryen pou fer ek sa *hate element*. Sa i annan pou fer ek sa eleman *hate speech*, me en determinasyon *hate speech* ki'n ganny servi depi 2015 dan sa pei pou *propagate* en parti politik. Atraver par egzanp ki "pil lo li" kot mwan mon dir poudir aköz mon siny Pillay ou pa pou pile lo mwan. Setou ki mon'n dir. Ou konpran?

So ler ou koman en parti politik ek ou bann dirizan debout deryer pikep ou maltret dimoun, dimoun i ganny maltrete sa letan, dimoun i ganny vilifye, alors ou war li neserer ozordi aköz si i annan en lenstans kot seselwa pe atak gouvrenans son pei, se ozordi son gouvrenans son pei in *fail*.

Gouvrenans son pei pa pe kapab delivre lo sa ki i ti dir i pou fer e tou sa bann promes ki'n ganny fer ek Seselwa pa pe ganny delivre lo la. E se pour sa rezon ki ozordi baze lo son merit en Lalwa koumsa in ariv devan nou Lasanble.

E *the best thing* ki Lasanble i kapab...

MR SPEAKER

Terminen silvouple Onorab.

HON SEBASTIEN PILLAY

Mon pa pou argimant avek ou Mr Speaker. Mon pa pou argimant avek ou. Mon'n ganny enteronpe, mon'n ganny kontrole lo mikro pou mon koze, dimoun la deor in tande.

Se sa ki zot pou gannyen ler sa Lalwa i pase, se sa ki pou arive ek Seselwa aköz sa ki nou, nou annan pou fer se fer en meyer desizyon.

Me sa ki mon garanti ou Mr Speaker 2025 Seselwa pou met ou e ou parti e ou Gouvernman deor! Mersi.

(APPLAUSE)

MR SPEAKER

Mersi Onorab. Onorab Georges, ou annan laparol.

HON BERNARD GEORGES

Mersi Mr Speaker. Mr Speaker, mon pran laparol apre midi avek lafyerte koman avoka en ki mon profesyon e koman en politisyen liberal ki mon vokasyon.

HON JOHAN LOZE

(comments off-mic)

MR SPEAKER

Sorry. Onorab Loze ou'n fer en komanter, ou'n fer en komanter letan Onorab Georges ti pe koze ki mon

sipoze i aplik pou li. Mon pe demann ou *retract*.

HON JOHAN LOZE

Mr Speaker, mon *retract* ki mon'n dir li pa bliy voler.

MR SPEAKER

Onorab Loze, mannyer ou'n fer sa pa akseptab. Onorab Georges kontinyen avek ou diskour.

HON BERNARD GEORGES

Mersi Mr Speaker. Mr Speaker, i annan en vye proverb Afriken ki dir ler ou pas obor en komen e ou tann sa komen pe ronfle pa donn li okenn latansyon.

(laughter)

MR SPEAKER

Onorab Goerges evit, evit...

(comments and interruptions)

MR SPEAKER

Order! Order! Order! Onorab Georges, sa ki ou'n dir i pou ganny enterprete konmkwa ou pe adres en Manm Lopozisyon. I pa akseptab. I pa akseptab mon pou demann ou *retract* sa silvouple.

HON BERNARD GEORGES

Mr Speaker, tel parey Onorab Loze, mwan osi mon *retract* ki mon'n apel li en komen.

(laughter and interruptions)

(APPLAUSE)

MR SPEAKER

Order! Bon. Onorab Georges, mon pe demann ou pou fer larestan sou *speech* silvouple dan en fason ki evit okenn sipozisyon lensilt kont lezot dimoun, mersi.

HON BERNARD GEORGES

Mr Speaker, i pa...

MR SPEAKER

Si en lot, si en lot in fer Onorab, mon pe demann ou pou pa swiv menm legzanp. Mersi.

HON BERNARD GEORGES

I pa mon lentansyon fer en keksoz apard adres Lasanble. I pa ti mon lentansyon. Se pa mwan ki'n komanse Mr Speaker, se Onorab Loze ki'n akoz mwan dan sa Lasanble e annou zanmen bliy sa.

Mr Speaker, mon pou rekomanse i fer 3 minit la ki mon pa ankor komans koze, mon a rekomanse.

Mon pran laparol apre midi koman en avoka ki mon profesyon e en politisyen liberal ki mon vokasyon. Mr Speaker, le 27 Septanm 2025 ler Prezidan Ramkalawan pou remont *State House* pou son dezyenm manda 5 an.

MR SPEAKER

E ler parti *US* pou retourn dan sa Lasanble avek 3 Manm proporsyonnel selman, mon pou selebre sanmenm sa zour 47 an ki mon en avoka isi Sesel. Le 27 Septanm sa mwan mon pou selebre 46an ki mon en avoka.

E pandan sa letan Mr Speaker, mon'n vwar en kantite keksoz ki'n arive isi Sesel atraver politik.

Mon en politisyen liberal e mon fyer ki mon en politisyen liberal. Akoz Mr Speaker, les Seselwa zanmen bliye ki se bann politisyen liberal parey ou, Onorab Minis Ferrari, Prezidan Ramkalawan ki'n anmenn laliberte lekspresyon dan sa pei.

Se atraver zot travay ek zot sakrifis kot ou, ou'n al prizon e sa 2 lezot dimoun in ganny kas latet, ki ozordi Seselwa i fyer ki zot annan laliberte lekspresyon. E fodre pa nou les okenn dimoun anba koko sa kote latab vin isi e sey fer krwar ki sa pa leka.

Mr Speaker, si i annan en parti ki pa kapab koz lo laliberte se sa parti *US*, se nou lo sa kote latab ki bann defander drwa lekspresyon.

Se nou lo sa kote latab ki'n lalit, ou Mr Speaker parey mon'n dir ou'n asiz prizon pou

plizyer mwan akoz, akoz ou ti pe lager pou Laliberte lekspresyon e fodre pa zanmen nou bliy sa.

Mr Speaker, mwan mon'n komans travay dan Biro *Attorney Zeneral* ler bokou Manm Lopozisyon ti ankor dan zot kannson kourt pe asiz lo ban lekòl.

E mwan mon konnen Mr Speaker, lekel sa bann dimoun ki'n bezwen al prizon, ki'n bezwen al Ankour e ki'n bezwen soufer pou zot krwayans politik e pou zot travay pou sey anmenn laliberte lekspresyon isi sesel.

Alor Mr Speaker, ler mon tann Lopozisyon koz lo lartik 22 nou Konstitisyon e dir ki nou ozordi nou pe vin fer derogasyon kont sa lartik atraver sa Lalwa ki devan nou, les mwan fer zot rapel Mr Speaker ki lartik 22 se pa nou ki ti pase se zot ki ti pase an 1993, se zot ki ti fer sa Lalwa, pa nou.

E dan sa Lalwa Mr Speaker, ki la devan mwan ozordi, se sa Lalwa ki li menm li, ki li menm li ki dir ki i annan lekspresyon ki ou kapab anmenn kont laliberte lekspresyon. Se zot ki ti met sa ladan, se pa nou ki'n anmenn sa isi Sesel pou la premye fwa. Se pa nou ki pe vin fer li la apre midi Mr Speaker se zot ki'n fer sa.

E ou konnen ki zot in fer Mr Speaker? Lepep Seselwa i bezwen konnen, i bezwen konnen ki premyerman lartik 22 son derogasyon se parti *SPPF* avek parti *DP* ki ti met ladan, pa nou.

E dezyenmman, e dezyenmman se premye Lalwa annou pa bliye se premye Lalwa ki parti *SPPF* ti o pouvwat ti pase apre ki Konstitisyon ti vin anfans an 1993, premye Lalwa ki zot in fer i ti en Lalwa lo en derogasyon lo lartik 22. E sete en Lalwa ki ti permet Gouvernman ou konnen ki zot ti permet zot fer? Ekout nou telefonn e ouver nou bann let lapos, se zot ki ti fer sa Mr Speaker.

E sa i la, e i pou la pou toultan e Seselwa pou komans sa toultan Mr Speaker. Nou pa kapab ozordi asize ekout en bann dimoun vin eksplik nou ki savedir laliberte lekspresyon. E Mr Speaker, mwan mon ava dir zot, mon ava dir zot kisisa ki sa Lalwa pe fer ozordi zis pou fer bann dimoun laba deor konpran.

Sa Lalwa Mr Speaker, pa pe fer naryen ki pa egziste deza. I annan apard kriminaliz *hate speech*, me annou, annou regard egzaktaman kisisa ki kapab arive anba sa Lalwa.

Annou pran en legzanp senp; si mon vin obor en dimoun avan ki sa Lalwa i

pase e mon vini mon dir ek sa dimoun “war ou mon pou bat ou.” Mon menas li mon pa tap li mon, zis mon dir li “mon pou bat ou akoz *whatever*.” Sa deza i en lofans i en lofans anba nou Kod Penal ozordi avan ki sa Lalwa i pase. I apel *common assault*.

Menm si mon pa tap li, pour vi ki mon menas li e ki li i *appréhende* ki mon pou tap li i vin en lofans. Nou pa pe entrodwir sa, sa i La deza annan anba nou Lalwa. I la pandan 43 an ki *SPPF* ti o pouvwar i la sa.

Dezyenmman, si ler mon vin kot sa dimoun e mon dir li ou war mon pou bat ou e mon bat li sa i vin en lofans e i vin en lofans annan Kod Penal ki'n la depi lantikite e ki ti la pandan 43 an ki *SPPF* ti o pouvwar. Nou pa pe azout sa ozordi.

Sa ki nou pe azoute ozordi se ki si ler mon vin obor sa dimoun e mon tap li mon dir li mon pe bat ou akoz ou krwayans politik oubyen ou ras, oubyen ou lapartenans seksyel pou okenn sa bann keksoz, la sa i vin en agravasyon sa lofans.

Sa lofans i ti la li - i ti la pandan sa bann letan ki *SPPF* ti o pouvwar. Sel keksoz ozordi se ki sa i vin en lofans agrave, akoz mon'n servi sa parol ki mon'n servi an mezir ki mon ti pe fer sa lofans. Setou ki nou

pe fer ozordi apre midi Mr Speaker.

E mon pa war lekel ki kapab dir ki sa napa son plas dan en sosyete demokratik ozordi an 2024, tel parey tou bann lezot pei in fer.

An sa ki konsern *hate speech*, en keksoz ki tou dimoun in bliye dir ozordi enkli sa enn ki'n koz sa avan mwan; “ar nou pe vin anpes dimoun koze.” Lekel ki anpes dimoun koze?

Mr Speaker, eski zot konnen ler Mr Ralph Volcere ti ganny pourswiv akoz en keksoz ki i ti'n ekrir, zot konnen lekel ki ti pe asiz avek li Ankour toulezour? Wavel Ramkalawan. Toulezour i ti asiz ek li, pou siport li.

Ou konpran Mr Speaker. Ler Mr Sullivan ti ganny arete, zot konnen lekel ki ti al dan kaso pou al negosye pou li sorti, ou konpran? Ler tou sa bann keksoz in arive Mr Speaker - ler ou, ou ti ganny anmenn Ankour a plizyer repriz akoz bann lartik ki ou'n ekrir ki pa ti *hate* e ki ou ti bezwen pey domaz.

Lekel ki ti la Mr Speaker? Eski i annan enn sa bann dimoun ki ti la pe ed ou? Ou konpran? Eski zot ti la zot? Ler le 3 Oktob latet ti ganny kase eski zot ti la zot?

War Mr Speaker, fodre nou dir keksoz ki mannyer zot été. *Hate speech* ki personn

pa'n koz lo la ozordi pa'n mansyonn sa 2 mo, se ki ou panik i bezwen ensit laenn ; ou kapab dir en dimoun- laliberte lekspresyon Mr Speaker se laliberte pou ou dir en keksoz ki ofansif, ki en dimoun pa anvi tande, sa i pa en lofans. Fodre ou ensit laenn. Fodre ou ensit laenn pou li vin en *hate crime*- pou li vin en *hate speech* - ou konpran?

E i pa tou keksoz, me Mr Speaker, en lot keksoz ki personn pa'n koz lo la ozordi lo zot kote, se ki i annan dan sanmenm sa Lalwa i annan anba sou seksyon 3 anba seksyon 89B i annan proteksyon for *freedom of speech* i ladan li, i annan 4 proteksyon 1,2,3,4,5 i annan 5 proteksyon in fini met la.

Savedir ki si mwan Mr Speaker dan en pyes teat mon dir en keksoz ki ofansif sa i ganny permet sa, akoz mon pa pe dir li pou ensit laenn mon pe dir li pou fer dimoun riye *or whatever*.

Si mon parey i ti arive Ankour ler nou ti pe tir sa lofans sodomi, ler nou ti al Ankour e ti annan tou bann larelizyon ki ti kont, ki kont omoseksyalite, sot zot ti la deor da *carpark* pe dir pa fer – pa en *hate speech* sa zot ti annan drwa e zot ti pe defann zot drwa Mr Speaker.

Zot an- e sa i la, i la i dan Lalwa tousala tou sa bann

proteksyon pou laliberte lekspresyon pou laliberte lekspresyon kont *hate speech* i ankor la. O konter zot in ganny mete ekspresman pou permet dimoun egzers zot drwa e zot drwa a laliberte lekspresyon, san ki zot komet en lofans. Me se sa bann Mr Speaker ki vin ensit laenn se zot ki pou responsab.

Me ankor enn fwa, ankor enn fwa, parey in ganny dir bomaten lo nou kote lata e ki ganny- li lot kote lata pa oule aksepte, pou ou kapab ganny en- pou ou kapab komet en lofans e ganny pini, premyerman ou bezwen fer en keksoz, si ou pa fer ou napa naryen pou ou per. Me fodre ou fer.

E dezyenmman, fodre lapolis i aksepte ki ou'n fer, e trwazyenmman fodre *Attorney Zeneral* i aksepte ki ou'n fer. E katriyenmman fodre en Ziz i aksepte ki ou'n fer. Tan ki tousala pa'n arive mannyer pa pou ariv ou?

Alors Mr Speaker, annou aret fer dimoun krwar ki koman sa Lalwa pou pase, lapolis pou pase pou aret tou dimoun pou anmenn zot ankour. *It's not going to happen* sa se bann demagozi politik ki sa bann zans i fer. E nou Mr Speaker nou pa tonm dan sa pyez.

Les mwan Mr Speaker an konklizyon, vin lo sa pwen

kardinal ki o kontrer zot, zot in la lo la. A zot napa okenn problemn ek sa Lalwa zot, zot problemn se *political affiliation* - lenfilyasyon politik akoz sa i en problemn pou zot. Mr Speaker, sa zot pa kontan e mon ava sit zot sa ki bann Manm in dir ; -

Onorab Cosgrow ki premye dimoun pou mansyonn sa in dir fodre tir *political affiliation* dan sa Lalwa; fodre tir *political affiliation* dan sa Lalwa.

En lot Manm in dir ki sa set en lapo bannann. Set en lapo bannann ki'n ganny glis dan sa Lalwa pou fer dimoun glis lo la. E finalman Onorab *Leader* Lopozisyon i dir si sa i sorti napa problemn ek sa Lalwa. Sa se zot.

Be mon kestyon pou zot Mr Speaker, se oli zot lamannman? Akfer zot pa'n anmenn en lamannman pou tire? Oli- anmenn en lamannman zot a montre sa ban dimoun deor laba ki wi, zot anvi fer en keksoz zot dakor ek sa Lalwa, be zot pou asiz la, zot pou asiz la, zis zot pou dir tire selman zot pa pou tire

Be si zot, zot pa tire be lekel ki pou vin tir pou zot Mr Speaker?

(Interruptions)

MR SPEAKER

Order! Order! Onorab, aret kriye silvouple.

HON BERNARD GEORGES

E ou konnen ki sa bann zans i parey Mr Speaker, ou konnen ki sa bann zans i parey? Sa bann zans i parey, zot pase la zot war en lapo bannann ater, olye anmase zot dir ou i annan en lapo bannann la, ou pou glise lo la.

Sa se sa bann zans Mr Speaker. Zot sitan pares, zot sitan pares ziska ni en lapo bannann zot pa kapab anmase ater.

MR SPEAKER

Ou ti pe konklir Onorab?

HON BERNARD GEORGES

E prezan zot anvi Seselwa vot pou zot? Mr Speaker, 2025 zot pou pas parey, parey zot pou pase la apre midi, zot pou vot kont e *still* sa Lalwa pou pase. 2025 zot pou sey antre dan Lasanble Lepep Seselwa pou kot zot deor avek zot lapo bannann. Mersi Mr Speaker.

(APPLAUSE)

MR SPEAKER

Mersi. Bon, bann Manm zot in fer bokou tapaz letan serten ti pe koze. Nou a silvouple rebran nou kalm, *breathe in* si ou bezwen, rebran zot kalm e nou a fini sa sesyon annord.

Vis-Prezidan in ariv ler pou mon apel ou pou fer ou repons lo deba.

VICE-PRESIDENT AHMED AFIF

Mersi bokou Mr Speaker. E mon ti a kontan remersi tou bann Manm ki'n koz an faver sa *Bill*. E ofer zot bann leksplikasyon lo plizyer eleman lo diferan bout Lalwa ki zot in santi nou devret koz lo la.

E petet zis pou komanse Mr Speaker, mon bezwen dir ki sa lamannman ki nou'n anmennen ozordi i vremen senp pou dimoun ki la deor ki pe ekoute ki tann tou kalite *clause*, tou kalite largiman - i vremen senp.

Nou, nou pe dir ek dimoun fodre pa ki dan nou lavi toulezour dan nou pe koze, nou menas dimoun. Nou pe dir ek dimoun fodre pa ki ou abiz dimoun. Nou pe dir ek dimoun annou aret ensilte dimoun.

Si ou fer sa bann keksoz sa i apel- e si ou fer li an rezon ki ou pe fer li aköz ras sa dimoun, bann karakteristik proteze sa dimoun son larelizyon, son afilyasyon, son krwayans, si ou fer sa Sesel i pou vin en lofans. Setou ki nou pe dir.

Prezan parey Onorab Georges in eksplike lot keksoz, si ou ale ou al bat en dimoun,

ou menas en dimoun, ou abiz li, ou ensilte li, prezan dan pe fer sa ki deza en krim anba nou Kod Penal - nou pa'n entrodwir sa ozordi i deza en krim. Si ou fer sa e anmenn tan ou ale ou al dir li mon pe fer sa aköz ou ras, ou krwayans politik, ou larelizyon, ou tandans seksyel.

Si ou pe fer aköz sa bann rezon la sa krim i vin pli sever. Be ki annan mal ladan? Mon demann mon lekor ki annan mal ladan si nou anvi anmenn en pei dan en direksyon kot nou paran respe kanmarad, nou respe ras kanmarad, nou respe krwayans kanmarad e ou respe tandans seksyel kanmarad nou pa abiz dimoun, nou pa menas dimoun, nou pa ensilte dimoun. Setou ki nou pe dir.

Largiman ki mon'n tande se, i annan 2 largiman prensipal kont sa, sa 2 largiman prensipal premyerman mon'n tande se nou, nou pe anmenn sa pou protez politisyen enn, dezyenmman nou pe anmenn sa Lalwa aköz nou anvi kontrol laliberte lekspresyon.

Sa largiman ki mon pe tande la ozordi, e les mon a dir zot aköz sa bann largiman i konpletman fo.

Premyerman zot largiman se nou pe protez politisyen. Annou regard bann Lalwa ki ozordi ki pe deza

donn proteksyon politisyen e mon a refer zot avek Lalwa *Standing Orders* Lasanble Nasyonal 59(4), be ti la avan 2015, ti la en bann lannen e i dir klerman ladan; -

“Content of speeches” i pa pe restrikte laliberte lekspresyon li, *“the name of the President shall not be used disrespectfully in debate”* pa fek anmennen sa.

(5) *“The conduct of the President, the Vice-President, Speaker, Deputy Speaker, Ministers, Leader of the Opposition, Leader of Government Business, Members or Judges of Supreme Courts- Superior Courts and Magistrate and all Constitutional Appointees and their families shall not be referred to except upon a motion moved for that purpose.”*

Alors nou pe koz protez politisyen? Be pa i deza la? Sa Lalwa i deza la zot prop Lalwa zot pa konnen, selman mon konpran zot pa konnen, mon konpran zot pa konnen akoz toultan zot abiz sa privelez e zot krwar i normal e Speaker i bezwen aret zot. Be selman zot prop Lalwa i dir zot sa i pa en keksoz nouvo, i pa fek anmennen, i pa fek anmennen par nou.

(Interruptions)

MR SPEAKER

Order!

VICE-PRESIDENT AHMED AFIF

Dezyenmman, dezyenmman ankor lo sa largiman ki zot pe servi pou dir nou, nou pe anmenn sa pou protez politisyen.

Mon anvi refer ou avek lartik oubyen *clause 54(1)* anba *Penal Code* ozordi nou pa pe amande sa nou, nou pa pe amande. E ladan i mete *sedition intention, seditious intention*. *“An intention to effect any of the following purposes. That is to say, to bring the President into hatred or contempt.”*

Dezyenmman *“to excite disaffection against the government the constitution of the National Assembly; to excite the people of Seychelles to attempt to procure the alteration otherwise and by lawful means of any matter in Seychelles established by law”* lenterferans politik nou pe koze, keksoz politik.

Apre i donn detrwa ankor *“is a seditious intention”*, savedir i pe deza dan zot letan, dan zot letan ti protez politisyen. Alors annou pa dir.

MR SPEAKER

Onorab. *Sorry* Prezidan mon kapab demann Onorab Pillay silvouple pou aret enteronpe

ler Vis-Prezidan pe koze silvouple? Silvouple ou'n fer li detrwa fwa arete. Vis-Prezidan ou a kontinyen silvouple. Onorab Pillay, mon pe demann ou ankor enn fwa arete. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, dezyenm largiman ki zot in fer sete ki aprezan nou pe sey kontrol laliberte lekspresyon e nou'n entrodwir anba sa bann *clause* politik ladan.

Konmsi sa i en bann keksoz ki ou pa annan drwa fer koman en *protected characteristic*.

Be mon anvi fer zot referans avek lartik anba *Employment Act* 46 (b) e 46 (b) zis pou montre ou poudir sa ki nou pe koz lo la, la zafer politik, e pa anmenn li dan travay i deza la anba *Employment Act* anba 46 (b) i lir *comme swivan*; -

“An employer shall not commit any act of harassment against a worker”, prezan nou bezwen dir be kisisa sa *harassment*, ki savedir *harassment*? Sa Lalwa ki egziste ozordi sa, *harassment means*, Lalwa ki zot ki ti pase; -

“Any such unfriendly act, speech or gesture of one person towards another person that is

based on the persons aged, gender, race, colour, nationality, language, religion, disability, HIV status, sexual orientation or political trade union or the association or otherwise would adversely affect the other persons dignity or make that person feel threatened, humiliated or embarrassed”.

Alor, i kler *sexual orientation or political*, pa nou ki'n anmennen sa, ti la deza dan Lalwa lanplwa, sa konsep pa nouvo sa. En konsep ki dir poudir ou pa annan drwa koze e pini dimoun lo baz politik dan travay, dan nenport landrwa.

Alor nou, ki nou pe dir? Ozordi nou pe senpleman promouvwar poudir anba *Penal Code* deza politisyen i ganny proteze li, anba *Standing Orders* politisyen i ganny proteze nou pa pe anmenn okenn lamannman nou pe fer pli kler ozordi.

Parske dan nou pei nou pa oule ki nou annan en lanvironnman kot i annan serten dimoun ki toulezour akoz fason koze, fason dir keksoz in sanze konpare ek 20 an pase. In sanze. Lontan ou al dir en keksoz dan Lari Bazar 2 boug ki'n tande, i pa fannen i pa kre laenn.

Ozordi ou annan rezo sosyal, ou annan *Facebook*, ou annan plizyer lezot keksoz nou

pa kont tousala. Lasanble i *live*, parske zot pa ti oule li *live* parske zot pa ti oule dimoun i tandé ki pase dan Lasanble. Sa ti apel laliberte lekspresyon ki zot pa ti oule pase.

Me ki nou pe dir, ki nou pe dir se ler ou koze koz ek responsabilite, koz avek respe e pa ensit laenn dan Seselwa. Setou ki nou pe dir, mon pa war naryen mal dan sa ki nou pe demande parske se en keksoz ki lozik.

Prezan an menm tan si zot krwar nou pe sey protez zot kont koz keksoz politik, mon oule dir poudir sa i pa korek ditou.

Akoz si ou lir sa bann lartik ki'n ganny mete, i dir poudir si ou koz en keksoz politik, vre i lo en group- en karakteristik. Be selman si ou pe fer li dan lentere piblik ou pa pe maltrete, personn pa pou dir ou naryen, personn pa kapab anmenn en ka kont ou.

Be selman si ou al lo *Facebook*, ou ale ou maltret en politisyen, ou maltret en parti politik, ou maltret en larelizyon, ou maltret en group dimoun ki annan en tandans seksyel e ou menas zot- ou ensit dimoun pou al fer keksoz kont zot, sa i mal.

I annan keksoz mal dan sa ki nou pe demande? Mwan mon krwar nou pe protez nou dimoun ler nou pe fer sa. Nou pe ankouraz Seselwa pou azir

dan en fason responsab. Nou pe ankouraze ki demen dimoun pa per pou al dan bann domenn parey politik.

Zot pa per pou al ladan, aköz zot konnen poudir zot annan serten drwa, serten drwa koze, serten drwa eksprim keksoz me zot osi zot annan serten kontrol lo zot. Zot osi zot pa annan drwa maltret dimoun deor.

Zis parey dan Lasanble e mon konpran lo zot kote petet zot pa pe swiv lord 59(4) ek (5), me selman mwan mon respe sa e mon annan drwa dir keksoz kont zot, me mon dir li ek respe. Mon dir li ek respe.

E alor setou ki nou pe demande dan sa Lalwa. Nou pe demande ki tou dimoun i koz byen, i koz poliman, se koumsa ki nou pou anmenn en sosyete pli devlope, en sosyete matir, kot tou dimoun i santi i annan en drwa i pa devret kanmi aköz son larelizyon, i pa devret kanmi aköz son afilyasyon politik.

E mon krwar si ou get Sesel ozordi, be Sesel ozordi tou dimoun i dir sa ki i oule, e nou pa *mind* dimoun i dir sa ki i oule. Selman nou pa kontan, e mon asire zot osi zot pa kontan ler lezot dimoun dir keksoz pou ensit vyolans.

Sa se bann keksoz ki nou, nou pa anvi, parske nou konnen nou listwar nou, nou konn byen nou listwar ki

manner vyolans in anmenn nou e nou'n fer dimoun vin vyolan. E nou konnen, alors mwan mon pa dan- mon pa ganny liste dan *TRNUC*. Alors enn itil zot vir lo mon zot dir ou, mon'n pa ladan mwan.

Me selman zot bezwen realize poudir ozordi, ozordi sa direksyon.

(Interruptions)

MR SPEAKER

Order! Order!

VICE-PRESIDENT AHMED AFIF

Sa parti politik pa pe dir ek dimoun- mwan mon parti politik pa pe dir ek dimoun poudir si ou pa swiv nou, ou pou fini anba en pon dan en rigol! Nou pa dir sa bann keksoz mon parti politik pa dir, parske nou pa krwar ladan.

Se sa, se sa ki bann keksoz ki pe ensit vyolans. E se sa ki nou, nou pa anvi anmennen dan sa pei. Mr Speaker, mon krwar mon'n kouver laplipar bann pwen ki relevan.

Mon ti a kontan remersi tou bann Manm ki'n koz an faver. Mon ti a kontan dir avek Lepep Seselwa ki sa ki nou pe anmennen i senpleman pou protez drwa tou group dan Sesel, nou pe prezerv laliberte lekspresyon.

Nou pa pe donn plis proteksyon neserman pou politisyen nou. Politisyen i deza ganny proteze dan Lalwa manner i ete e in byen ganny drafte. Selman nou pe dir pa bezwen menas dimoun; pa bezwen abiz dimoun, pa bezwen ensilte dimoun. Pa bezwen fer sa bann keksoz parske dan nou pti pei nou napa plas pou sa bann keksoz koumsa.

Setou ki nou pe demande, e si nou swiv sa mon krwar nou pou moderniz nou Lalwa nou pou anmenn Sesel lo en lot nivo. Nou pou debout par lao bokou nasyon, nou pou montre poudir nou, nou konn konport nou lekor, nou kon fer en pep ki matir, nou en pep ki anvi travay, nou en pep ki annan respe, nou en pep toleran e se sa ki nou, nou pe rode.

Me si zot pou vot kont sa, mon krwar pep Seselwa i a konnen egzaktaman ki zot, zot anvi. Mersi bokou Mr Speaker.

MR SPEAKER

Mersi Vis-Prezidan. Bon, nou'n ariv ler pou vote. Manm ki an faver Mosyon lo *Second Reading* lev lanmen silvouple. *Sorry*, eski mon'n fer en fot? Nou pe koz lo vot - wi, vot lo *general merit* pou *Second Reading*. Mersi.

Manm ki an faver lev lanmen? Mersi. Manm ki

kont? Mersi. Lo sa *Bill*, vot lo *general merit Penal Code (Amendment) Bill, 2024*; - 18 Manm in vot pour, 8 kont e 0 in *abstain*. So, *Bill* in aprouve lo *general merit* e Madanm Clerk i a fer *Second Reading*.

MADAM CLERK

Mersi Mr Speaker. *A Bill for an Act to amend the Penal Code to make provision for the aggravation of offenses caused by hate based on the victims actual or perceived protected characteristics and to provide for the offense of hate speech*. Mersi Mr Speaker.

MR SPEAKER

Mersi Madanm Clerk. Nou'n depas letan ki nou ti devret pran en *break*, apepre 15 minit la.

Me selman mon pe remarke i annan tre pe *amendment*, donk mon a propoze ki nou kontinyen avek *committee stage* pou pran bann *amendment* san pran en *break*. Mon krwar i pa pou pran tro long si mon pa tronpe. Serzan nou a pas dan staz komite silvouple.

Lekel ki pou *lead* nou dan *amendment*? Onorab Hoareau?

HON JOHN HOAREAU

Mersi Mr Speaker. Bonn apre midi *a tous*. Nou komans nou bann lamannman lo paz 4

anba seksyon *amendment of section (5)*. Premye lamannman i ganny trouve lo *part (d)* dezyenm laliny sa mo "*emotion*" i ganny sanze pou li vin "*emotional*".

Answit *(e)*, senkyenm laliny *after the word "altering"* nou retir "*their*" e nou met "*that individual's*" *savedir individual* avek 's.

E nou al lo *(f)*, trwazyenm laliny apre *the word "differs"* nou retir "*to*" e nou met "*from*".

Answit *(h)*, *after the-dezyenm laliny* sa mo ki komans "*regards*" nou retir sa "s" avek.

E nou al answit anba *chapter 6(a)* nou- olye "*38(a)*" nou retir sa "*(a)*" so i vin "*38(1)*". Prezan i dir "*this chapter applies where it is*", nou'n retir "*is it*".

E *(a)* paragraf *(a)* anba sa seksyon premye laliny *after the word "charge"* nou retir "*and*" nou met "*or*" e pou *subsection (b)* sivre komans avek *proved*, so nou retir sa mo "*is*" avan.

Nou al aprezan lo paz 7, lo paz 7. Mr Speaker i annan 2 lanmen ki'n leve.

MR SPEAKER

Wi, mon annan 2 lanmen ki'n leve. En moman, Onorab Georges, wi.

HON BERNARD GEORGES

Mersi Mr Chair. Mr Chair, mon ti annan en pti propozisyon, plito en kestyon lo paz 6, *clause 3 new, proposed new 38(4)* e dan dernyen laliny sa mo “*shall*” i fatig mwan en pti pe. Si nou lir li *for the purpose of subsection 2(b)*; -

“The victims proposed characteristics or presumed protected characteristic did not be the sole reason for committing the offence but shall be a substantial or significant factor” mon krwar *the intention is that it must be rather than it has to be.*

E mon demann mwan si sa “*shall*” pa devret “*must*”, e mon konnen ki dan langaz *drafting sometimes there are interchangeable*, mon ti ava kontan propoz pou- avek panel konsider “*must*” rather than “*shall*”. Akoz mon krwar *the idea is that i bezwen en substantial factor* me i pa selman sa. Mersi.

MR SPEAKER

Vis-Prezidan ou'n ganny lopinyon...

VICE-PRESIDENT AHMED AFIF

Nou dakor avek Mr Chair.

MR SPEAKER

Dakor avek *ok*. Manm i aksepte sa? *Ok*, Onorab Pillay ou pwen?

HON SEBASTIEN PILLAY

Mersi Mr Chairman. Mr Chairman, menm si nou konnen dan nou kote Lalwa pe al pase, i pa anpes nou pou kontinyen defann lentere sa pep ki la deor.

Mr Speaker, sa Lalwa i koz lo *hate speech, 89(b)* lo sa paz 7 kot nou ete i enkli en *clause* premye ki dir “*kominikasyon, advokasyon, propagasyon, written, spoken expressing any other form publicly or on electronic media*” i dir sa la li.

Apri ale i redir ankor lo (c) “*behaving in a manner that could reasonably be construed as threatening, abusive or insulting*”. So menm behavior i ganny konsidere koman *hate speech* prezan. *I don't get this* mwan. Si *hate speech is about speech, about* ou kominikasyon, *so now you want to make menm behavior* osi *as well*.

But notwithstanding sa aprezan Mr Speaker, sa provizyon sa *clause* i dir “*reasonably construed*” e i fer en definisyon *electronic media* enkli *WhatsApp* e *messaging*. Savedir Mr Speaker mon ti a kontan ki zot klarifye pou nou la devan.

Mwan mon'n sipoze ganny dir en keksoz ki ganny *construed* koman *hate speech*, lapolis i al rod en warant parey

in rode pou Mr Hoareau, i vini i donn mwan savedir i pou fouy lo mon telefonn pou li al rod *hate speech* menm dan mon *WhatsApp*, menm dan mon *messenger*? Mr Speaker *but this is abuse. This is abuse.*

MR SPEAKER

Onorab, Onorab sa i egzaktman sa kalite pwen, si ou anvi en sanzman ou absoliman bezwen anmenn en *amendment* napa sa. So mon pa konnen si...

(comments off-mic)

MR SPEAKER

Order! Mon pa konnen si Vis-Prezidan, si ou annan okenn leksplikasyon ou klarifikasyon pou ou donner ou kapab donner, me nou pa pe konsider en *amendment* la. Vis-Prezidan.

VICE-PRESIDENT AHMED AFIF

Mersi bokou Mr Speaker. Mr Speaker, nou'n fini pran vot lo merit e sa *clause* i enkli dan merit, nou'n fini pran en vot lo la.

Mon pa krwar nou devret annan okenn sanzman dan sa i nou'n vot lo la deza, san ki i annan en amannman ki ganny anmennen devan Lasanble avek *72 hours notice*. Sa i nou regilasyon. Mersi.

MR SPEAKER

Mersi. Nou'n terminen lo sa pwen. Nou'n terminen lo sa pwen. Onorab, ou an en lot pwen? Non, Onorab Hoareau silvouple kontinyen.

HON JOHN HOAREAU

Mersi Mr Chair.

(comments off-mic)

MR SPEAKER

Order! Onorab Hoareau.

HON JOHN HOAREAU

Mr Chair nou bouz lo paz 7 zisteman anba *subsection 3* dezyenm laliny *after the word-* i lir koumsa; -

“The provisions of subsection (1) do not apply if” “the” nou retir “they” nou met “the”, “acts are done in good faith” so nou'n include sa mo “acts are”.

MR SPEAKER

Thank you. Onorab Georges.

HON BERNARD GEORGES

Mersi Mr Chair. Mr Chair, mon pa oule koz lo la, mon oule koz lo en pwen zis apre kekfwa mon devret, mon'n met mon Lanmen anler en pe tro boner avan ki *panel* i aksepte.

MR SPEAKER

Anr, ou pa pe adres sa pwen ou?

HON BERNARD GEORGES

Non.

MR SPEAKER

Panel okenn problemm avek sa? Manm i aksepte? *Ok* Onorab Georges, ou kapab pran ou pwen.

HON BERNARD GEORGES

Mersi Mr Chair. Mr Chair, mon pe al lo *the paragraph* zis apre 3(a) e 1, 2, 3, 4, 5, 6 lo sizyenm laliny zot ava vwar sa katriyenm ek senkyenm mo “*harm, based*” i tro obor kanmarad nou bezwen en *space* apre *comma*.

E pandan ki mon annan laparol mon oule fer menm propozisyon anba (*d*) lo paz 8 anler sa 2 dernyen mo ant “*offence; or*” menm zafer pou dekol zot. Mersi.

MR SPEAKER

Mersi. Mon krwar sa i zis ban koreksyon mannyer mo *spacing*, mon pa krwar nou pou annan okenn lobzeksyon lo la. Onorab Hoareau *anymore?*

HON JOHN HOAREAU

Nou ava al aprezan lo paz 8 Mr Chair. 8 *subsection (e)* trwazyenm laliny sa mo “*writings*” nou'n retir sa “*s*” avek pou kit li “*writing*”.

Mr Speaker, sa sete dernyen lamannman ki nou annan pou prezante, mersi.

MR SPEAKER

Byen, bon nou'n terminen avek bann lamannman, napa lot pwen ki pe ganny leve. Nou a repas dan staz Lasanble pou nou pran vot pou nou pran *Third Reading*.

Nou a ganny Mosyon pou *Third Reading* silvouple.

HON BERNARD GEORGES

Mersi Mr Chair. Mr Chair, anba *order 76(1)* nou *Standing Orders* mon *move* ki *the Penal Code (Amendment) Bill, 2024* i ganny lir en Trwazyenm Fwa. Mersi.

MR SPEAKER

Mosyon a ganny segonde. Onorab Arissol?

HON SANDY ARISSOL

Mersi Mr Speaker. Bonn apre midi ankor enn fwa. Mosyon i ganny segonde. Mersi.

MR SPEAKER

Mersi. Manm a vot lo *Bill* dan *Third Reading*, Manm ki an faver ler lanmen silvouple. Mersi. Manm ki kont?

Bon, lo Mosyon pou *formal Third Reading* lo *Penal Code (Amendment) Bill, 2024 as amended* 18 Manm in vot pour, 8 Manm in vot kont, 0 *abstain*, Mosyon- *Bill* in aprouve par Lasanble. Mersi. Madanm Clerk a fer *Third Reading*.

MADAM CLERK

Mersi Mr Speaker. *This Act may be cited as the Penal Code (Amendment) Act, 2024.* Mersi Mr Speaker.

MR SPEAKER

Mersi. Bon *Bill* in pase par Lasanble. Onorab Georges, mon'n war ou, ou'n lev lanmen.

HON BERNARD GEORGES

Yes.

MR SPEAKER

nou'n terminen lo *Bill*.

HON BERNARD GEORGES

Non, non napa naryen pou fer ek *Bill* Mr Speaker. Mon ti anvi zis ou permisyon pou mon dir en keksoz ki mon'n bliye dir e ki napa naryen ki kontansye.

Avek ou permisyon Mr Speaker, mon ti anvi zis felisit Onorab Sandy Arissol ki asiz obor mwan ki'n ganny elekte resaman koman Asistan Trezorye SADCOPAC dan zot renyon ki zot ti fer *Zimbabwe*. Mersi.

(APPLAUSE)

MR SPEAKER

Byen. Mersi. Bon, nou'n termin travay ozordi. Mon annan zis 2 pti remark. Premye remark mon oule demann en *right of reply*.

I annan komanter ki'n ganny fer bomaten lo mwan referans avek mon rol koman Editer Regar, kot i annan serten lakizasyon ki'n ganny fer ki kekfw Regar in *promote hate speech* oubyen ankouraz li. Mon oule zis dir ki mon rezet sa lakizasyon e mon krwar sa *right of reply* i nesese ki mon fer dan Lasanble.

Mon dezyenm pwen, mon pe al zis anons en pe nou programm travay semenn prosenn. Mon oule port laplipar Manm i konnen, me mon a port a latansyon piblik ki nou pou annan en Konferans Parلمانter Losean Endyen semenn prosenn isi le 23 Lendi e le 24 Mardi.

E i annan bokou Manm ki enplike ladan. Lo lalis i annan 11 Manm an tou ki enplike e an plis ki sa plizyer *staff*. Alor dan diskisyon avek ABC ozordi i pou prepar programm semenn prosenn, nou'n deside, nou'n aksepte menm si i annan en pe kontansyon nou'n aksepte pou *suspend Sitting* Mardi prosen pou permet mwan personnelman e aköz mon annan en rol pou fer dan sa konferans e osi lezot Manm ki pe partisipe pou zot kapab *attend* sa konferans.

Sesyon pou rebran Merkrede e nou pou sey swiv nou programm labitid, nou pou

annan *Question Time* Merkredi bomaten e sa i avek Minister-Minis Valentin, kestyon pou Minister Ledikasyon, e osi si i annan *Private Notice Question* nou a pran li Merkredi osi.

Wi *ok*, sa i lo semenn prosenn. Mon - anfen demann konprenezon piblik e pwen ki mon oule fer se ki sa travay, sa konferans i en travay Lasanble i pa ki nou pe al pran konze. Nou annan sa delegasyon e nou pe diskit en size ki enportan an relasyon avek larezyon e i konsern sanzman klimatik e mon krwar i pou tre enportan pou Manm partisip ladan.

Bon, nou'n ariv a lafen nou sesyon. Mon remersye bann Manm pou zot partisipasyon. Mon remersye Vis-Prezidan avek *legal draftsperson* pou zot partisipasyon e nou a *adjourn* Lasanble la e nou a rebran Merkredi 9 er. *Adjourn*.

(ADJOURNMENT)